

SIO MAISOSIA NO ATATA sani Lukas Ikanure **Anamana Mautunue**

Lukas ikanu Sio Maisosia No Atata na isakanau runa ne surate mataanoë, areimo Maunau Iake Rerihoni Yesus Wani Lukas Ikanui. Tau ne surate mataanoë ikanu rerihoni Yesus iamahaiki mai tuniai reini rotu-tu imatai, oyo iamahaiki honu, oyo Anahatana iapusaai roe noiyaha. Tau Sio Maisosia No Atata Lukas ikanu rerihoni sapani na Yesus iaisosi ne mampusua, samatoro Anahatana iapusaai roe noiyaha. Oyo Lukas isima runa sapani na Anahatana Ne Inaha iaka-haiso na oaunauso rerihoni Yesus sui supan-supan. Mataanoë oaunauso sui kota Yerusalem, ita oaunauso sui otoi Yudea, ita sui otoi Samaria, rotu-tu tau muie oaunauso sui tuniai reini pusiki. Lukas oi wain Yesus ne mampusue. Taue isa ieu ikata sio maisosia sani Paulus. Reiso sani tau ayat 20:5 ikanu “ami” tau Lukas waini ieu ikata Paulus nea.

Mataanoë sio Yahudiu umau sahoro oparisaa tau Yesus samatoro sio wason sio Yahudiu tewa oparisaa tau muie. Yahudi wani sio Israel no akama. Sio maisosia wasoni sio Yahudiu. Sio Yahudiu oparisaa tau Anahatana potuina nea. Sio osupu maunauna panesi rerihoni Anahatana pusu Musa. Sio opusu-pusu maunauna rai ia-ia runa no monna panesi honu. Anahatana itotoe osiso potuina nea na mka iapuheuso pusu Ia Anahatana Iratiki Iapuheuso. Reiso sio Yahudiu umau oparisaa ata Yesus wain ia rei. Ne sio

umau openeso oparisaa reiso onesi sio wason oparisaa rei. Sio Yahudiu openeso omananuru runa sio wasoni sio Yahudiu tewa. Ne Anahatana Ne Inaha iaisosi sio maisosia na oaunau sio wasoni sio Yahudiu tewa. Reiso sio Yahudiu wasoni openeso oparisaa rei onesiso rotu-tu ohunu sio wasoni oparisaa umau.

Rerihoni sio ona Yahudiu wasoni sio tikana ate. Tikane isa wani sio imam. Sio wasoni rerihoni Harun nea upu. Harun, ia Musa kakai. Rerihoni sio pusiso, ia osa iuna ia imam onate. Sio utun ua osaka roe Anahatana ne numa wasoni sio imam no siniriu. Osaka sio wason orori makapanau osi Anahatana runa osaka apia roe Anahatana ne numa. Sio imam tamena, sio nihi itu utun ua nesi. Sio rei orehi samatoro okenu makapanau waron sio Yahudiu oruire osi Anahatana.

Tikane isa honu wan sio matuhete Musa ne maunauna. Sio rei oanei panesi rerihoni Musa ne maunauna reiso oatuhetere osi sio Yahudiu.

Tikane isa honu rerihoni sio ona Yahudiu wasoni sio onata rerihoni akama Yahudi. Sio orime kuru tau Musa ne maunauna runa monna panesi waroni sio oakapenare tau Musa ne maunauna. Sio panesi openeso tau Yesus. Oasau ata Yesus runa ne mampusua opusu Musa ne maunauna tewa. Yesus ipenei tau sio no monna waroni oakapenare. Reiso sio onata rerihoni akama Yahudi onesi sio wasoni oparisaa. Ne sio onata rerihoni akama Yahudi umau oparisaa tau Yesus oi sani Saulus.

Tikane isa honu rerihoni sio ona Yahudiu wason sio Sadukiu. Sio wason sio imam masuae noa upu, reiso sio mainaya. Oaisosiso roe Anahatana ne numa. Onesi sio wasoni oparisaa.

Ia isa tewa iparisaa ata Yesus wain Ia Anahatana Iratiki Iapuheuso.

Sio onata umau wason rerihoni akama Yahudi tewa. Sui niana sio wasoni sio Yahudiu tewa, sio maisosia ohiti sio onata tau tikane wasoni oparisaa na sio osaka sio wasoni oparisaa tau Yesus.

Anahatana iapusaa Yesus roe noiyaha

¹ Teopilus, we neta.

Tau we surate mataanoë usima runa pusire waron Yesus iunare runa iatuhetere

² rotu-tu Anahatana iapusaai roe noiyaha. Naone Yesus iaisosi ne maisosia wason ininiso na sio oakahaiki. Iaisosiso runa kawasa rerihoni Anahatana Ne Inaha.

³ Yesus imatai, oyo tau onona hutu ate iatu-atuhete ruai osi ne maisosia na sio oaneï ia-ia ata wain iamahaiki honu. Sio onooi, oyo ianamana rerihoni sapani na Anahatana irime ne mansiau.

⁴ Taue isa, tau Yesus wain iaiki ikataso, iaisosiso san rei, “Pene oeu oarihoni kota Yerusalem reini. Napa mai kota reini rotu-tu Anahatana irui sae wani itotoe iruiki sani naone uasau osimo rei.

⁵ Yohanis isohumo tau tihu na mansiau oaneï ata oarihoni no rosau nea. Ne nesie onona ina oyo, Anahatana irui Ne Inaha osimo.”

⁶ Reiso tau sio wason okata Yesus, oasei tanui, “Upu. Ano nanie ahiti ia Israel tau aia sani masuae, na pene ia rakane isa irime ita nea?”

⁷ Iahata, “Amaku ruai ihete umetene. Ne itapi omi oaneiki tewa.

⁸ Ne mka osupu kawasa. Anahatana Ne Inaha mka ihokai tanumo, oyo osima runa au mai kota

Yerusalem reini, sui otoa Yudea pusiki, poe otoa Samaria, rotu-tu tuniai reini nene rurue.”

⁹ Iasau san rei oyo, Anahatana iapusaai roe noiyaha noi sio mata kahutua. Oyo yahu renetei reiso onooi tewa nea.

¹⁰ Sio wason oamrou roe nante asi onooi isaai, oyo sira tau sio ua oausahu papi putia wason oooso mai nusuo.

¹¹ Sio rei oasei, “He, omi rerihoni otoa Galilea. Omi wani oomo oamrou roe nante, nanie taa hae? Yesu rei, Anahatana mato iapusaai roe noiyaha, mka ihokai mai tuniai reini honu sani sinasi omi onooi isaai rei tea.”

Sio ohiti Matias ikati Yudas

¹² Sio maisosia onunso roe kota Yerusalem oarihoni pupue wani nanai Saitun. Pupue rei haineke kilo osa rerihoni Yerusalem.

¹³ Ohoka roe Yerusalem oyo, ohokaso mai numa wani sio oararane tanui, samatoro osaaso roe kamar roe naue. Sio maisosia rei wason:

Petrus,

Yohanis,

Yakobis,

Andreas,

Pilipus,

Tomas,

Bartolomeus,

Mateos,

Alpeus anai wain nanai Yakobis,

Yakobis anai wain nanai Yudas,

runa Simon. Ia rei ipenei tau sio rakana orime ne niane.

¹⁴ Sio oamanouso na oainisi tau Anahatana sui osa sio anoo osa. Oamanouso runa sio pinau

umau sani Yesus inai wain nanai Maria. Yesus nea waniu okataso oi.

¹⁵ Tau sio wason oamanouso, Petrus ihitioi roe, nanie ianamana osiso. Sio rei, sio utun hutu ua. Reiso Petrus iasau san rei,

¹⁶ “Wea kakau, wea waniu. Masuae sio okanu tau Anahatana ne anamanaya ata Anahatana Ne Inaha iuna aia Daud isima runa pan muie mka sapan runa Yudas. Daud isima, oyo reeu sani iasau rei sirinia. Yudas sahoro iautunu sio oaresi Yesus.

¹⁷ Yudas, ia mo, naone ikata ita. Yesus ihitiki na ikata ita na pusita inana tanei osi Anahatana.”

¹⁸ (Yudas isupu tuamane nea tau kepen waron sio oruire osiki tau ne kahatene rei. Poe tuamane rei, iamnahui, oyo imatai, tia i wapisai, oyo apui unue rehokai.

¹⁹ Sio pusiso sui Yerusalem oatinu tau rei, reiso oaoi tuamane rei tau Akeldama tau sio no sou. Nene nohue *Tuama Nasi*)

²⁰ Oyo Petrus iasau honu, “Ia sahoro ikanu Sura Kapatau ikanu san rei,

‘Tapi ne numa huie.

Pene ia isa iruei tanui.’
Ikanu honu ata,

‘Tapi ia tamene isa ikatiki.’

²¹⁻²² Reiso kahurae inini ia isa na ikatata na isima ata inoo Yesus wain iamahaiki honu. Ia rei, kahurae naone ikata-kata ita tau ipusu Upuri Yesus. Kahurae ia rei ikatata on Yohanis isohuso na mansiau oanei ata oarihoni no rosau nea rotu-tu Anahatana iapusaa Yesus roe noiyaha rerihoni ita.”

²³ Reiso oatinu tau rei, onini sio ua. Sio reimo wason Matias runa Yusup Barsabas, oaoiki tau Yustus oi.

²⁴ Oyo oainisi san rei, “Upu. Ano anei pusiso anoo nea. Autuu na asima ia seia rerihoni sio ua reini sahoro ano aniniki

²⁵ na ikati Yudas. Ikatiki na iuna ia maisosie na inana tanei osia. Yudas iarihoniki nea. Ieui noi naniai nea.”

²⁶ Oyo okanu uaso nanao tau hatu, samatoro oapataure pan kawei anoe. Apataure, samatoro okainisu kawei rei rotu-tu hatu isa rehokai. Hatu wani sio okanu Matias nanai rehokai, reiso oahata ia osa runa sio maisosia hutusa rahana osa tamena.

2

Anahatana Ne Inaha irui kawasa osi sio wason oparisaa

¹ Tau umete mainae rei sio oaoiki tau Pentakosta oyo, sio wason oparisaa oamanouso tau numa osa.

² Sira tau oatinu tinunue on roe noiyaha. Tinunue rei sani ihu mainae rehoka. Sio wason orueso pan numa rei, oatinui sui numa anoe rei pusiki.

³ Oyo onoo sani usa nene itana waron rahori numa anoe rei. Rahori oyo, rakahuuso sana osa-osa.

⁴ Anahatana Ne Inaha irui kawasa osi pusiso, oyo oanamana tau sou waron sio ruao oaneire tewa.

⁵ Tau muie reini sio Yahudiu panesi ohokaso on noi niana pusire mai tuniai reini. Sio wason oararane mai kota Yerusalem. Sio rei opusu Anahatana ne maunauna.

⁶ Sio panesi rei oatinu tinunue rei, oyo oamanouso. Taa oatinu sio wason oparisaa rei oanamana tau sio ruao no sou, osira.

⁷ Osira nai osa reiso oasau, "Ira oe. Sio wason oanamana san rei, sio pusiso on poe otoa Galilea tea.

⁸ Sapani na au uatinu sio oanamana tau ruaku we sou? Ne sio rei honu oatinu sio oanamana tau sio ruao no sou.

⁹ Ita reini rerihoni:

otoe Partia,

otoe Media,

otoe Elam,

otoe Mesopotamia,

otoe Yudea,

otoe Kapadokia,

otoe Pontus,

otoe Asia,

¹⁰ otoa Prigia,

otoe Pampilia,

otoe Mesir,

otoa pan Libia haineke nia Kirene,

sio umau wason okata ita rerihoni kota Roma oi.

¹¹ Sio umau wason sio Yahudiu, sio umau tewa ne onusu Yahudi nea. Sio umau honu wason on nau nusa Kreta runa otoa Arab. Au uatinu sio oanamana tau ruaku we sou. Sio rei honu oatinu sio oanamana tau ruao no sou. Sio rei wason osima runa Anahatana iuna sae runa ne kawasa."

¹² Sio osira, reiso oasei tau umau, "Ira oe. Areini mo nene nohue sapan?"

¹³ Ne sio umau honu oaumanso, reiso oahata, "Oninu, reiso omukeso."

Petrus iatuheteso rerihoni Anahatana Ne Inaha sapan

¹⁴ Petrus ihitioi roe ikata sio maisosia hutusa rahana osa tamena, oyo ianamana nioi mainae osi sio panesi rei. Iahata, “Omi Yahudiu. Pusimo utumo wani oruemo mai kota Yerusalem. Au nanie uatuhetemo tau rei, reiso oatinu ia-ia.

¹⁵ Omi oahata ami reini mo, amukema. Aikee amukema tewa. Ranie mato rehiti-hiti, reiso amukema tewa, tea.

¹⁶ Ne areini sani masuae ia mamsima runa Anahatana ne anamanaya wain nanai Yoel isima runa pan muie mka sapan. Iasau sani Anahatana iasau san rei,

¹⁷ Mka tuniai reini haineke tihoniki,
oyo urui-rui We Inaha osi sio pusiso.
Reiso moa hehuka mka oaunauso tau we anamanaya,

Sio honua onoo masasua rerihoni au,
Au mka una sio mtuana oneke oamnii.
¹⁸ Osi we manorina iae, sio hanaia runa sio pinau pusiso,
mka urui-rui We Inaha osiso tau umetene reinau
na oaunauso tau we anamanaya.

¹⁹ Mka au una sima-simana na sio osira.
Mka onoo roe nante.
Mka onoo poe tuamane.
Mka au una sima-simana tau we kawasa mai tuniai reini
na onoo nasi, usa, runa wenue kapitorone.

²⁰ Mka ranie repumonoi.
Hunane, sio onooi msinae sani nasi,
samatoro umete mainae rei rehokai.
Tau umetene rei mka uatuheteso tau we kawasa mainae.

Mka uapasana sio pusiso.

²¹ Ne ia seia man iainisi na uapuhaiki,
mka uapuhaiki sirinia.

²² Omi Israel! Oatinu tau we anamanaya rai! Anahatana iatuhete osi omi ata ihiti Yesus wain on pan nia Nasaret. Oaneiki nea tau Anahatana irui kawasa osiki na iuna sima-simana tau matamo kahutua.

²³ Aikee orui Yesus osi sio umau ohunui, oyo omi otapi sio kahatena opakui roe hini wani renienei. Reiso omi ohunui. Ne areini erepusu Anahatana ne kaheute. Ianeiki naone.

²⁴ Omi ohunui oyo, Anahatana iapuhaiki honu rerihoni sio matana. Inanai na pene sinsarai runa sio matana. Ia mka imatai rotu-tu ria supan tewa.

²⁵ Masuae aia Daud isima runa ruai tewa. Ne isima runa pan muie mka Yesus iamahaiki honu. Iasau san rei,

‘Uno-noo Upuku haineke,
wain ikataku.
Reiso ukaitau tewa.

²⁶ Akataku reiso anoku miri-mirike.
Roe hohaku uainaa runaya.
Unapa anoku kaie runa tinaiku.

²⁷ Tau sae, ano atapiku tewa
na mka umataku rotu-tu ria supan.

Atapiku tewa
na au wani au manisate onate, tinaiku
rekopui.

²⁸ Ano atuheteku nea tau arena na uamahaiku
rotu-tu ria supan.
Anoku mirike mainae tau ano akata runaku.’

²⁹ Wea kakau, wea waniu. Unina na oanei ia-ia rerihoni upuri wain nanai aia Daud. Daud imatai, okaniki nea. Ia ne kupuro wani asi.

³⁰ Masuae Anahatana itotoe osi Daud ata mka ihiti upui tau natu. Daud wain ia mamsima runa Anahatana ne anamanaya.

³¹ Ianei mka Anahatana iuna sae on iunai tewasi. Reiso iaunutu anoi ata mka Ia Aia wain Anahatana Ihitiki na Iapuheu ne Mansiau imatai, oyo iamahaiki honu. Daud iasau san rei, 'Anahatana itapiki

na ikata sio matana rotu-tu potuina tewa. Itapiki rotu-tu tinain rekopui tewa.'

³² Yesus rei, Anahatana iapuhaiki honu. Ami ruama anoo ata wain iamahaiki nea.

³³ Anahatana iapusaai roe noiyaha. Wairo isupu mui ran manetane rerihoni Anahatana nea, reiso wain iruei hae hanai wanane. Anahatana irui Ne Inaha osiki nea sani masuae itotoe. Oyo Yesus iruiki osima sani omi wani onoo runa oatinu reini.

³⁴ Daud ruai isaa roe noiyaha tewa, reiso ianamana rerihoni ruai tewa. Ne iaunutu anoi rerihoni Yesus iasau san rei, 'Anahatana iasau osi Upuku.

Rue hae hanaku wanane

³⁵ rotu-tu aheta tau me nisau.'

³⁶ Reiso omi Israel pusimo utumo kahurae oanei manisate ata Yesus mo, omi opakui roe hini wani renienei, ne Anahatana ihitiki tau Upuri runa Ia Aia wain Anahatana Ihitiki na Iapuheu ne Mansiau nea."

³⁷ Sio panesi rei oatinu tau rei, oyo oatamisi. Reiso oasei tau Petrus runa sio maisosia tamena.

“Mania kakau, mania waniu. Kahurae ami auna sae?”

³⁸ Iahata, “Arihoni mo rosau, oyo ami asohumo na mansiau oanei ata oarihoni no rosau nea. Asohumo sana osa-osa na sio oanei ata anomo osa runa Yesus Kristus. Arihoni mo rosau na Anahatana iuna heure. Oyo asupu Anahatana Ne Inaha wain Anahatana iruiki osia.

³⁹ Tau sae, Anahatana itotoe nea. Nanie irui Ne Inaha osia runa mea upu runa sio wason hainau. Itotoe osi sio pusiso sahoro mka ianaha runaso.”

⁴⁰ Petrus iaunauso tau anamanaya panesi. Iaisosiso san rei, “Tapi Anahatana iapuheua na pene iapasana tau mka iapasana napisi sio wason no kahatene reini. Iapuheua na amahaia rotu-tu ria supan.”

Sio wason oparisaa tau Yesus

⁴¹ Sio panesi oparisaa tau Petrus ne maunauna rai, reiso sio mampusua osohuso na mansiau oanei ata oarihoni no rosau nea. Tau ranie hatae rei, sio nihi tonu ouna osa runa sio wason oparisaa nea.

⁴² Sio opusu-pusu sio maisosia no maunauna, oama-amanouso tau osa. Oai poroti tau osa anoo rapeka runa Yesus imatai. Oainisi tau Anahatana tau osa.

⁴³ Anahatana irui kawasa osi sio maisosia na ouna sima-simana sui osa, reiso sio pusiso osira. Okaitau.

⁴⁴ Sio wason oparisaa rei, oamanouso tau osa sui osa. Osama no apia osi umau.

⁴⁵ Reiso taue isa, oahen no tuamane isa te? No apia te? Oyo osama kepen waron osupure rei osi sio wason no apia tewa, no muaio tewa.

⁴⁶ Anoo miri-mirika. Oamanane osama no muaina osi umau. Reiso oamanouso ranie hatae isa reeu mai poua tonu rei oamanouso honu sui osa pan Anahatana ne numa mainisie nusue oai poroti sui no numau tau osa anoo rapeka runa Yesus imatai.

⁴⁷ Sio oainaa runa Anahatana. Mansia pusiso oahata sio iaka. Ranie hatae isa ereeu mai poua tonu rei Upuri iapuheu sio umau na oamahaiso rotu-tu ria supan. Reiso ouna osa runa sio wason oparisaa nea.

3

Petrus isuisene ia wain italai

¹ Petrus runa Yohanis wason oeuso roe Anahatana ne numa mainisie tau ranie manne pannuhu sio oainisi tau Anahatana.

² Roe ne numa rei, onoo sio wason orori ia wain italae isa. Ia rei, italae on ia iamrai asi. Ranie hatae isa ereeu mai poua tonu rei oautuei haineke mitanunue wani nanae, “Mitannunu lake” na iainisi kepen rerihoni sio wason onusu pan Anahatana ne numa mainisie nusue.

³ Ia wain italae rei inoo ata Petrus runa Yohanis nanie onusu pan Anahatana ne numa nusue, oyo iainisi san rei, “Samaku tau kepen inate isa ee.”

⁴ Uaso ono-nooi, oyo Petrus iasau osiki, “Masi anoo mai.”

⁵ Reiso iariniiso iahata kani nanie orui kepen osiki.

⁶ Oyo Petrus iasau, “Au we kepen inate isa tewa. Ne nanie urui sae isa honu osia. Tau Yesus

Kristus wain on pan nia Nasaret ne kawasa, masi ruam aeu.”

⁷ Oyo isota hanai wanane, iakahaiki ihitioi roe. Iakahaiki ihitioi roe oyo, mata hun tewa oyo, ia wain italae rei ain atua makaya nea.

⁸ Oyo isoman roe, samatoro ruai ieui suru ria, suru nau. Oyo inusui pan Anahatana ne numa mainisie ikata sio ua rei. Ieu isoman-soman iainaa runa Anahatana. Iahata, “Anahatana, ano mo, ano iake tunne nai osa. Ano asuiseneku nea rotu-tu ueu iake reini. Ano me kawasa mainae.”

⁹ Sio pusiso onoo ata wain ieui iainaa runa Anahatana.

¹⁰ Sio oationai tau ia iru-ruei iainisi kepen haineke Anahatana ne numa mainisie nene mita-nunue wani nanae “Mitanunu lake.” Reiso osira hun ruao onoo ia sapan nea rei.

Petrus iaunauso roe Anahatana ne numa

¹¹ Ia wain naone italae rei wain ikata Petrus runa Yohanis asi, oyo sio pusiso oruma oamanouso mai tanso tau sio wason mai teune wani oaoiki tau “Salomo Ne Teune.” Sio pusiso osira.

¹² Petrus inooso, oyo iasau osiso san rei, “Omi Israel. Osira tau rei, nanie tahae? Oasumatama, nanie tahae? Oahata ia reini wain ieui tau ami ruama mani kawasa te? Tau ami manisata onate te?

¹³ Anahatana wain Abraham, Isak, Yakup, runa rea momou rea upu pusiso oainaa runai iuna mainae tau Yesus, ia ne manorine nea. Yesus rei, omi oruiki osi sio wason no kawasa ohunui. Pilatus nanie ialapasiki ne omi openemo.

¹⁴ Ia rei, ia manisate. Ia manisate onate. Ne omi openemo tanui oyo oainisi na Pilatus ihoka ia mamhunue osimo.

¹⁵ Reiso ohunu ia wain iapuhaiso. Ne Anahatana iapuhaiki honu rerihoni sio matana. Ami anoo ata wain iamahaiki honu, reiso asima osimo.

¹⁶ Tau ami aparisaa tau Yesus, Yesus iuna ia wain naone italai iamkona nea wain omi onooi runa oationai. Tau ami aparisaa tau Yesus runa ne kawasa, isuisenei. Waini ieu iake nea inoo tau matari.

¹⁷ Wea kakau, wea waniu. Uanei nea ata omi runa sio ona Yahudiu ouna san reini mo, tau oanei tewa ata Yesus wain Ia Anahatana Iratiki Iapuheuso.

¹⁸ Ne Anahatana itapi san rei sani naone sio mamsima runa Anahatana ne anamanaya oasau ata mka pan muie sapan. Oasau ata mka Ia Aia wain Anahatana Ihitiki na Iapuheu ne Mansiau sinsarai.

¹⁹ Reiso oarihoni mo rosau. Onunimo mai Anahatana na iuna heure,

²⁰ na Upuri ihokai tanumo na oahana mo inahau honua. Mka iaisosi Yesus ihokai tanumo honu. Yesus rei, wain Ia Aia wain Anahatana Ihitiki na Iapuheu ne Mansiau. Naone ihitiki nea.

²¹ Kahurae iruei roe noiyaha rotu-tu Anahatana iuna pusire sani naone iuna sio mamsima runa ne anamanaya wason manisata onate oasau.

²² Oarihoni mo rosau. Tau sae, naone Musa iasau osi sio Israel san rei,

‘Upumo Anahatana mka iaisosi ia mamsima runa ne anamanaya isa osimo rerihoni

ruamo mo mansiau.

Ia rei, sani au sirinia.

Saka oatinu tau ne anamanaya pusire waron
iasau osimo.

²³ Sio sahoru oatinu tau ia tewa,
sio rei, sio osa runa Anahatana ne mansiau
tewa nea.'

²⁴ Oarihoni mo rosau. Tewa mo, Samuel runa sio
mamsima runa Anahatana ne anamanaya wason
ohokaso tau muie pusiso osima na mka sapan
pan muie runa napisi reini.

²⁵ Sio mamsimaya oasau ata Anahatana itotoe
irui Ia Waini Iratiki Iapuheuso. Osupui nea.
Anahatana itotoe osi rea upu. Iruiki osi omi nea.
Iasau osi Abraham san rei, 'Pusu upumu, mka au
urui iake osi sio pusiso mai tuniai reini.'

²⁶ Reiso Anahatana inini Yesus tau ne manorine,
oyo iaisosiki ihokai mai tanumo naone na irui
iake osimo. Irui iake rei tau iunamo oarihoni
mo arena kahatena rai."

4

Petrus runa Yohanis oamanane sio siniriu

¹ Petrus runa Yohanis wason oanamana osiso
asi, oyo sio imam no ia polisi tau Anahatana ne
numa mainisie runa sio Sadukiu umau ohokaso
mai tanso.

² Sio rei oakapuku tau sio ua rei tau sio wason
oatuhetesu rerihoni Yesus. Osima ata Yesus wain
iamahaiki honu rerihoni sio matana. Arei nene
nohue sio matana mka oamahaiso honu.

³ Reiso osotaso, samatoro onususo pan pui
anoe. Pumono nea reiso osakaso pan pui anoe
rotu-tu manahane.

⁴ Ne sio panesi sahoro oatinu no maunauna oparisaa. Reiso sio nihi nima wason oparisaa nea.

⁵ Hanu roe oyo, sio imam no siniriu, sio matuhete Musa ne maunauna runa sio ona Yahudi nesia rei oamanouso mai kota Yerusalem.

⁶ Oamanouso runa sio imam no ia mainae wain nanai Hanas runa Kayapas, Yohanis, Aleksander, runa ia mainae rei ne enau umau honu.

⁷ Oyo orori sio ua rei oamananeso, samatoro oasei tanso san rei, "Ia seia irui kawasa osimo na osuisene ia wain naone italai rei? Ohete ia seia nanai?"

⁸ Oyo Petrus isupu kawasa rerihoni Anahatana Ne Inaha reiso iasau san rei, "Omi ona Yahudiu.

⁹ Omi wani oasei tanuma ranie hatae reini tau ami auna iake. Akahai ia wain naone italai rei. Reiso nanie oanei sapani na asuisenei rotu-tu ia iake nea.

¹⁰ Reiso kahurae omi runa sio Yahudiu pusimo oanei ata ia rei wain ioo iamananemo mai rei tinain iake nea, tau Yesus Kristus, ia wain on pan nia Nasaret rei, ne kawasa. Yesus reimo, omi orerei roe hini wani reniene. Ne Anahatana iapuhaiki honu.

¹¹ Yesus rei, sio oanamana tanui tau Anahatana ne anamanaya san rei,

'Hatu tinipae wani sio mamnana numa openeso tanui
ereuna hatu mataano. Ereuna numa
makae nea.'

¹² Yesus ruai man bisa iapuheuta na iamahaita rotu-tu ria supan. Mai tuniai reini pusiki mo, ia isa iae ne kawasa iapuheu na iamahaita tewa. Hasae Yesus sahoro ne kawasa."

¹³ Sio onata oatinu ata Petrus runa Yohanis uaso okaitau oanamana tewa. Masike sio mainaya tewa, okaitau tewa. Masike sio isikola tewa, okaitau tewa. Reiso osira. Oyo sio anoo rapeka runa naone uaso okata-kata Yesus.

¹⁴ Ne sio mka oasau sapan? Ia wain naone italai rei wain ioo iamananeso ikata Petrus runa Yohanis. Ia wain ieu iake nea.

¹⁵ Reiso sio onata oaisosi uaso ohokaso onapa pan manahane na sio ruao oanamana osi umau.

¹⁶ Oyo oasei tau umau, “Kahurae ita iuna sae runa sio ua rei? Sio pusiso mai kota Yerusalem reini oanei nea ata sio ouna sima-simane rei. Sapan na ita iauhaa?

¹⁷ Ne mai, ita iputa isauso na pene oanamana osiso ohete Yesus nanai nea na pene sima-simane rei, sio panesi oatinu rerihoniki honu.”

¹⁸ Reiso sio oanaha runa uaso na onususo honu, oyo osopo uaso na pene ohete Yesus nanai nea runa pene oatuheteso rerihoni Yesus.

¹⁹ Ne Petrus runa Yohanis oasau san rei, “Ruamo oarinii. Nene manisate tau Anahatana matai usena wani sapan? Apusu omi mo mau-naune te apusu Anahatana ruai ne maunauna?

²⁰ Ami arihoni iake tewa. Kahurae asima rerihoni ruama anoo sae runa atinu sapan.”

²¹ Sio onata rei osupu manaete isa tewa nea na oapasanaso. Reiso oputa osauso honu, oyo ohokaso. Tau sae, sio pusiso mka openeso tau rei. Sio wason oainaa runa Anahatana tau sima-simane rei.

²² Ia wain naone italai rei wani ia iake nea tau sima-simane rei, ne musum hutu ate nesi nea.

Sio wason oparisaa oainisi na pene okaitau

²³ Sio onata ohoka Petrus runa Yohanis arihoni pui anoe, samatoro uaso onunso pan no netau wason oparisaa rei. Hoka pan, oyo osima runa sio imam onata runa sio ona Yahudi nesia rei oasau sapan.

²⁴ Satinu tau no anamanaya rai, oyo oainisi tau Anahatana anoo osa. Oahata, “Mania Upu. Ano ahaye tau nante, runa tuniai reini, runa nuae runa pusire waron.

²⁵ Tau Me Inaha, auna mania upu aia Daud, ia rei wain me manorine, aunai iasau san rei,

‘Sio wason oationa Anahatana tewa anoo ranuku-nuku ranaka-naka, nanie tahae?

Sio tumatau ouna kaheuta nanie ohunui.
Aikee kaheuta rai, raeu tewa, nanie tahae?

²⁶ Sio aiau mai tuniai reini mo osaka nanie oapuoo manahitane.

Sio onata oamanouso nanie onesi Upuri runa Ia Aia wain Anahatana Ihitiki na Iapuheu ne Mansiau.’

²⁷ Poe oyo, ereeu sani iasau rei sirinia. Herodes runa Pontius Pilatus oamanouso mai kota reini nea. Oamanouso runa sio wason oationa Anahatana tewa runa sio Israel oi. Oamanouso nanie otuntana runa me manorine, Yesus wain ia manisate onate rei. Ia rei, ano ahitiki tau Ia Anahatana Iratiki Iapuheuso nea.

²⁸ Oamanouso na ouna pusire waron ano aunuture tau me kawasa runa me kaheute naone na ereeu san rei.

²⁹ Reiso, Upu, muie reini mo, masi atinu sapani na oputa osauma. Akahaima, me manorina rei, na aunauso tau Sou lake rerihoni Yesus na pene akaitau.

30 Atuheteso rerihoni me kawasa sapan. Asuisene sio kupua, auna sima-simana tau me kawasa runa sima-simana raasiraso runa kawasa rerihoni ahete Yesus nanai. Yesus me manorine wain manisate onate.”

31 Oainisi pusi oyo, naniao mananoune rei erekoka. Oyo Anahatana Ne Inaha irui kawasa osiso na osima runa Anahatana ne maunauna. Okaitau tewa.

Sio wason oparisaa osama no apia osi umau

32 Sio pusiso wason oparisaa, oarinii sani sio osa, anoo osa. Ia isa iasau tewa ata, “Au we apia rei, osi au ruaku man.” Ne osama no apia pusire osi umau.

33 Tau kawasa mainae, sio maisosia osima osiso ata Yesus wain iamahaiki honu. Anahatana irui iake mainae osiso.

34 Waini ia isa tewa rerihoni sio rei wain ne apia tewa, ne muaine tewa. Tau sae, sio pusiso sahoro no tuamana, no numau, taue isa oahenre, oyo orori kepen waron osupure.

35 Ororire oyo, oruire osi sio maisosia na osamare osi sio wason no apia tewa, sio wason no muaio tewa.

36 Sani rei oi runa Yusup. Sio maisosia oaoiki tau Barnabas (nene nohue *Ia Sahoro Iaunau Sio Wasoni Anoo Mtinte*). Ia ne ipane Lewi. Iamrai nau nusa wani nanae Siprus.

37 Ia rei, iahen ne tuamane isa, oyo irori kepen waron isupure na iruire osi sio maisosia. Iruire na osamare osi sio wason no apia tewa, sio wason no muaio tewa.

5

Anahatana ihunu Ananias runa Safira tau sio oakarotai

¹ Ia hanaie isa wain nanai Ananias. Ia runa sahai, wain nanai Safira, uaso, oahen no tuamane otoi isa oi.

² Kepeni waron isupure rai, inana umau osi ruai, umau honu iruire osi sio maisosia. Iuna san rei, sahai ianeiki oi.

³ Reiso Petrus iasei tanui, “Ananias, sapani na atapi ia aia sakahatene inusu anom pusiki rotu-tu akarota Anahatana Ne Inaha. Tewa mo, auhuni ata anana kepen umau waron asupure tau tuamane rei?

⁴ Tuamane rei, ruam me tuamane on aheniki tewasi? Oyo aheniki ne kepen rai waron asupure rei, ano me kepen tea? Ruam apusu me maue tau kepen rai, iake. Auna kahatene rei nanie tahae? Ano akarota tumata tewa. Ne akarota Anahatana.”

⁵ Ananias iatinu tau rei, oyo iamnohoi imatai. Reiso sio pusiso wason oatinu tau rei, okaitau hunu ruao.

⁶ Reiso sio honua umau ohokaso, oyo oopa Ananias ne hatae samatoro ororiki poe manahane. Ororiki poe manahane nanie okaniki.

⁷ Oyo yam tonu reniku nea oyo, Ananias sahai ihokai. Ianei tewasi ata sahai imatai nea.

⁸ Petrus iasau osiki, “Masi asau, tuamane reimo wani oaheniki, osupu hunonie san rei sirinia?” Iahata, “E-e. Hunonie wani sani ano asau rei.”

⁹ Iahata, “Sapan na ano runa saham oheu, nanie orea Anahatana Ne Inaha? Atinu! Sio

sahoro okani saham wason ohokaso nea. Mka orori ano poe manahane oi.”

¹⁰ Mata huni oyo, iamnohoi imatai mai Petrus uai anoe. Sio honua onususo, oyo osupui imatai nea. Reiso ororiki poe manahane samatoro okaniki. Okaniki poe sahai nusui.

¹¹ Reiso sio pusiso wason oparisaa rei, runa sio tamena pusiso wason oatinu tau rei. Oatinu oyo, okaitau hunu ruao.

Sio maisosia ouna sima-simana panesi

¹² Sio panesi onoo sio maisosia ouna sima-simana waron ratuhete ata no kawasa rerihoni Anahatana panesi runa sima-simana waron raasiraso panesi. Sio pusiso wason oparisaa oamanouso anoo osa pan Salomo Ne Teune roe Anahatana ne numa mainisie.

¹³ Masike sio tamena okaitau oamanouso runa sio wason oparisaa rei, sio panesi oamuiraso.

¹⁴ Sio panesi honu oparisaa tau Yesus, oyo oamanouso runa sio wason sinasi rei. Tau sio panesi rei wason mansia hanaia runa sio pinau oi.

¹⁵ Reiso orori sio kupua roe naniao te roe no kinoa na oautueso sui arenau. Oautueso na munata Petrus ieui sui arena rei, onoi resahuso.

¹⁶ Mansia panesi ohokaso on noi niana waron haineke Yerusalem. Ohokaso orori sio kupua runa sio wason sakahatena rasuniso. Osuisene sio pusiso.

Sio onata osota sio maisosia honu

¹⁷ Ne sio imam no ia mainae runa ne mansiau oanana. Ne mansiau reimo wason rerihoni sio tikane Sadukiu.

¹⁸ Reiso osota sio maisosia. Osotaso oyo, onususos pan pui osi sio kahatena.

¹⁹ Ne nene pumono pan san rei oyo, Upuri ne maisosie on roe noiyaha isa iheka pui nene mitanunua pusire. Ihekare oyo, iautunu sio maisosia pan manahane. Anahatana ne maisosie on roe noiyaha rei iasau san rei,

²⁰ “Masi oeumo roe Anahatana ne numa mainisie, oyo oaunauso rerihoni sapani na Anahatana iapuhaiso rotu-tu ria supan.”

²¹ Reiso tau kinoke, ohokaso roe Anahatana ne numa rei, oyo oatuhete sani ia maisosie iaisosiso rei.

Sio imam no ia mainae runa ne mansiau ohokaso nanie oapisara. Reiso oanaha runa sio siniriu. Areimo sio ona Yahudi nesia pusiso, samatoro oaisosi sio umau oeu onana sio maisosia na oasei tanso.

²² Ne ohokaso poe pui, oyo osupu sio maisosia tewa nea. Osupuso tewa, reiso onunso roe sio onata, samatoro osima osiso san rei,

²³ “Ahokama poe pui, samatoro anoo ata sio okatunepa mitanunua pusire ia-ia nea. Sio mamsakaya wason osaka mitanunue. Ne aheka mitanunue rei oyo, asupu ia osa-sa pan pui anoe tewa nea. Pui rei huie nea.”

²⁴ Sio imam onata runa no ia ona polisi oatinu san rei, oyo oasei pan anoo, “Tutuso tewa. Sio rei, kaneta wason sui supa, omi?” Anoo rauponu runa mka sapan.

²⁵ Oyo ia isa ihokai iasau san rei, “Masi atinu. Sio rei, omi onususos pan pui, ne wasoro oatuhete roe Anahatana ne numa mainisie nea.”

²⁶ Reiso ia ona polisi rei runa ne mansiau oeu onana sio maisosia rei. Ne otentene tanso tewa. Tewa mo, okaitau sio panesi roe rei. Mka sio rei orauso tau hatu nanie ohunuso.

²⁷ Sio orori sio maisosia poe sio siniriu, oyo oaisosiso oo oamananeso. Oo oamananeso oyo, sio imam no ia mainae iaunauso san rei,

²⁸ “Ami asopo na pene oatuhete rerihoni ia rei nea. Ne oatuhete sui Yerusalem pusiki. Samatoro nanie oapasanama oasau ata ami ahunui.”

²⁹ Oyo Petrus runa sio maisosia tamena oasau san rei, “Anahatana mo, kahurae apusu ia naone. Apusu tumata tewa.

³⁰ Anahatana wain rea upu oainaa runai ia-puhai Yesus honu. Yesus rei, omi ohunui tau opakui roe hini wani reniene.

³¹ Ia rei, Anahatana irui muiran manetane runa kawasa mainae osiki nea na iuna Natu runa Ia wain Iapuheu ne Mansiau. Iuna san rei na sio Israel oarihoni no rosau na Anahatana isiru heure.

³² Anoo runa asima runa rai pusire. Anahatana Ne Inaha wain Anahatana iruiki osi sio wason opusu ne maunauna isima runare oi.”

³³ Sio ona siniriu oatinu tau rei, oyo anoo ranuku-nuku ranaka-naka. Reiso nanie ohunu sio maisosia rei.

³⁴ Ne ia onate isa wain nanai Gamaliel. Ia rei, ihitio roe, oyo iaisosiso orori sio maisosia onapa poe manahane mka-mka. Ia onate rei wain ia onate rerihoni akama Yahudiu. Ia wain ia matuhete Musa ne maunauna isa. Sio pusiso oamuirai.

³⁵ Reiso sio maisosia ohokaso oyo, iasau osi sio onata san rei, “Omi Israel. Ainati. Oarinii ia-ia rerihoni nanie ouna sae runa sio reini.

³⁶ Naone ia isa wain nanai Teudas ihokai iahata ruai ia mainae, nanie iatana runa kupania. Sio utun ate opusui. Ne ohunui, oyo ne mampusua orumaso sakakau, oyo ne maunauna tihonre.

³⁷ Ita tau sio wason oreken tau tumatau, ia isa wain nanai Yudas ihokai, nanie iatana runa kupania oi. Ia rei, ia rerihoni otoa Galilea. Iaunauo rotu-tu sio panesi opusui oi. Ne sio ohunu ia rei oi, oyo ne mampusua orumaso sakakau.

³⁸ Reiso muie reini mo, tau parakana rei, au we maunaune san rei. Pene ouna sae isa osiso. Sio ruao. Tau sae, munata sio no maunauna runa no taneiu rai, osupure rerihoni tumata mka tihonre.

³⁹ Ne munata Anahatana sahoru iaisosiso, omi mka otentene tanso na oarihonire tewa. Mka onoo ata omi wani oatana runa Anahatana ruai.”

Oyo sio onata oapamata sou na opusu Gamaliel ne maunaune.

⁴⁰ Reiso oanaha runa sio maisosia ohokaso honu, oyo osapuso. Osapuso oyo, osoposo na pene oatuhetesu rerihoni Yesu nea. Oyo sio onata ohokaso.

⁴¹ Reiso ohokaso oarihoni sio siniriu rei. Oeuso anoo miri-mirika. Tau sae, Anahatana iahata sio iaka, reiso itapiso ouna sinsaraso noso Yesu.

⁴² Ranie hatae isa ereeu mai poua tonu rei sui osa sio oatuhete runa osima runa Sou Iake ata Yesu wain Ia Aia wain Anahatana Ihitiki na Iapuheu ne Mansiau. Oatuhetesu pan Anahatana ne numa mainisie, oatuhetesu sui sio no numau.

6

Sio ohiti sio itu na oakahai sio maisosia

¹ Tau muie rei, sio panesi honu ouna sio mampusua sana ua-ua, sana wanu-wanu. Oyo sio Yahudiu wason oanamana sou Yunani oakarupu rerihoni sio Yahudiu wason oanamana sou Yahudi. Oahata, "Taa osama sio pina uhanu mo, osama ami ma sio pina uhanu tewa."

² Reiso sio maisosia hutusa rahana ua oanaha runa sio mampusua pusiso, oyo oasau san rei, "Mania kakau, mania waniu. Ami arihoni asima na Anahatana ne anamanaya na asama sio tau muaine, areimo iake tewa.

³ Reiso nene iake, omi oroma sio itu rerihoni omi reini. Roma sio wason oanei ata Anahatana Ne Inaha irui kawasa osiso nea. Kahurae oanei sae waron iaka, sae waron iaka tewa. Oyo ami ahitiso na onana tanei rei.

⁴ Ne ami ruama ainisi tau Anahatana runa aunauso tau Anahatana ne anamanaya."

⁵ Oatinu tau rei iake, reiso onini:

Stefanus. Ia rei, iparisaa mainae. Anahatana
Ne Inaha irui kawasa osiki.

Pilipus,

Prokhorus,

Nikanor,

Timon,

Parmenas,

Nikolaus. Ia rerihoni kota Antiokhia. Iamrai,
ia Yahudi tewasi, ne inusu Yahudi nea.

⁶ Oyo oautue ituso mai sio maisosia, oyo sio maisosia oainisi tau Anahatana runa oahusieso, nanie ohitiso tau sio makahaia.

⁷ Sio panesi honu oatinu Anahatana ne anamanaya, reiso sio mampusua sui Yerusalem

okikasi oasinena rotu-tu sio panesi honu. Sio imam panesi oi oparisaa tau Sou Iake rerihoni Yesus.

Sio ona Yahudiu osota Stefanus

⁸ Stefanus rei, Anahatana irui iake osiki. Irui kawasa osiki, reiso iuna sima-simana waron rasiraso runa sima-simana waron retuhete ata ia ne kawasa on roe Anahatana. Sio panesi onoore.

⁹ Ne sio umau nanie otuntana runai. Sio rei rerihoni numa mananouna osi sio Yahudiu wani sio oaoiki tau numa mananouna osi sio manianeu wason naone rei. Sio rei wason sio Yahudiu on pan nia Kirene runa nia Aleksandria, runa sio on poe otoa Kilikia runa otoa Asia. Reiso sio rei otuntana runai.

¹⁰ Ne okuai tewa. Tau sae, Anahatana Ne Inaha iunai ianamana ianei sae waron iaka, sae waron iaka tewa.

¹¹ Reiso oanamana oauhuni runa sio umau onana anoo. Oawaruso na osima oakarota. Oahata, "Ami atinui irati sohi Musa runa Anahatana."

¹² Reiso onana sio rei anoo, oawaruso. Oawaru sio matuhete Musa ne maunauna runa sio ona Yahudi nesia rei oi. Oyo osota Stefanus, samatoro ororiki iamanane sio siniriu.

¹³ Hoka roe oyo, osupu sio umau osima oakarota runa Stefanus. Oahata, "Ia rei, ianamana kahatene rerihoni Anahatana ne numa mainisie wani monne tau Anahatana wain tanui. Ianamana kahatene rerihoni maunauna waron Musa isupure rerihoni Anahatana oi.

¹⁴ Ami atinui. Iahata, 'Yesus mo, ia wain on pan nia Nasaret rei, mka ikuka Anahatana ne

numa rei, oyo ipesi pusi re monna rairo waron isupure arihoni Musa.’ ”

¹⁵ Sio siniriu pusiso oroui, oyo onoo uai anoe sani Anahatana ne maisosie on roe noiyaha uai anoe.

7

Stefanus iaunau sio onata

¹ Oyo sio imam no ia mainae iasei tau Stefanus, “Oasau san rei, areimo manisate te tewa?”

² Iahata, “We amau, we kakau, we waniu. Masi oatinu! Anahatana wain ne rinane wani ita-itane resita iatuhete ruai osi upuri Abraham tau ia wain iruei ria otoa Mesopotamia asi. Isuka irura niane wani nanae Haran tewasi.

³ Iasau osiki iahata, ‘Aeu arihoni me niane rei runa me enau pusiso. Aeu pan tuamane otoa isa mka uatuhetei osia.’

⁴ Reiso Abraham ieu iarihoni otoa Kasdim, oyo isuka irura Haran. Iruei ria Haran rotu-tu amai imatai. Amai imatai oyo, Anahatana iaisosiki isuka mai tuamane reini, ita wani irueta tanui.

⁵ Ne Anahatana irui tuamane otoa osi Abraham ruai tewa. Tuamane mkane iae, iruiki tewa. Ne Anahatana iahata, ‘Mka urui tuamane rei pusiki osi ano runa mea upu.’ Iasau san rei, masike ne hehuka tewasi oi.

⁶ Ne Anahatana iasau osiki ata, ‘Me upu mka orueso sani sio rakana tau sio umau no tuamane. Sio wason no tuamane rei, mka onanaso tau maniane uo oyo onanaso resunso rotu-tu musum utun ate.

⁷ Ne Au mo, mka uapasana sio rakana rei wason onanaso tau maniane. Oyo me upu rei oeu oarihon sio wason no tuamane reipa, oyo

oainaa runa Au mai tuamane reini. Sio mka oainisi oainaa runa Au san rei, "Anahatana, ano iake nai osa. Ano arorima anunima mai tuamane rei honu. Reiso Ano iake tunne nai osa."'

⁸ Itotoe san rei oyo, iaunutu akakinae. Tau akakinae rei, kahurae orehi nea upu pusiso. Orehisio na sio pusiso oanei ata oamanaku opusu sae wani Anahatana itotoe rei. Reiso Isak, Abraham anai, iamrai poe, oyo onona wanu oyo, orehiki. Ita Isak irehi anai Yakup oi. Ita Yakup ne hehuka, sio hutusa rahana ua. Sio rei wason rea upu mataanoë.

⁹ Re upu mataanoë rei, sio osaturuu oanana no wani Yusup, reiso oaheniki na iuna maniane pan otoi Mesir. Ne Anahatana iakahaiki.

¹⁰ Inana ne susau pusire rerihoniki. Iuna ia natu Mesir iahata ne hali iake. Tea mo, Anahatana iunai ianei sae waron iaka, sae waron iaka tewa. Iasau pusire iake. Reiso ia natu rei, ihitiki tau mansia mainae. Irui kawasa osiki na isaka Mesir runa ne numau pusire.

¹¹ Oyo pan Mesir runa otoi Kanaan pusire, osupu muaine tewa nea. Reiso resunso panesi. Rea upu osupu muaine tewa nea.

¹² Yakup iatinu ata pan Mesir muaina waropa. Reiso iaisosi ne hehuka, rea upu rei, oeu pan mataanoë.

¹³ Ita oeu honu, samatoro Yusup isima runa ruai osi nea kakau ata ia mo, ia Yusup. Oyo ia natu Mesir rei mato ianei rerihoni Yusup nea enau.

¹⁴ Oyo Yusup iaisosiso oeu oanaha runa amai Yakup runa ne enau pusiso na osuka orura Mesir. Sio pusiso sio hutu itu rahana nima.

¹⁵ Reiso Yakup sio osuka orura Mesir. Orurueso pan rei rotu-tu Yakup runa rea upu pusiso omataso pan Mesir.

¹⁶ Oyo tau muie orori no hataya poe nia Sikhem honu, oyo okanso poe hatu nohue wan naone Abraham ihanei arihoni Hemor ne ipane poe Sikhem. Isenui tau kepen.

¹⁷ Haineke nea Anahatana nanie irui sae wani itotoe osi Abraham. Rea upu okikasi oasinena pan Mesir nea.

¹⁸ Oyo ohiti ia natu honue na iuna natu pan Mesir. Ia rei, iationa Yusup tewa.

¹⁹ Iakarota rea upu. Iuna mtinte tanso. Itentene tanso na opesi sio ikina wason mato oamrai mai tuniai. Opesiso pan manahane na omataso.

²⁰ Tau muie rei, Musa iamrai. Ia ikine rei ia iake tunne nai osa. Inai runa amai opakananai pan no numa hunana tonu,

²¹ oyo oahuniki. Oahuniki oyo, ia natu rei anai pina isupui, oyo ihetei roe. Ihetei roe oyo, ipakananai sani ia ruai anai.

²² Oatuhete Musa tau pusire waron sio Mesir oaneire reiso ianei sae waron iaka, sae waron iaka tewa. Isupu kawasa na ianamana iake runa iuna pusire iake.

²³ Musa ne musum hutu ate oyo, iapamata sou pan anoi, nanie inoo ne mansiau, sio Israel.

²⁴ Hoka poe oyo, inoo ia Mesir isa iuna resuni-suni ia Israel isa, reiso ineti. Ihita hunu ia Mesir rei.

²⁵ Iahata ne mansiau oanei ata Anahatana wain iaisosiki na ialapasiso. Ne oanei tewa.

²⁶ Ita hanroe honu inoo sio Israel ua oatanaso. Inina na osota hanao na ohunu nisa, reiso iasau, 'Omi mo, omi kaka wani. Omi oatanamo, nanie tahae?'

²⁷ Ne ia wain ihita ne neta iruru Musa hae nusui, oyo iasei, 'Ia seia ihiti ano na aisosima? Ia seia ihitia na arimema na apasanama?'

²⁸ Ano nanie ahunu au oi sani potusi ahunu ia Mesir rei?'

²⁹ Musa iatinu tau rei, oyo irumai arihoni Mesir. Irumai rotu-tu ihokai pan otoa Midian. Hoka pan oyo, iausahai pan rei. Ne hehuka, sio ua.

³⁰ Musum hutu ate oyo, Anahatana ne maisosie on roe noiya iatuhete ruai osiki pan otoa huie haineke tinetae wani nanae Sinai. Ia maisosie rei, iatuhete ruai osiki pan ai hutue, wani nooi sani usa reai tanui.

³¹ Musa inoo ai rei, oyo isira. Reiso ihainekei, nanie inooi ia-ia. Oyo iatinu Upuri nioi. Iahata,

³² 'Au wani Anahatana tau me upu. Au Anahatana wan Abraham, Isak, na Yakup oainaa nnaku.' Musa ikaitau hunu ruai, reiso ikana-kananunui. Ikaitau reiso ipenei inoo ai rei nea.

³³ Oyo Anahatana iasau honu, 'Nosu me sandaliu rai. Tuamane rei, ano wani aheta tanui, monne. Tau sae, Au wan tanui.

³⁴ Unoo nea sapan na sio Mesir ouna mtinte tau we mansiau. Uanei nea sapan na resunso. Reiso ukaisunu nea nanie ualapasiso. Reiso mai. Au wan uaisosia anunia poe Mesir.'

³⁵ Musa reini mo, sio Israel openeso tanui, reiso oasau san rei, 'Ia seia ihiti ano na arimema. Ia seia ihitia na apasanama?' Aikee Anahatana

iaisosiki na iautunu sio Israel na iapuheuso. Anahatana ne maisosie on roe noiyaha wain iatuhete ruai osiki pan ai hutue wan usa reai tanui rei iakahaiki.

³⁶ Musa reini mo, iautunu sio Israel ohokaso oarihoni Mesir tau iuna sima-simana waron rasiraso runa sima-simana waron retuhetesos ata ne kawasa on roe Anahatana. Iuna sima-simana rai pan Mesir, nau Nua Msinae, pan otoi huie rotutu musum hutu ate.

³⁷ Musa reini sahoro iasau osi sio Israel, 'Anahatana mka iaisosi ia mamsima ne anamanaya osimo rerihoni ruamo mo mansiau. Ia rei, sani au. Mka iapuheumo na oamahaimo rotutu ria supan.'

³⁸ Musa reini mo, iautunu sio Israel tau sio wason oeu ohoi pan otoi huie. Anahatana ne maisosie on roe noiyaha ianamana osiki roe tinetae wani nanae Sinai, oyo Musa iatuhete ne anamanaya rai osi rea upu. Isupu Anahatana ne maunauna waron rakawana oyo iatuhetere osi ita oi.

³⁹ Ne re upu openeso oatinu tau Musa. Openeso tanui, nanie onunso pan Mesir man.

⁴⁰ Reiso oasau osi Harun, 'Nana siaie na ami ainaa runai na rekata runama. Tea mo, Musa wain iautunuma arihoni Mesir wain sui supa nea?'

⁴¹ Reiso tau muie rei onana anahatana wani titue tewa isa. Nitae sani koropou anae nene siaie. Onanai oyo, ohunu makapanau, nanie oainaa runa siaie rei. Oyo anoo mirika onoo sae wani sio ruao onanai, reiso ouna karisaa.

⁴² Reiso Anahatana ipenei tanso. Ieu iarihonso na oainisi oainaa runa oneu roe nante sani

naone ia mamsima runa Anahatana ne anamanaya wain nanai Amos ikanu tau ne surate. Ikanu sani Anahatana ianamana san rei,
'He omi Israel! Tau omi wani pan otoi huie rotu-tu musum hutu ate rai
omi orehi makapanau osi au tewa.

⁴³ Ne omi onana oyo orori-rori Molok nene naniae
runa one wani nanae Repan nene siaie.*

Uare, omi onanare runa oainisi oainaa runare.
Reiso mka uanenamo hainau pan nia Babel pan hae.'

⁴⁴ Tau rea upu wason pan otoi huie rei, orori numa unte wani Anahatana iasau ata iruei tanui. Numa unte rei, onanai sani Anahatana iaisosiso osi Musa. Ounai opusu siaie wani Anahatana iatuhetei osi Musa.

⁴⁵ Oyo tau muie honu, rea upu runa Yosua orori numa unte rei rotu-tu mai tuamane reini. Ororiki mai tau sio wason onana tuamane rei rerihoni sio niana. Anahatana waininei sio niana rai oanaoneso. Numa unte rei wani mai rei rotu-tu aia Daud ne naene.

⁴⁶ Anahatana anoi iake tau Daud, reiso iainisi nanie inana numa osi Anahatana wain Yakup iainaa runai.

⁴⁷ Ne anai Salomo wain ikatiki tau aia sahoro inana numa rei osiki.

⁴⁸ Ne Anahatana ia wain mainae onate iruei tau numa wan tumata inanai tewa. Naone ia mamsima runa Anahatana ne anamanaya wain nanai Yesaya isupu anamanae isa rerihoni Anahatana san rei,

* **7:43 7:43** Molok runa Repan waron sio rakana anahatanau waron titue tewa.

49 'Au una natu on roe noiyaha.

Au una natu osi sio pusiso poe tuniai.

Ano nanie auna numa nitae sae osiku?

Naniaku uaranahaku wani sui supa?

50 Au ruaku mo, uhaye tau pusire uture, tea?'

51 Omi mo, unumo onata. Omi sani sio wason oationa Anahatana tewa. Openemo oatinu tau Anahatana. Omi sani moa upu oatana runa Anahatana Ne Inaha sui osa.

52 Moa upu ouna sinsara sio mamsima runa Anahatana ne maunauna pusiso. Ohunu sio wason osima ata mka pan muie ia wain anoi manisate nai osa ihokai. Muie reini mo omi mato oruiki osi sio ohunui.

53 Sio maisosia on roe noiyaha orui Anahatana ne maunauna osimo nea. Ne omi reini mo openemo opusure."

Sio orau Stefanus tau hatu nanie ohunui

54 Sio siniriu oatinu Stefanus iasau ata unuo onata na ohunu sio mamsima runa Anahatana ne maunauna, oyo anoo ranuku-nuku ranakana.

55 Ne Stefanus isupu kawasa rerihoni Anahatana Ne Inaha, oyo iamrou roe nante. Iamrou roe nante oyo, inoo Anahatana ne rinane wani ita-itane resita. Inoo Yesus wain ioo hae Anahatana hanai wanane. Naniai rei nene nohue ia ne kawasa.

56 Iahata, "Masi onoo! Unoo noiyaha rehekai. Ia Tumata Rei, Anahatana Ihitiki wain ioo hae Anahatana hanai wanane."

57 Sio onata rei onopa tinao ukuna. Oakapona na pene oatinu Stefanus ianamana rerihoni

Yesus san rei. Oyo pusiso oruma oamanouso mai Stefanus.

⁵⁸ Onesai hae kota nene muie. Onesai rerihoni kota rei oyo, orau tau hatu nanie ohunui. Sio wason osima oakarota rei nanie orau, reiso oautue no papita osa-osa osi ia honue wain nanai Saulus.

⁵⁹ Tau sio wason orau-raui, Stefanus iainisi tau Yesus san rei, “Upuku Yesus, atarima we inaha.”

⁶⁰ Oyo irike tune. Irike tune oyo, iakapona nioi mainae, “Upuku, asiru heu sio no rosa rei!” Iasau san rei, oyo imatai.

8

¹ Ohunui, oyo Saulus anoi iake.

Saulus iuna sio wason oparisaa sinsaraso

Ranie hatae rei oimo sio ouna sio wason oparisaa roe Yerusalem sinsaraso mainae nai osa. Reiso sio wason oparisaa rei oruma pusiso. Orumaso sui otoa Yudea runa otoa Samaria pusire. Hasae sio maisosia saoro oruma tewa.

² Sio umau wason ouna-una sae waron Anahatana ne suka okani Stefanus orani anoo rapunoko ruao.

³ Ne Saulus mo iuna rea sio wason oparisaa rei tihoniso. Ithori no numau pusire inesa sio pinau, sio hanaia pusiso pan manahane, oyo inususo pan pui anoe.

Pilipus iaunauso poe Samaria

⁴ Sio wason oparisaa orumaso oyo, osima na Sou Iake rerihoni Yesus sui supan-supan.

⁵ Pilipus ieui poe niane isa poe Samaria, oyo isima na Ia Aia wain Anahatana Ihitiki na Iapuheu ne Mansiau.

⁶ Sio oatinu Pilipus ianamana, onooi iuna sima-simana, sio panesi oatinui ia-ia.

⁷ Tau sae, sakahatena panesi rahoka rerihoni sio panesi nea. Sio reimo oakapona, oyo sakahatena rahoka rerihoniso. Isuisene sio wason otalaso runa sio panesi wason oeu seu-seu oi.

⁸ Reiso sio poe niane rei anoo mirika nai osa.

Simon wain ne kawasa rerihoni ia aia sakahatene

⁹ Poe niane rei wain ia isa nanai Simon. Sio pusiso poe Samaria osira potuina nea tau ne kawasa rerihoni ia aia sakahatene. Iasau osiso iahata, "Au mo, au mansia mainae."

¹⁰ Sio mainaya, sio ikina, pusiso sui niane rei oatinui ia-ia. Oahata, "Ia reimo, isupu Anahatana ne kawasa wain sio oaoiki tau 'Kawasa Mainae.' "

¹¹ Potuina nea osira tau ia ne kawasa, reiso oatinui ia-ia.

¹² Ne Pilipus isima na Sou Iake rerihoni Anahatana irime ne mansiau. Iaunauso rerihoni Yesus, Ia Aia wain Anahatana Ihitiki na Iapuheu ne Mansiau. Oparisaa tau Pilipus ne maunauna rai, oyo isohuso na mansiau oanei ata oarihoni no rosau nea. Isohu sio hanaia, sio pinau pusiso.

¹³ Simon oi iparisaa. Sio osohui, oyo ieu ikatakata Pilipus. Isira tau inoo Pilipus iuna sima-simana runa sima-simana waron retuheteso ata ne kawasa on roe Anahatana.

¹⁴ Sio maisosia roe kota Yerusalem oatinu ata sio Samariau oparisaa tau Anahatana ne

anamanaya nea, oyo oaisosi Petrus runa Yohanis uaso oeu poe tanso.

¹⁵ Hoka poe oyo, uaso oainisi na sio Samariau rei osupu Anahatana Ne Inaha.

¹⁶ Tau sae, Anahatana Ne Inaha isipu inusui tanso tewasi. Hasae sio osohuso na mansiau oanei ata oarihoni no rosau nea on oparisaa tau Upuri Yesus.

¹⁷ Reiso uaso oahusieso, oyo sio rei osupu Anahatana Ne Inaha.

¹⁸ Simon inoo ata Anahatana irui Ne Inaha osiso pusu sio maisosia oahusieso, reiso irori kepen osiso.

¹⁹ Iahata, “Rui kawasa reini mo osi au oi, na uahusieso oi, oyo osupu Anahatana Ne Inaha.”

²⁰ Ne Petrus on poe iasau, “Masi amataya arihoni tuniai reini runa me kepen raino. Ano ata mka asenu tau kepen, oyo auna Anahatana Ne Inaha ihokai tanso?

²¹ Ano me kawasa tewa na apusu tau ami mani tanei rei. Anom katopue tewa tau Anahatana matai usena.

²² Pene ainisi san rei ne arihoni me kahatene rei runa ainisi tau Anahatana na iuna heu me kahatene rei.

²³ Tau sae, au mo, uanei ata ano asaturuu anana nai osa. Ano me rosau rahehea.”

²⁴ Iahata, “Masi oainisi tau Upuri osiku na pene sae isa ereeu sani omi oasau rei.”

²⁵ Sio osima na sae wani oaneiki rerihoni Yesus runa oaunauso tau Upuri ne anamanaya, oyo onunso roe Yerusalem honu. Sui arena osima runa Sou Iake rerihoni Yesus sui niana-niana panesi sui Samaria.

*Pilipus iaunau ia mainae isa on pan otoa
Etiopia*

²⁶ Upuri ne maisosie isa on roe noiyaha iasau osi Pilipus san rei, “Masi aeu pan na apusu arena on mai kota Yerusalem rotu-tu rehokai nau nia Gasa. Arena rei wapan otoa huie.”

²⁷ Reiso ieu. Hoka poe arena tihue rei oyo, isupu ia mansia mainae on pan otoa Etiopia isa. Ia rei isaka Kandake ne kepen. Kandake wain ia aia Etiopia. Ia reimo, ia pina. Ia ne ia mansia mainae rei mato ieu roe Yerusalem nanie iainisi iainaa runa Anahatana.

²⁸ Waini inuniki iru-ruei pan kareta anoe wani nene numa koropou renesai. Waini inoo Yesaya, ia mamsima runa Anahatana ne anamanaya isa, ne surate.

²⁹ Oyo Anahatana Ne Inaha iasau osi Pilipus, “Masi aeu ahaineke kareta reinau.”

³⁰ Reiso iruma haineke kareta rei oyo, iatinu ia mainae rei ihatae rerihoni Yesaya ne surate. Pilipus iasei tanui, “Upu. Ahatae surate rei, anei nene nohue te tewa?”

³¹ Ihata, “Sapan na uaneiki? Ia isa iatuheteku tewasi!” Oyo ianaha runa Pilipus na isaa roe tanui na irue ikatai pan kareta anoe rei.

³² Ia wain inoo mamrunie reini rerihoni Anahatana ne anamanaya,

“Ia mo sani rompa wani onesai na ohunui.

Ia mo sani rompa anae wani oatori nene hunua.

Iasau sae isa tewa. Anamanae isa iae iasau i tewa.

³³ Orati osohiki ne ia isa ineti tewa.

Imatai iarihoni tuniai reini,

reiso ia seia mka iruni rerihoni nea upu?”

³⁴ Ia mainae rei iasei tau Pilipus san rei, “Masi asau poe, ia wain iruni reini mo, ianamana rerihoni rompa rei, ia seia? Ianamana rerihoni ruai te ianamana rerihoni ia isa honu?”

³⁵ Reiso Pilipus isima na Sou Iake rerihoni Yesus. Inana mamrunie rei sani aikune nanie isima na Sou Iake.

³⁶ Sio wason pan arena tihue, oyo osupu waene. Reiso ia mainae iasau, “Masi anoo waene reipo. Nesi sae asi na asohuku na mansiau oanei ata uarihoni we rosau nea?”

³⁷ Iahata, “Munata aparisaa runa anom pusiki, au mka usohua.”

Iahata, “Uparisaa ata Yesus Kristus wain Anahatana anai.”

³⁸ Oyo iaisosi kareta rei retaehe samatoro uaso osipuso on roe kareta rei. Osipuso oyo, oeuso poe waene rei. Hoka poe oyo, Pilipus isohui.

³⁹ Ohokaso on poe waene rei, oyo Upuri Ne Inaha inana Pilipus iarihoniki. Ia mainae rei inooi tewa nea. Oyo ieui honu anoi mirike.

⁴⁰ Mata huni oyo, Pilipus wain poe nia Asdod nea. Oyo ieu ihori niana-niana isima na Sou Iake rerihoni Yesus rotu-tu ihokai poe nia Kaisarea.

9

Saulus iparisaa tau Yesus

¹ Ne Saulus inehu iawana iahata nanie ihunu Upuri ne mampusua, reiso ieui roe sio imam no ia mainae.

² Ieui roe ia imam onate rei, nanie iainisi surate na isupu kawasa na ieui pan kota Damsyik pan sio onata tau numa manouna osi sio Yahudiu pan rei. Nanie isupu kawasa na munata isupu

sio wason oparisaa tau Yesus, sio pinau te sio hanaia pusiso, ia mka inotaso, oyo iroriso roe Yerusalem. Isupu surate rei, oyo ieui.

³ Reiso Saulus ieui pan Damsyik. Hoka pan haineke nea oyo, mata huni oyo, ita-itane wani rinane on roe noiyaha resita-sita sani isoe ere-hori Saulus.

⁴ Ita-itane eresita oyo, iamnahui poe tuamane, oyo iatinu ia isa nioi iasau osiki san rei, "Saulus, Saulus! Ano mo nanie auna sinsaraku, nanie tahae?"

⁵ Saulus on poe iasei honu, "Upu, ano mo ano seia rei?"

Iahata, "Au reini mo, au Yesus ano wani auna sinsaraku. Auna we mampusua sinsaraso, areimo sani auna au ruaku sinsaraku.

⁶ Ne hanu nea, oyo aeua poe kota rei. Hoka poe oyo, ano mka atinu rerihoni kahurae auna sae."

⁷ Sio wason okata Saulus rei osira, reiso nioo tewa. Oasau sae isa tewa. Oatinu nioke rei, ne onoo ia isa tewa.

⁸ Oyo Saulus ihitio roe, iheka matai usena, ne inoo sae isa tewa nea. Matai usena raputiso. Reiso sio orime tau hanai samatoro oeu oautunui poe Damsyik.

⁹ Inoo mosa tewa runa iai sae isa tewa, ininu sae isa tewa rotu-tu onona tonu.

¹⁰ Poe Damsyik wain ia mampusue isa nanai Ananias. Upuri ianamana osiki tau masasua nea. Iahata, "Ananias!"

Iahata, "Upu, au reini."

¹¹ Iahata, "Ananias, masi aeua pan Yudas ne numa, pan arena wani sio oaoiki tau Arena

Katopue. Asei tanso rerihoni ia isa wain nanai Saulus. Saulus rei iamrai pan nia Tarsus. Waini iainisi tau au.

¹² Ia mo, inoo masasua nea. Inoo ia isa wain nanai Ananias ihokai tanui, oyo iahusiei na inoo honu.”

¹³ Iahata, “Upu, au mo, uatinu sio panesi oruni-runi nea runa sapani na iuna ano me mansiau roe kota Yerusalem sinsaraso.

¹⁴ Muie reini mo ihokai mai runa kawasa rerihoni sio imam onata na isota sio pusiso wason oainisi na ano akahaiso.”

¹⁵ Ne Upuri iasau san rei, “Masi aeua. Au mo, unini ia rei nea na ianori runaku. Mka isima runa au osi sio wason oationa Anahatana tewa, osi sio no aiau, runa sio Israel oi.

¹⁶ Au mo, mka uatuhetei sapani na kahurae sinsarai tau iparisaa tau au.”

¹⁷ Reiso Ananias ieui pan numa rei. Hoka pan oyo, iahusie Saulus, oyo iasau, “Waniku Saulus, Upuri Yesus wain anooi kua arena tihue rei tau ano wani ahokaya mai, iaisosiku ueuku mai na anoo honu. Mka asupu kawasa rerihoni Anahatana Ne Inaha.”

¹⁸ Oyo sae isa, nooi sani ika unaya, rarenu rerihoni matai usena, oyo inoo iake honu. Inoo iake, reiso ihanui, oyo osohui na mansiau oanei ata iarihoni ne rosau nea.

¹⁹ Osohui oyo, Saulus iaiki, oyo iamkona honu.

Saulus iaunauso pan kota Damsyik, oyo roe kota Yerusalem

Saulus iararane ikata sio mampusua pan kota Damsyik rotu-tu onona inasa rai.

²⁰ Ananias isohu heu Saulus ne rosau oyo, mata huni oyo, Saulus ieu iaunauso sui numa manouna osi sio Yahudiu isima iahata, “Yesus mo, ia wain Anahatana anai.”

²¹ Sio pusiso osira oatinu tau Saulus. Oasei tau umau san rei, “Ia reini sahoro ihunu sio pusiso wason oparisaa tau Yesus roe Yerusalem, tea? Ihokai mai, nanie isota sio wason oparisaa, oyo iroriso roe sio imam onata, tea?”

²² Saulus iaunauso iake, reiso sio wason oparisaa rei okikasi oasinena sui osa. Iaunauso rei iahata, “Yesus mo, Ia Aia wain Anahatana Ihitiki na Iapuheu ne Mansiau.” Iaunauso rotutu sio oanei tewa nea otuntana runai sapan.

²³ Onona inasa rai oyo, sio Yahudiu orue oheu nanie ohunu Saulus.

²⁴ Ne Saulus iatinu rerihoni kaheute rei. Osaka-saka kota rei nene mitanunua pusire onone ranie nanie ohunui.

²⁵ Ne taue isa tau pumono, Saulus ne mampusua onanai, oyo oratiki tau pakune on roe, sui kota nene pakelo tinaie.

²⁶ Oyo Saulus ieu roe Yerusalem. Hoka roe oyo, nanie iamanou tau osa runa Yesus ne mampusua. Ne okaitau. Oparisaa tewa ata manisate ia wain ia mampusue nea. Oahata iakarota man.

²⁷ Oyo Barnabas ihokai noi tanui, oyo iautunui pan sio maisosia. Barnabas iruni osiso runa sapani na Saulus inoo Upuri kua arena tihue. Iruni runa sapani na Upuri ianamana osiki. Isima osiso runa sapani na Saulus iatuheteso rerihoni Yesus poe Damsyik. Iatuheteso ikaitau tewa.

²⁸ Reiso Saulus iruei ikataso. Iaunauso reri-honi Upuri sui Yerusalem pusiki. Ikaitau tewa.

²⁹ Ianamana iawaru oi runa sio Yahudiu wason oanamana sou Yunani, ne sio onina rea, nanie ohunui.

³⁰ Sio wason oparisaa oatinu tau rei, reiso sio oautunu Saulus nau nia Kaisarea, oyo oaisosiki ieui pan nia Tarsus.

³¹ Oyo sio wason oparisaa rei sui otoa Yudea, otoa Galilea, runa otoa Samaria sinsaraso tewa nea. Anahatana Ne Inaha iakahaiso reiso okikasi oasinena. Oparisaa ia-ia. No hali oamaira Upuri.

Petrus isuisene Eneas runa Dorkas

³² Petrus ieu ihori iaunau Anahatana ne mansiau sui supan-supan man. Taue isa ieui nau nia Lida, nanie inoo Anahatana ne mansiau nau niane rei.

³³ Hoka nau oyo, isupu ia hanaie isa wain nanai Eneas. Ia rei ia wain italai. Musum wanu nea inekei man. Ihanu kua tewa nea.

³⁴ Reiso Petrus iasau osiki, "Eneas, Yesus Kristus wain isuisenea nea. Hanu roe. Autotu naniem reino." Mata huni tewa oyo, ihanui.

³⁵ Sio pusiso nau Lida runa otoa Saron onoo Eneas, oyo pusiso oparisaa tau Upuri.

³⁶ Nau nia Yope wain ia pina isa nanai Tabita. Ia pina rei, iparisaa tau Yesus. (Tau sou Yunani, Tabita nene nohue Dorkas, nene nohue maiyanane.) Ia iuna-una iake runa iaka-kahai sio mosokinia.

³⁷ Tau muie rei ikupui, oyo imatai. Imatai oyo, sio osohu tinain, oyo oautuei roe kakaranae roe naue.

³⁸ Yope runa Lida waron haineke umau. Reiso sio mampusua nau Yope oatinu ata Petrus waira

Lida, oyo oaisosi sio ua oeuso ria tanui. Hoka ria oyo, oasau osiki san rei, “Masi aeua sansana nau.”

³⁹ Reiso Petrus ihitioi roe, oyo ieu ipususo. Hoka nau oyo, oautunui roe kakaranae rei. Sio pina uhanu wason oo ohoriki orani, oyo oatuhete papita runa apia tamena osiki. Apia rai, Dorkas ihonire on wain iamahaiki asi.

⁴⁰ Oyo Petrus iaisosi sio pusiso ohokaso, oyo irike tune nanie iainisi tau Anahatana. Iainisi tau Anahatana oyo, iuniki inoo ia matane rei, iahata, “Tabita, hanu roe!” Oyo Dorkas iheka matai usena inoo Petrus. Inooi oyo, ihanui iruruei.

⁴¹ Oyo Petrus isopa hanai osiki irime ihitioi roe. Ihitioi roe oyo, Petrus ianaha runa sio pina uhanu runa sio pusiso wason oparisaa rei, oyo iatuhete ia pina onate rei osiso. Waini iamahaiki honu.

⁴² Sio panesi sui Yope pusiki oatinu tau rei, reiso sio panesi oparisaa tau Upuri Yesus.

⁴³ Petrus iruei potuina nau Yope. Iruei tau Simon ne numa. Simon mo, ia ne tanei tau makapana unte.

10

Kornelius runa Petrus onoo masasuau

¹ Poe nia Kaisarea wain ia hanaie isa nanai Kornelius. Ia wain ia kapitane tau sio soratatua utun. Oaoi ne tikane tau, “Tikane Italia.”

² Iamuiira Anahatana. Ia runa ne numa pusiso oainaa runa Anahatana. Iamanane iaka-kahai sio Yahudiu wason omosokiniso. Isaka iainisi tau Anahatana.

³ Taue isa, tau ranie manne inoo masasua. Inooi manisate. Inoo ia maisosie on roe Anahatana isa ihokai, oyo ioiki. Iahata, "Kornelius!"

⁴ Kornelius inoo ia maisosie rei, ikaitau, oyo iasei, "Sae rei, upu?"

Iahata, "Anahatana iatinu tau me mainisie iake nea. Inoo ata ano amanane asama sio mosokinia. Reiso anoi repeka runaya.

⁵ Reiso aisosi ia isa na ieui pan niane wani nanae Yope na anaha runa Simon. Nanai naue Simon Petrus.

⁶ Ia wain iararane pan Simon ne numa. Simon rei, ia ne tanei tau makapana unta. Iruei nau nuae nusue."

⁷ Ia maisosie rei ianamana runa Kornelius suka, oyo ieui. Ieui oyo, Kornelius ianaha runa ne makahaia ua runa ia tantara isa. Ia tantara rei iai-ainaa runa Anahatana.

⁸ Kornelius iruni osiso runa ne masasua rei, oyo iaisosiso oeuso pan Yope.

⁹ Hanroe oyo, sio wason oeuso pan Yope asi. Wasoni haineke nea. Oyo Petrus isaa roe numa hahae tau ranie katopu, nanie iainisi tau Anahatana.

¹⁰ Oyo imakaneai mainae, nanie iaiki. Sio wason oatanunu osiki, oyo inoo masasua san rei.

¹¹ Inoo nante rehekai, oyo sae isa nooi sani nipa hekan, sio oratiki. Nooi sani sio oakatanai tau nene susua ate.

¹² Pani nipa anoe isupu makapanau nene ai atua ate nitaya pusire, sae waron rausu te raeu nene tiaya rahanunu pusu tuamane nitaya pusire. Isupu manu seaya oi.

¹³ Oyo iatinu nioke isa reasau san rei, "Petrus, hanu roe. Hunure na aire."

¹⁴ Petrus on poe iasau, “Upu, au upeneku! Au mo, uai muaine wani repaputiki te monne isa tewasi.”

¹⁵ Iahata, “Pene asau ata sae wani Anahatana iasau ata ano aiki iake, pene asau ata monne.”

¹⁶ Sani rei nai tonu oyo, Anahatana iapusaa nipae rei roe noiyaha honu.

¹⁷ Petrus iasei pan anoi, “Masasua rei, Anahatana nanie iasau sae osiku pusui?” Waini iarinii asi, oyo sio maisosia on poe Kornelius osupu ne numa. Oasei tau sio umau rotu-tu osupui. Sio wason oooso poe mitanunue nea.

¹⁸ Sio ooi, oyo oasei, “Waini ia isa iararane mai numa reini nanai Simon Petrus?”

¹⁹ Petrus wain iarinii ne masasua rei asi, oyo Anahatana Ne Inaha iasau osiki, “Ee, Petrus. Sio tonu wasopo oninaya.

²⁰ Hitio! Sipu poe! Aeu akataso iake. Pene arinii ata kani apusu ia wain ia Yahudi tewa, apusui iake te tewa. Au sahoro uaisosiso.”

²¹ Reiso Petrus isipui poe, oyo iasau osiso san rei, “Au reini mo sahoro omi wani oninaku. Ohokamo mai, onina au nanie tahae?”

²² Iahata, “Kornelius, ia kapitane, iaisosima mai. Ia mo, anoi manisate. Iamuirā Anahatana. Reiso sio Yahudiu pusiso oamuirai mainae. Anahatana ne maisosie on roe noiyaha wain ia manisate onate isa iaisosiki na iainisi ata ano aewa pan ne numa na iatinu tau me maunaune.”

²³ Reiso Petrus iaisosiso san rei, “Mai, onusu mai. Oararanemo mai numa reini mkane.”

Petrus ieu poe Kornelius ne numa

Hanu roe oyo, Petrus ihanui, oyo ieu ikata sio on poe Kornelius ne numa. Sio umau wason oparisaa tau Yesus pan nia Yope rei oeu okatai oi.

²⁴ Oyo nene hanu roe honu samatoro ohokaso poe nia Kaisarea. Poe rei Kornelius waipo inapapaso ikata ne mansiau runa ne netau iaka wason ianaha runaso nea.

²⁵ Hoka poe oyo, Petrus inusui pan ne numa. Oyo Kornelius ieu iatapei, oyo iamnohoi mai Petrus uai anoe iamuirai.

²⁶ Ne Petrus ihetui ihitioi roe, oyo iasau, “Hitio roe! Au reini mo, au tumata oi sani ano rei tea?”

²⁷ Petrus wain ianamana asi, oyo inusui pan kakaranae isa. Oyo inoo ata sio panesi oamanouso nea.

²⁸ Oyo iasau osiso, “Wea amau, wea kakau, wea waniu. Omi ruamo oanei nea ata ami Yahudiu mani monne resopo na pene anusu ia tamene ne numa te pene akata ia tamene. Ne Anahatana iatuheteku nea ata au uahata ia sia man iapaputiki te monne. Uahata san rei, areimo iake tewa.

²⁹ Reiso ano anaha runaku, uhokaku mai. Uasau tea ata, ‘Upeneku.’ Reiso nanie uanei nea. Anaha runaku, nanie tahae?”

³⁰ Iahata, “Kakaku Petrus. Onnaha tonusi, ranie san rei, au wani uainisi tau Anahatana mai numa tau ranie manne. Mata huni oyo, ia hanaie isa wain ioo mai uaku anoe. Ia rei, ne papite rekino-kinoi.

³¹ Iahata, ‘Kornelius! Anahatana iatinu me mainisie nea. Anoi repeka ata ano amanane asama sio mosokinia.

³² Reiso aisosi ia isa ieui pan Yope na anaha runa ia isa wain nanai Simon Petrus na ihokai mai iaunaumo. Waini iararane pan ia isa ne numa. Ia rei ne tanei tau makapana unta. Nanai Simon. Ne numa wanau nuae nusue.

³³ Reiso uaisosiso sansana na oanaha runaya. Anom mo, anom iake mainae ahokaya mai. Muie reini mo, amanouma mai rei na atinu pusire waron Anahatana iaisosia asau osima. Anahatana wain mai rei ikata ita oi.' "

³⁴ Reiso Petrus iaunauso san rei, "Wea amau, wea kakau, wea waniu. Muie reini mo, au mato uanei ia-ia ata Anahatana irui osa osi pusita.

³⁵ Anahatana iatarima ia seia man, rerihoni niane sae man. Hete sae, iamuirai runa iuna sae wani manisate.

³⁶ Omi oanei nea. Oanei maunauna waron Anahatana iruire osi ami Israel. Maunauna rai rasima na Sou Iake rerihoni sapani na Yesus Kristus imatai, oyo ihunu re nisa runa Anahatana. Yesus rei mo, ia Upuri wain irime sio tuniai reini pusiso.

³⁷ Oanei iuna sae. Mataanoë iuna ria otoa Galilea oyo sui otoa Yudea pusiki. Yohanis iaunauso na oarihoni no rosau oyo isohuso na mansiau oanei ata oarihoni no rosau nea, oyo Sou Iake rerihoni Yesus nene aikune ria otoa Galilea.

³⁸ Oanei nea ata Anahatana ihiti Yesus, ia Nasaret rei nea. Oanei ata irui Ne Inaha osiki reiso isupu kawasa. Ieu ihori sui supan-supan iuna iake. Isuisene sio pusiso wason ia aia sakahatene iakarotaso. Tau sae, Anahatana ikata runai.

³⁹ Ami ruama anoo ne atata pusire pan kota

Yerusalem runa ami Yahudiu mani tuamane pusiki. Ne sio opakui roe hini wani reniene reiso ohunui.

⁴⁰ Ne nene pouarei oyo, Anahatana iapuhaiki honu rerihoni sio matana, oyo iatuhetei osi sio umau na onooi.

⁴¹ Sio pusiso onooi tewa. Hasae ami wani Anahatana ininima naone sahoro anooi. Asima osi sio pusiso. Aima akatai on iamahaiki honu rerihoni sio matana.

⁴² Yesus iaisosima na asima na Ia wain Anahatana ihitiki na iarinii ia sia sahoro manisate na ia sia sahoro manisate tewa. Iarinii sio wason oamahaiso runa sio wason omataso nea.

⁴³ Sio mamsima runa Anahatana ne anamanaya pusiso oanamana rerihoni ia rei. Sio oasau ata sio pusiso wason oparisaa tau Yesus, mka Anahatana isiru heu no rosau tau kawasa rerihoni Yesus.”

⁴⁴ Petrus wain ianamana asi, oyo sira tau Anahatana Ne Inaha isipu. Isipu oyo, sio pusiso wason oatinu tau maunaune rei osupu kawasa.

⁴⁵ Sio Yahudiu wason oparisaa tau Yesus wason opusu Petrus on pan Yope, sio pusiso osira onoo ata Anahatana irui Ne Inaha osi sio wason sio Yahudiu tewa oi.

⁴⁶ Tea mo, oatinu sio rei oanamana tau sou waron rua oaneire tewa. Sio wason oainaa runa Anahatana oahata, “Anahatana! Ano mo, ano iake nai osa! Ano arui Yesus osima na aparisaa tau ia na asiru heu mani rosau. Ano iake tunne nai osa.”

Oyo Petrus iasau,

⁴⁷ “Masi onoo, sio rei osupu Anahatana Ne Inaha sani ita nea. Sapan na ia isa isopo na pene

osohuso tau tihu na mansiau oanei ata oarihoni no rosau nea?"

⁴⁸ Reiso Petrus iaisosiso na osohuso tau sio oparisaa tau Yesus Kristus. Osohuso, oyo oainisi na Petrus iararane ikataso onona inasa rai.

11

Petrus isima osi sio wason oparisaa roe Yerusalem

¹ Sio maisosia runa sio wason oparisaa sui otoa Yudea pusiki oatinu ata sio wason sio Yahudiu tewa oparisaa tau Anahatana ne maunauna nea.

² Petrus ieui roe Yerusalem, oyo sio Yahudiu wason oparisaa rei oasau tanui.

³ "Aeua poe ia Yahudi tewa wain sio orehiki tewasi ne numa, nanie tahae? Oyo ai akataso oi."

⁴ Reiso Petrus iatuheteso rerihoni pusire, on mataanoa rotu-tu pusiki. Iahata,

⁵ "Wea amau, wea kakau, wea waniu. Taue isa, au mo, au wani uainisi tau Anahatana nau nia Yope, oyo unoo masasua isa. Unoo sae isa sani nipae hekan, noo sani sio oratiki on roe nante. Nooi sani oakatanai tau nene susua ate rei. Oyo retaehei mai nusuku.

⁶ Unoo pan nipae ano e ia-ia, oyo unoo makapanau waron nene ai atua ate, makapanau waron rasea, sae waron rausu te raeu nene tiaya rahanunu pusu tuamane runa manua rasea.

⁷ Oyo uatinu nioke reasau san rei, 'Petrus, hanu roe. Ahunure na aire.'

⁸ Ne au on poe uasau, 'Upu, upeneku. Au mo, uai muaine wani repaputiki te monne isa tewasi.'

⁹ Ne uatinu nioke rei on roe nante reasau honu, 'Sae wani Anahatana iasau nea ata ano aiki iake, pene asau ata monne.'

¹⁰ Sani rei nai tonu oyo, Anahatana iapusaa pusire roe noiya ha honu.

¹¹ Mata huni tewa oyo, sio tonu ohokaso on poe nia Kaisarea. Kornelius iaisosiso poe tanuku. Ohokaso poe numa wani uararane tanui.

¹² Oyo Anahatana Ne Inaha iaisosiku ueu ukataso. Ipenei tau au una ano-ano ata kani iake te tewa. Sio nome wason oparisaa reini mo, opusu oi, rotu-tu poe Kaisarea. Hoka poe oyo, anusuma pan Kornelius ne numa.

¹³ Anusu pan, oyo Kornelius isima osima runa sapani na inoo Anahatana ne maisosie on roe noiya ha isa ioo pan ne numa, oyo iasau, 'Aisosi ia isa ieui pan Yope na anaha runa ia hanaie isa wain nanai Simon Petrus.

¹⁴ Ia mka isima osia runa maunauna rerihoni sapani na Anahatana iapuheua na amahaia rotu-tu ria supan. Ano runa me mansiau pusimo.'

¹⁵ Au mato uanamana, oyo Anahatana Ne Inaha ikaisunu inusui tanso sani naone runa ita oi.

¹⁶ Oyo anoku repeka ata naone Upuri iasau san rei, 'Yohanis isohumo tau tihu na mansiau oanei ata oarihoni mo rosau nea, ne mka Anahatana irui Ne Inaha osimo.'

¹⁷ Reiso Anahatana irui Ne Inaha osi sio rei, sani iruiki osi ita Yahudiu oi pannuhu ita iparisaa tau Upuri Yesus Kristus. Reiso sapani na usopo Anahatana? Anahatana mato iatuheteku ata ita Yahudiu runa sio wason sio Yahudiu tewa, inoo pusita osa."

¹⁸ Sio oatinu tau rei, oyo oasau tanui tewa nea. Oyo oainaa runa Anahatana. Oasau san rei, “Reiso ita ianei nea ata Anahatana itapi sio wason sio Yahudiu tewa oarihoni no rosau runa oamahaiso rotu-tu ria supan.”

Sio wason oparisaa poe kota Antiokhia

¹⁹ Naone sio ohunu Stefanus, oyo ouna sio wason oparisaa sinsaraso rotu-tu sio pusiso oruma owena-wenaso. Sio umau orumaso poe otoa Penisia, sio umau orumaso nau nusa isa wani nanae Siprus, sio umau honu orumaso poe kota Antiokhia. Sio oau-aunau sio Yahudiu man tau Sou lake rerihoni Anahatana.

²⁰ Ne sio umau rerihoni sio rei wason on nau nusa Siprus runa sio rerihoni nia Kireneu. Sio rei oeuso poe Antiokhia. Hoka poe oyo, oaunau sio wason sio Yahudiu tewa. Osima na Sou lake rerihoni Upuri Yesus.

²¹ Upuri irui kawasa osiso reiso sio panesi oparisaa. Orui ruao osi Upuri na opusui.

²² Sio wason oparisaa roe Yerusalem oatinu tau rei, reiso oaisosi Barnabas ieu poe Antiokhia.

²³ Hoka poe oyo, Barnabas inoo ata Anahatana irui iake mainae osiso, reiso anoi mirike. Oyo iaunauso na sio rei opusu Anahatana runa anoo pusire.

²⁴ Ia rei, ia wain anoi iake. Isupu kawasa rerihoni Anahatana Ne Inaha na iparisaa mainae tau Anahatana. Sio Antiokhiau onoo Barnabas wain san rei, reiso sio panesi opusu Upuri.

²⁵ Oyo Barnabas ieui nau nia Tarsus, nanie inina Saulus.

²⁶ Hoka nau oyo, isupui, oyo iautunui ria Antiokhia. Reiso hoka ria oyo, sio oamanouso runa sio wason oparisaa. Oatuhete sio panesi rotu-tu musum osa. Ria Antiokhia rei sio mato oaoi sio wason oparisaa tau sio Saraneu.

²⁷ Tau muie rei, sio mamsima runa Anahatana ne anamanaya umau ohokaso poe Antiokhia on roe kota Yerusalem.

²⁸ Ia mamsimae isa wain nanai Agabus ia-manou runa sio wason oparisaa, oyo ihitioi roe. Isupu kawasa rerihoni Anahatana Ne Inaha na isima runa pan muie mka sapan. Iahata, “Potuina tewa nea, oyo sio pusiso sui tuniai reini mo, osupu muaine tewa nea.” (Poe oyo, ereeu san rei sirinia pannuhu Klaudius wain ia natu.)

²⁹ Reiso sio mampusua oapamata sou nanie oauwatu kepen osi no netau wason oparisaa rei pan otoa Yudea. Sio pusiso orui pusu ruao no kepen waromo sapan.

³⁰ Ouna san rei oyo, oaisosi Barnabas runa Saulus orori kepen rai osi sio onata tau sio wason oparisaa pan rei.

12

Anahatana ne maisosie on roe noiyaha isa ihoka Petrus on pan pui anoe

¹ Barnabas runa Saulus wason poe kota Antiokhia oyo, ia aia Herodes iaisosi sio umau osota sio onata tau sio wason oparisaa rei, nanie iunaso sinsaraso.

² Iaisosiso ohunu Yohanis kakai wain nanai Yakobis tau tunue.

³ Herodes inoo ata iuna san rei, sio Yahudiu okaumin, reiso iaisosiso osota Petrus oi. Osotai tau karisaa sio Yahudiu oai poroti resaa tewa.

⁴ Osotai, oyo onusui pan pui anoe. Sio tantarau tikana ate osaka-sakai. Tau tikane osa wason sio tantarau ate. Herodes ne kaheute nanie inapa rotu-tu karisaa anoo rapeka na Anahatana ihoka no upu momou arihon otoi Mesir pusiki, samatoro iasei tanui. Iasei tanui, sio pusiso oasumata. Nanie iasei tanui na ihunui.

⁵ Reiso osaka-saka Petrus pan pui anoe. Ne sio wason oparisaa rei, wason oai-ainisi runa anoo pusire tau Anahatana osiki.

⁶ Nene hanu roe Herodes nanie iasei tanui, oyo pumono pan san rei oyo, Petrus wain inekei ikata sio tantarau ua. Petrus wain pakatihue. Okanihooi tau ranteu tau sio tantarau ua rei. Sio tantarau tamena wason osaka-saka pui nene mitanunue oi.

⁷ Mata huni oyo, Upuri ne maisosie isa on roe noiyaha ioo pan rei, oyo rinane resita sui pui nene kakaranae rei pusiki. Ia maisosie rei ihita Petrus nusui, nanie ihanui. Iahata, "He, hanu sansana roe!" Oyo ranteu rai suru poe ramnahuso rarihoni hanai atua.

⁸ Oyo ia maisosie iasau, "Ausahu me apia. Kanihoo me sandaliu." Oyo Petrus iuna sani iasau rei. Oyo iasau honu, "Ausahu me papi titie na aeu mai akataku."

⁹ Reiso Petrus ieu ipusu ia maisosie rei rotu-tu ihokai pan manahane rerihoni pui anoe rei. Ne Petrus ianei tewa ata manisate wain ihokai rerihoni pui anoe rei. Iahata kani inoo masasua man.

¹⁰ Sio oniku sio mamsakaya mataanoē. Ita oniku sio mamsakaya umau honu samatoro ohokaso poe mitanunu mamono wani opusui rotu-tu ohokaso poe kota. Mitanunue rei ruae rehekai, oyo ohokaso samatoro oeuso sui arena isa. Mata huni oyo, ia maisosie ieu iarihoni Petrus.

¹¹ Oyo Petrus mato ianei ata manisate ihokai rerihoni pui anoe nea. Iahata, “Muie reini mo, uanei ia-ia nea ata Upuri iaisosi ne maisosie on roe noiyaha na inanaku rerihoni Herodes ne kawasa. Inanaku rerihoni pusire waron sio Yahudiu nanie ouna osiku.”

¹² Petrus ianei nea, oyo ieuī ria Maria ne numa. Maria rei sahorō Yohanis inai. Yohanis, sio oaoiki tau Markus oi. Ria ne numa rei, sio panesi oamanouso nea. Sio wason oainisi.

¹³ Petrus iakapeti mitanunu pakelo, oyo ia pina makahaie wain nanai Rode, ihokai, nanie inoo runa ia seia wain iakapeti mitanunue rei.

¹⁴ Iationa Petrus nioi, reiso anoi mirike. Anoi mirike, reiso iheka mitanunue tewa. Ne inusui pan numa rei honu, oyo isima osiso. Iahata, “Petrus waipa manahane.”

¹⁵ Oahata, “Amukea.”

Ne Rode iasau-iasau ata, “Titue, Petrus waipa manahane. Petrus waipa nea.”

Ne sio on poe oasau oahata, “Areimo ne maisosie on roe noiyaha. Naone isakai. Ihokai nea, nanie isima ata Petrus imatai nea.”

¹⁶ Oasau san rei Petrus wain iaka-kapeti mitanunue sirinia. Reiso oheka mitanunue rei, oyo onooi. Osira hunu ruao.

¹⁷ Petrus isopo tau hanai na oamaturuso, oyo isima runa sapani na Upuri iautunui rotu-tu ihokai rerihoni pui anoe rei. Oyo iahata, “Asima osi Yakobis runa rea kakau rea waniu tamena oi.” Oyo Petrus ieu iarihoni naniai rei, oyo ieu noi naniai tamene.

¹⁸ Nene hanu roe oyo, sio tantarau poe pui rei ouna purie nai osa. Oasei tau umau, “Petrus wain sui supa rei omi?”

¹⁹ Oyo Herodes iatinu tau rei, reiso iaisosiso onina Petrus. Oninai, ne osupui tewa. Reiso Herodes ianaha runa sio mamsaka pui rei, nanie iasei tanso. Iasei tanso, oyo iaisosiso ohunu sio mamsaka pui rei.

Oyo Herodes ieu iarihoni otoa Yudea, nanie iararane nau nia Kaisarea mkane.

Herodes imatai

²⁰ Herodes iakapuku nai osa tau sio nia Tirus runa sio nia Sidon. Reiso oamanouso nanie oeu pan tanui. Hoka pan oyo, oapamanu Blastus na iakahaiso. Blastus rei wain ia mamsaka Herodes ne numa. Oapamanu Blastus na ianamana osi Herodes na sio ruao mka oanamana runai. Ianamana osiki, oyo Herodes iamanaku, oyo oanamana runai, nanie ohunu nisa. Tea mo, sio pusiso noi sio no niana osupu muaine rerihoni Herodes ne niana.

²¹ Tau ranie hatae isa wani ihete umetene, Herodes iausahu api aia, oyo iruei tau katera aia. Iaunau sio pusiso.

²² Oyo sio wason oatinui rei, oakapona, “Ia wain ianamana rei, ia Anahatana, ia tumata tewa!”

²³ Mata huni tewa oyo, Upuri ne maisosie on roe noiyaha iunai ikupui mtinte. Tea mo, itapi sio panesi rei oainaa runai sani ia Anahatana rei. Iaisosiso oainaa runa Anahatana ruai tewa. Reiso nikonaka raaiki, oyo imatai.

²⁴ Sio wason oaunauso tau Anahatana ne maunauna rarihoni Yesus sui supan-supan honu. Reiso sio wason oparisaa okikasi oasinena honu.

²⁵ Barnabas runa Saulus orori kepen pan otee Yudea osi sio wason oparisaa, oyo onunso on roe kota Yerusalem. Onuni okata Yohanis Markus.

13

Sio oaisosi Barnabas runa Saulus

¹ Tau sio wason oparisaa poe kota Antiokhia wason sio mamsima runa Anahatana ne anamanaya umau runa sio matuhetena umau. Sio reimo wason:

Barnabas,

Simeon (sio oaoiki tau ia metene),

Lukius (ia rerihoni nia Kirene),

Menahem (ia wain ia mainae Herodes ne neta on ia ikine asi),

Saulus.

² Sio wason oainisi oainaa runa Upuri runa oamaon, oyo Anahatana Ne Inaha iasau osiso, “Hiti Barnabas runa Saulus osiku. Nanie uaisosiso ouna sae isa osiku.”

³ Reiso oamaon runa oainisi suka, oyo oahusie uaso, oyo oaisosiso oeu.

Barnabas runa Saulus oaunauso nau nusa Siprus

⁴ Reiso Anahatana Ne Inaha iaisosiso, oyo Barnabas runa Saulus oeuso nau nia Seleukia.

Hoka nau oyo, osaa kapane rotu-tu ohokaso nau nusa isa wani nanae Siprus.

⁵ Hoka nau nia Salamis, oyo ohori sio Yahudiu no numa manouna osima na Anahatana ne anamanaya. Yohanis Markus ieu ikataso oi na iakahaiso.

⁶ Oeu oasawari rotu-tu ohokaso pan nusa rei nene rurue pan nia Papos. Hoka pan oyo, osupu ia Yahudi isa nanai Bar Yesus. Ia reini mo, ianei pakakasi. Iasau iakarota ata wain ia mamsima runa Anahatana ne anamanaya isa.

⁷ Ia reimo ikata ia mainae tau nusa rei. Ia mainae rei wain nanai Sergius Paulus. Ianei pusire iake. Ianaha runa Barnabas runa Saulus nea, nanie iatinu tau Anahatana ne anamanaya rerihoni Yesus.

⁸ Ne Elimas, ia wain ianei pakakasi rei (nanai Yunani wani Elimas), ipenei tau sio ua rei oanamana osiki. Tea mo, ipenei tau ia mainae rei iparisaa tau Yesus nea.

⁹ Ne Saulus (sio oaoiki tau Paulus oi) isupu kawasa rerihoni Anahatana Ne Inaha reiso inoo ia rei,

¹⁰ oyo iasau, “He, ano wani ia aia sakahatene anai! Ano aka-karota reaso. Auna-una kahatene osiso. Apenea tau sio wason ouna manisate. Aka-karota rerihoni pusire waron Upuri iunai manisate. Arihoni akarota tewa.

¹¹ Mata huni oyo, Upuri mka iapasanaya na matam usena raputiso. Mka anoo ranie tewa rotu-tu mkane.”

Mata huni tewa oyo, inoo relalopo. Iahana sani pumono nea. Reiso iasi-asinaa inina ia isa isota hanai, oyo iaunutui.

¹² Ia mainae inoo tau rei reiso iparisaa. Tau sae, isira iatinu maunaune rei rerihoni Upuri.

Barnabas runa Paulus oaunauso poe kota Antiokhia poe otoa Pisidia

¹³ On nau Papos, Paulus sio osaa kapane honu rotu-tu ohokaso nau nia Perga poe otoa Pampilia. Hoka poe oyo, Yohanis Markus ieu iarihoniso, nanie inuniki roe Yerusalem.

¹⁴ Oyo on poe Perga oeuso honu rotu-tu ohokaso ria kota Antiokhia ria otoa Pisidia. Hoka ria oyo, tau ranie hatae wani sio Yahudiu oamuiira Anahatana, oeu oru-rueso pan numa mananouna osi sio Yahudiu.

¹⁵ Ia isa ihatae mkane rerihoni Musa ne surate runa sio mamsima runa Anahatana ne anamanaya no surata. Oyo sio onata tau numa mananouna rei oaisosi ia isa na iasau osi Paulus sio san rei, “Mania kakau, mania waniu. Munata omi mo maunaune isa osi sio reini, na maunaune reini mo rekahaiso na oparisaa ia-ia, masi oasau poe.”

¹⁶ Reiso Paulus ihitioi roe, oyo isopo tau hanai na sio oamaturuso. Iahata,

“Wea kakau, wea waniu. Omi Israel runa omi tamena wani oamuiira Anahatana! Masi oatinu tau rei!

¹⁷ Anahatana wain sio Israel oainaa runai inini noa upu nea. Au reini mo, au Israel oi, tea. Anahatana iuna sio Israel okikasi oasinena runa irui kawasa osiso tau sio wason oru-rueso pan otoa Mesir sani sio rakana. Oyo tau ne kawasa mainae iautunuso na ohoka oarihoni Mesir.

¹⁸ Isakaso pan otoa huie rotu-tu musum hutu ate.

¹⁹ Iakahaiso ohunu sio panesi rerihoni sio niana itu wason oru-rueso tau otoa Kanaan, oyo irui no tuamane osi sio Israel rei na reuna sio ruao no tuamane.

²⁰ Rea upu oru-rueso pan Mesir runa ohori otoa huie rotu-tu musum utun ate hutu nima samatoro osupu tuamane rei.

Oyo Anahatana ihiti sio mainaya na orimeso. Ihitiso sana osa-osa samatoro ihiti Samuel tau ia mamsima runa ne anamanaya.

²¹ Oyo oainisi na Anahatana ihiti aia isa osiso. Reiso ihiti Saul, Kis anai, rerihoni Benyamin ne ipane, oyo iuna aia rotu-tu musum hutu ate.

²² Oyo Anahatana ineiki. Ita ihiti Daud tau aia honu. Anahatana ianamana tanui san rei, 'Unoo nea ata Daud, Isai anai, iuna sani Au we suka sio ouna. Ia rei ipusu au we maue.'

²³ Daud upui sahoro Anahatana ihitiki tau Ia Waini Iapuheu ne Mansiau osi sio Israel. Ia reimo wain Yesus. Reiso Anahatana iuna pusi nea sani itotoe rei.

²⁴ Ne Yohanis mo, iaunau sio Israel pusiso na oarihoni no rosau samatoro isohuso na mansiau oanei ata oarihoni no rosau nea. Yohanis iaunauso san rei samatoro Yesus iaunauso.

²⁵ Yohanis ne tanei haineke pusiki nea, oyo iasau osiso san rei, 'Au reini mo, au seia? Au wani Ia Anahatana Iratiki Iapuheuso tewa. Au wani ia sahoro onapa-napai tewa. Ne oatinu, ia reimo mka ihokai tau muie. Ia wain ia mainae nai osa reiso uakahaiki sani ukanahata, oyo unosu ne sandaliu rerihoni ain atua iae iake tewa.'

²⁶ Wea kakau, wea waniu. Abraham nea upu runa omi tamera wani oamaira Anahatana!

Anahatana iauwatu maunaune rerihoni ia rei wain iapuheuso na oamahaiso rotu-tu ria supan. Iauwatu maunaune osi ita nea.

²⁷ Ne sio ona Yahudiu runa sio pusiso wason oru-rueso roe Yerusalem oanei tewa ata ia rei wain Ia Aia wain Anahatana Ihitiki na Iapuheu ne Mansiau rei. Sio mo, oanei tewa sio mamsima runa Anahatana ne anamanaya no maunauna rerihoni Yesus. Aikee maunauna rai, ohatae tanure tau ranie hatae wan sio Yahudiu oamuirā Anahatana sui osa. Oanei tewa, reiso nanie ohunui. Ne oaisosiso ohunui san rei, areimo nene nohue ouna sani sio mamsimaya oanutu anoo naone.

²⁸ Masike osupu sae isa tewa iae na ohunui, oainisi na Pilatus, ia wain ia ne kawasa tau otoa reimo, iaisosi sio umau ohunui.

²⁹ Oaisosiso ohunui, reiso ouna pusire osiki nea waron sio mamsimaya okanure tau Anahatana ne anamanaya, oyo sio umau honu oaputunui on roe hini wani reniene, samatoro oanutui pan hatu nohue.

³⁰ Ne Anahatana mo, iapuhaiki honu rerihoni sio matana.

³¹ Oyo iatu-atuhete ruai osi sio wason okatai on poe otoa Galilea rotu-tu ohokaso roe kota Yerusalem. Iatu-atuhete ruai rotu-tu onona inasa rai. Sio wason onooi rei, muie reini mo, wason osima na ia rei osi sio Yahudiu pusiso.

³² Reiso ami wani asima na Sou Iake rerihoni Yesus rei osimo, ata sae wani Anahatana itotoe osi rea upu ata mka iunai,

³³ areimo iunai nea osi ita, noa upu pusita. Iuna san rei, iapuhai Yesus rerihoni sio matana nea. Masuae, tau aia Daud ne Sura Kapatau

ikanu sani Anahatana iasau osi anai Yesu san rei,

‘Ano mo, Au Anaku,

Ranie hatae reini uapuhaia honu, reiso sio pusiso oanei nea ata Au reini mo, Au Amam.’

³⁴ Rerihoni iapuhaiki honu rerihoni sio matana runa imatai tewa nea, Anahatana iasau osiki san rei,

‘Mka urui osia sae wani utotoe osi Daud.’

³⁵ Samatoro Daud ruai ikanu tau ne Sura Kap-atau tamene san rei,

‘Ano atapiku tewa ata au wani au manisate onate, tinaiku rekopui.’

³⁶ Daud ianamana rerihoni ruai tewa. Tea mo, ianori na Anahatana sani iaisosiki tau wain iamahaiki, oyo imatai. Imatai oyo, sio okaniki runa nea upu, oyo tinain rekopui.

³⁷ Ne ia sahoro Anahatana iapuhaiki honu mo, tinain rekopu tewa nea.

³⁸ Reiso wea kakau, wea waniu. Kahurae omi oanei. Oanei ata ami wani asima osimo ata Anahatana mka isiru heu mo rosau pusu Yesu imatai, oyo iamahaiki.

³⁹ Tau ne atate rei, sio pusiso wason oparisaa, Anahatana ialapisiso rerihoni no rosau pusire. Rosau rai, Anahatana ialapisiso rerihonire pusu Musa ne maunauna ruare tewa.

⁴⁰ Reiso ainati. Oatinu tau we maunaune reini. Tea mo, Anahatana iapasanamo sani ia mamsima runa Anahatana ne anamanaya isa iasau. Iahata,

⁴¹ ‘Oatinu ia-ia omi wani oanamana kahatene rerihoni Anahatana ne anamanaya!

Mka osira, oyo omatamo!

Tau sae, tau napisi rei, au mka uunamo sin-saramo mainae rotu-tu oparisaa tewa nea. Masike oatuhetemo tanui iae, oparisaa tewa.’ ”

⁴² Paulus runa Barnabas nanie ohokaso rerihoni numa mananoue rei nea, oyo oainisi itu rei tau ranie hatae wan sio Yahudiu oamuiira Anahatana rei ohokaso honu na oaunauso honu rerihoni rei.

⁴³ Sio onata oaisosi sio wason pan numa mananoue rei onunso, oyo sio Yahudiu panesi runa sio panesi wason onusu Yahudi nea opusu uaso. Sio wason onusu Yahudi rei oainisi oainaa runa Anahatana. Opususo, oyo uaso oapa-apamanu na sio opari-parisaa ata Anahatana iakahaiso runa irui iake osiso.

⁴⁴ Itu rei tau ranie hatae wan sio Yahudiu oamuiira Anahatana honu, oyo haineke sio pusiso wason orueso tau kota rei oamanouso, nanie oatinu maunauna rerihoni Upuri.

⁴⁵ Sio Yahudiu onoo sio panesi rei runa sio wason Yahudiu tewa panesi, oyo oanana. Reiso oasau oahata, “Paulus mo, ia makarotane.” Omakaniai oi.

⁴⁶ Ne Paulus runa Barnabas oaunauso okaitau tewa. Oahata, “Anahatana iaisosima aunaumo tau ne anamanaya rerihoni Yesus naone. Ne openemo oparisaa. Tau rei, oasau ata oamahaimo haineke Anahatana rotu-tu ria supan iake tewa. Reiso ami nanie aeu arihonimo oyo aeuma noi sio wason sio Yahudiu tewa.

⁴⁷ Tau sae, Upuri iaisosima san rei,
‘Uhitia nea
na ano atuhete sio wason sio Yahudiu tewa
rerihoni au

sani kamane itane resita retuheteso tau sae
isa
na tau omi oaunauso, uapuheu sio pusiso
mai tunjai reini na oamahaiso rotu-tu ria
supan.’”

⁴⁸ Sio wason sio Yahudiu tewa oatinu tau rei,
sio anoo mirika. Reiso oainaa runa Anahatana
san rei, “Upuma, Anahatana. Ano me maunaune
rei rerihoni Yesus wani iake nai osa. Reiso ami
ainaa runaya.” Sio pusiso wason Anahatana
ininiso na oamahaiso rotu-tu ria supan oparisaa
tau Yesus.

⁴⁹ Sio wason oparisaa ohori otoi rei oaunau sio
panesi honu tau Upuri ne maunauna.

⁵⁰ Ne sio Yahudiu ouna sio mainaya tau kota
rei runa sio pina mainaya wason oamuiria Ana-
hatana onesi uaso. Reiso ouna uaso sinsaraso,
oyo oneiso oarihoni otoi rei.

⁵¹ Reiso uaso oasamau ouna heu tapuna reri-
honi aio atua na sio oanei ata sio Yahudiu rei
wason sani sio wason oationa Anahatana tewa.
Oyo oeuso pan nia Ikonium.

⁵² Sio mampusua poe kota Antiokhia anoo
mirika. Osupu kawasa rerihoni Anahatana Ne
Inaha sirinia.

14

*Paulus runa Barnabas oaunauso pan nia Iko-
nium*

¹ Hoka pan nia Ikonium oyo, Paulus runa
Barnabas uaso onususo pan sio Yahudiu no
numa mananoue sirinia. Pani rei oaunauso
iake, reiso sio panesi oparisaa tau Yesus, sio
Yahudiu runa sio wason sio Yahudiu tewa.

² Ne sio Yahudiu umau openeso oparisaa tau Yesus, reiso oapamanu sio wason Yahudiu tewa na ouna sio rei anoo rasaa tau sio wason oparisaa.

³ Reiso uaso orueso potuina pan rei. Oaunauso rerihoni Upuri, okaitau tewa. Upuri iatuheteso ata sio no maunauna rerihoni sapani na irui iake osiso areimo manisate. Iatuheteso tau irui kawasa osiso na ouna sima-simana waron retuhete ata no kawasa rerihoni Anahatana runa sima-simana raasiraso. Sima-simana sani osuiseneso runa onei sakahatena.

⁴ Sio Ikonium wason osamaso tau ua. Sio umau opusu sio Yahudiu na openeso oparisaa tau Yesus, sio umau opusu sio maisosia uaso.

⁵ Oyo sio wason sio Yahudiu tewa, sio Yahudiu, runa sio ona Yahudiu oheu, nanie ouna uaso sinsaraso. Nanie orauso tau hatu.

⁶ Ne uaso oatinu rerihoni kaheute rei, reiso orumaso nau nia Listra, nia Derbe runa otoa Likaonia pusiki.

⁷ Tau otoa rei, osima na Sou Iake rerihoni Yesus.

Paulus runa Barnabas oaunauso nau nia Listra

⁸ Paulus runa Barnabas ohokaso nau nia Listra, oyo osupu ia isa wain ieu ise-ise. Ia reimo iamrai san rei. On iamrai ieu tau ain tewasi. Ain atua manna.

⁹ Waini iru-ruei iatinu Paulus iaunauso. Paulus iroi, oyo ianei ata iparisaa ata Anahatana imaha iunai iake.

¹⁰ Reiso Paulus iasau osiki nioi mainae, "Hitio roe. Aoo katopu!" Oyo isoman roe, oyo ieu.

¹¹ Sio hutue rei wason oatinu tau Paulus ne maunauna onoo Paulus ne sima-simane rei, oyo oakapona tau sio no sou, areimo sou Likaonia. Oahata, “Sio wason ita iainaa runaso okaisunso mai tuniai reini nea! Ouna tumatau nea!”

¹² Oyo ohete Barnabas nanai tau Seus. Ohete Paulus nanai tau Hermes. Tau sae, sio Litra oainaa runa Seus runa Hermes sani sio Yahudiu oainaa runa Anahatana. Ohete Paulus nanai tau Hermes. Tea mo, ianamana iake. Hermes iae ianamana iake.

¹³ Reiso ia wain isaka ianori runa Seus iatinu tau rei. Ia rei isaka Seus ne numa hae niane muie. Tau numa rei, sio oainaa runa Seus. Reiso inesa koropou hanaiya runa irori kupako mai kota rei nene mitanunua. Oyo ia runa sio hutue rei, nanie orehire osi Paulus runa Barnabas oainaa runaso.

¹⁴ Sio maisosia, Barnabas runa Paulus, oatinu tau rei, oyo okiha no papita na sio oanei ata openeso tau sio Litra oainaa runaso. Oruma kua sio hutue rei tihue oakapona san rei,

¹⁵ “He, omi wani ouna san rei, nanie tau sae? Ami reini mo, ami tumatau oi, tea? Ami sani omi reino oi. Ami wani asima na Sou Iake rerihoni Yesus osimo. Ami wani asau osimo ata kahurae oarihoni oainaa runa sae wani remahaiki tewa, sani Seus runa Hermes. Kahurae oainaa runa Anahatana wain iamahaiki. Anahatana sahoro ihaye nante, runa tuamane, runa nuae runa pusire waron tuniai reini.

¹⁶ Masike naone Anahatana itapiso opusu ruao no maue,

¹⁷ iatuheteso rerihoni ruai oi. Iatuheteso pusu irui iake osiso. Iuna uane osi pusita. Iuna atuhu raruhi. Tau musum tinou, iuna atuhu huaya.

Reiso irui muaine osita. Iuna anori mirika.”

¹⁸ Ne masike oaunauso san rei iae, mtinte oapamanuso na pene orehi koropou rai osiso. Ne poe oyo, orehire tewa.

¹⁹ Oyo sio Yahudiu umau ohokaso mai Listra on ria kota Antiokhia ria otoa Pisidia runa otoa Ikonium, oyo oanamana osi sio panesi rotutu oapamanu orau Paulus tau hatu. Reiso orau, oyo onesai pan niane muie oahata imatai.

²⁰ Ne sio mampusua ohoriki, oyo ihitio roe, oyo inusui pan niane rei honu.

Hanu roe oyo, ieui pan nia Derbe ikata Barnabas.

Paulus runa Barnabas onunso pan kota Antiokhia pan otoa Siria

²¹ Hoka pan nia Derbe oyo, Paulus runa Barnabas uaso osima na Sou Iake rerihoni Yesus rotutu sio panesi ouna Yesus ne mampusua. Oyo uaso onunso poe nia Listra, nia Ikonium runa kota Antiokhia poe otoa Pisidia honu.

²² Sui niana rai, oakahai sio mampusua na oparisaa ia-ia. Oaunauso na oparisaa asi. Oahata, “Kahurae sinsarata panesi naone, samatoro ipusu tau Anahatana irime ne mansiau.”

²³ Ohiti sio onata tau sio wason oparisaa no tikana pusire. Oyo oahusieso oainisi tau Upuri wain sio oparisaa rei na Upuri ikata runaso. Oahusieso, oainisi, oamaon.

²⁴ Oyo uaso oeuso honu onikuso poe otoa Pisidia rotutu ohokaso nau otoa Pampilia honu.

²⁵ Hoka nau oyo, oaunauso tau Anahatana ne anamanaya nau nia Perga, oyo oeuso nau nia Atalia.

²⁶ Hoka nau oyo, osaa kapane, nanie onunso pan Antiokhia. Sio Antiokhia sahoro oahusieso runa oainisi na Anahatana irui iake osiso na sio oaunause runa ona sima-simana. Ouna san rei nea.

²⁷ Hoka pan oyo, uaso oanaha runa sio pusiso wason oparisaa, nanie osima runa Anahatana iuna sae pusu sio. Oruni rerihoni sapani na Anahatana iheka arena na sio wason sio Yahudiu tewa oparisaa tau Yesus.

²⁸ Oyo uaso orue tau kota rei potuina okata sio mampusua.

15

Sio maisosia runa sio onata oapisara roe Yerusalem

¹ Sio Yahudiu umau wason oparisaa tau Yesus nea ohokaso on roe otoi Yudea. Ohoka poe kota Antiokhia, oyo oatuhete sio wason oparisaa tau Yesus. Sio Antiokhiau rei wason sio Yahudiu tewa, reiso oatuheteso san rei, "Munata sio orehimo pusu Musa ne maunauna tewa Anahatana mka iapuheumo na oamahaimo rotutu ria supan tewa."

² Paulus runa Barnabas openeso tau mau-naune rei, reiso otuntana mainae runa sio rei. Sio ohunu anamanae nanie oaisosi Paulus runa Barnabas runa sio umau honu oeuso roe Yerusalem na oanamana rerihoni masana rei runa sio maisosia na sio onata tau sio wason oparisaa roe rei.

³ Reiso sio wason oparisaa poe Antiokhia oaisosi Paulus sio, oyo Paulus sio oeu ohoi otoi Penisia runa otoi Samaria. Pani rei sio osima

runa sapani na sio wason sio Yahudiu tewa oparisaa tau Yesus nea. Sio wason oparisaa pan rei oatinu tau rei, oyo anoo mirika.

⁴ Oyo oeuso roe Yerusalem. Hoka roe oyo, sio maisosia, sio onata tau sio wason oparisaa runa sio wason oparisaa pusiso oatapeaso iake. Oatapeaso oyo, uaso osima osiso runa pusire waron Anahatana iakahaiso ouna osi sio wason sio Yahudiu tewa.

⁵ Ne sio umau rerihoni tikane sio onata rerihoni akama Yahudiu ohitio roe, oyo oasau, “Masike sio oparisaa tau Yesus nea, kahurae sio orehi sio wason sio Yahudiu tewa. Kahurae sio opusu Musa ne maunauna.”

⁶ Oyo sio maisosia runa sio onata tau sio wason oparisaa oamanouso, nanie ohunu anamanae rerihoni masana reini.

⁷ Sio ohunu anamanae potuina, oyo Petrus ihitioi roe, oyo iasau, “Wea kakau, wea waniu! Omi ruamo oanei ata naone Anahatana inini au rerihoni pusita na uaunau sio wason sio Yahudiu tewa. Uaunauso na sio iae oatinu Sou Iake rerihoni Yesus runa oparisaa.

⁸ Anahatana wain iationa tumata anoi pusiki iatuheteta nea ata anoi runa sio oi. Iatuheteta tau irui Ne Inaha osiso sani iruiki osi ita oi.

⁹ Pusita osa. Anahatana inoo sio ruao, ita ruari tewa. Iuna heu sio no rosau pusu sio oparisaa tau Yesus sani ita oi.

¹⁰ Omi nanie na sio Yahudiu tewa wason oparisaa opusu Musa ne maunauna pusire ouna mtinte tau sio, nanie tahae? Ita ruari rea upu opusu maunauna pusire iake tewa. Omi nanie oaisosiso opusure oi? Pene ouna tinkaei tau Anahatana.

¹¹ Pene. Ita iparisaa ata Anahatana iapuheuta na iamahaita rotu-tu ria supan pusu Upuri Yesus irui iake mainae osita. Sio oi, Anahatana iapuheuso pusu Yesus. Kahurae sio opusu Musa ne maunauna pusire tewa.”

¹² Sio pusiso wason oamanouso pan rei oamaturuso. Oyo oatinu Barnabas runa Paulus osima runa sapani na Anahatana irui kawasa osiso na sio ouna akakinaya na sio oanei ata sio no kawasa on roe Anahatana runa sima-simana raasiraso. Sio ouna sima-simana sani osuisene sio kupua runa onei sakahatena kua sio wason sio Yahudiu tewa tihue, reiso ita ianei ata Anahatana anoi runa sio oi.

¹³ Sio osima pusi, oyo Yakobis, ia mainae tau sio wason oparisaa roe Yerusalem, iasau san rei, “Wea kakau, wea waniu! Masi oatinu tau au.

¹⁴ Simon Petrus mato iatuhetemo sapani na mataano e Anahatana iatuhetei. Iatuhetei ata anoi runa sio wason sio Yahudiu tewa. Inini sio umau rerihoni sio rei oi na sio ouna ne mansiau.

¹⁵ Maunaune rei runa sio mamsima runa Anahatana ne anamanaya no maunauna, uare osa. Ia mamsimae isa ikanu ata Anahatana iasau san rei,

¹⁶ ‘Mka au uhokaku honu,
oyo uhiti honu Daud tau aia tau niana waron
naone iuna aia tanure.

Uhitiki honu
sani ia isa inana honu numa wani watikohui
honu.

¹⁷ Au uhitiki na sio tamena oninaku
runa sio wason sio Yahudiu tewa wason uanaha runaso nea na sio ouna we mansiau.

¹⁸ Au mo, omi moa Upu, uasau san rei.
Mka au una sani masuae au una sio oasau.’ ”

¹⁹ Yakobis iasau honu, “Reiso uahata kani nene iake ita pene iaisosiso opusu Musa ne maunauna pusire iuna mtinte tau sio wason sio Yahudiu tewa wason nanie ouniso opusu Anahatana.

²⁰ Ne kahurae ita ikanu surate osiso runa iaunauso na hasae pene sio oai muaine wani sio oruiki osi anahatana wani titue tewa, pene okaparua, pene oai henate rerihoni makapanau waron sio oakinenere, runa pene oai makapana nene nasie.

²¹ Sio oanei nea ata ita Yahudiu ipeneta tau rei. Tau sae, Musa ne maunauna waron rasopore, sio osima nnare sui osa potuina nea tau rania hataya waron ita Yahudiu iamuiira Anahatana sui numa mananouna osi sio Yahudiu.”

Sio maisosia runa sio onata oauwatu surate osi sio wason sio Yahudiu tewa

²² Reiso sio maisosia, sio onata tau sio wason oparisaa runa sio pusiso wason oparisaa roe Yerusalem rei, oapamata sou nanie onini sio umau rerihoni ruao, oyo oaisosiso oeu okata Paulus runa Barnabas poe kota Antiokhia. Reiso onini Silas runa Yudas, sio oaoiki tau Barsabas oi. Sio ua rei wason sio onata rerihoni sio mamparisaa.

²³ Sio maisosia runa sio onata tau sio wason oparisaa okanu surate oi oyo oruiki osi ateso na ororiki. Sio okanu san rei,

“Osi mania kakau, mania waniu wason sio Yahudiu tewa poe kota Antiokhia runa otoa Siria runa otoa Kilikia.

Tapea on roe ami maisosia runa ami onata pusima.

²⁴ Ami atinu ata sio umau rerihoni ami reini oeuso poe tanumo nea, oyo ouna anomo mtinta runa anomo rauponu runa sio no maunauna. Aikee ami aisosiso tewa.

²⁵ Reiso pusima apamata sou nanie anini sio umau, oyo aisosiso poe tanumo okata Barnabas runa Paulus wason anoma runaso.

²⁶ Sio ua reini oamanane sio wason nanie ohunuso nea tau oanori runa Upuri Yesus Kristus.

²⁷ Reiso ami aisosi Yudas runa Silas osimo. Mka sio ruao oasau osimo. Sio no anamanaya rai runa surate rei nene anamanaya, uare osa.

²⁸ Anahatana Ne Inaha runa ami pusima apamata sou na pene aisosimo opusu Musa ne maunauna pusire ouna mtinte tanumo. Hasae maunauna mkana rai kahurae omi opusure.

²⁹ Areimo pene oai muaine wani oruiki osi anahatana wani titue tewa, pene oai makapana nene nasie, pene oai henate rerihoni makapana wani sio oakinenei, runa pene okaparua. Munata omi ouna atata raini tewa, omi ouna iake.

Hasae rei mani, tapea!"

³⁰ Reiso sio oaisosiso oeuso poe Antiokhia. Hoka poe oyo, oanaha runa sio pusiso wason oparisaa, oyo orui surate rei osiso.

³¹ Sio ohatae tanui, oyo anoo kaia. Maunaune rei rekahaiso.

³² Yudas runa Silas wason sio mamsima runa Anahatana ne anamanaya oi, reiso oaunau sio wason oparisaa rei rotu-tu potuina runa oakahaiso oparisaa ia-ia.

³³ Yudas runa Silas oru-rueso poe rei potuina

mkane, oyo sio wason oparisaa poe Antiokhia oauhaaso, oyo oaisosiso onunso roe Yerusalem roe sio roe rei wason oaisosi uaso.

³⁴ Ne Silas iapamata sou nanie iruei poe Antiokhia asi.

³⁵ Paulus runa Silas oi orueso potuina poe Antiokhia na oatuheteso runa osima na Upuri ne anamanaya. Uaso runa sio panesi honu oatuheteso.

Paulus runa Barnabas oeu osakakau

³⁶ Onona inasa rai oyo, Paulus iasau osi Barnabas, “Mai, inunta noi niana waron naone isima na Upuri ne anamanaya osiso. Mka inoo rea kakau, rea waniu na inoo sio sapan.”

³⁷ Barnabas inina na Yohanis Markus ikataso,

³⁸ ne Paulus ipenei. Iahata nene iake pene Markus ipusui. Naone ieu iarihoniso poe otoa Pampilia. Ikataso rotu-tu no tanei pusiki tewa.

³⁹ Uaso otuntana mainae, reiso sio oeu osakakau. Barnabas isaa kapane, nanie ieu nau nusa Siprus ikata Markus.

⁴⁰ Paulus inini Silas, oyo sio wason oparisaa poe Antiokhia orui uaso osi Upuri na irui iake osiso, samatoro uaso oeuso.

⁴¹ Oeu ohori otoa Siria runa otoa Kilikia na Paulus iakahai sio wason oparisaa na oparisaa ia-ia.

16

Timotius ieu ipusu Paulus runa Silas

¹ Paulus ieu ikata Silas honu rotu-tu ihokai poe nia Derbe, oyo ieu poe nia Listra. Hoka poe oyo, isupu ia mampusue isa nanai Timotius. Inai,

ia Yahudi. Iparisaa tau Yesus nea. Ne amai, ia Yunani.

² Sio wason oparisaa poe Listra runa Ikonium oahata Timotius mo, ia iake.

³ Paulus inina na Timotius ieu ikatai, reiso irehiki. Tau sae, sio Yahudiu sui otoa rei oanei ata amai, ia Yunani. Sio oanei ata sio orehiki tewasi. Reiso Paulus irehiki.

⁴ Oeu ohori niana sui otoa Galatia osima osi sio wason oparisaa runa maunauna on roe sio maisosia runa sio onata tau sio wason oparisaa roe kota Yerusalem. Sio oaunauso na opusu maunauna rai.

⁵ Reiso sio wason oparisaa, oparisaa ia-ia. Ranie hatae isa, ereeu mai poua tonu rei sio okikasi oasinena sui osa.

Paulus inoo masasua nau Troas

⁶ Anahatana Ne Inaha isopo na pene Paulus sio oaunauso tau Anahatana ne anamanaya nau otoa Asia. Reiso oeuso ria otoa Prigia runa otoa Galatia.

⁷ Hoka ria haineke nenene wani resama otoa Misia runa otoa Bitinia, oyo nanie onusu otoa Bitinia. Onusu rea, ne Yesus Ne Inaha isoposo honu.

⁸ Reiso oniku Misia, oyo oeuso nau nia Troas.

⁹ Hoka nau oyo, nene pumono pan san rei oyo, Paulus inoo masasua. Inoo ia Makedonia isa iooi hainekei iainisi runa anoi pusiki san rei, "Aeua mai otoa Makedonia na akahaima."

¹⁰ Paulus inoo masasua rei, oyo isima osi au, Lukas, runa ne netau tamena. Mata hun tewa oyo, ami autotu apia, nanie aeuma nau Makedonia. Tau sae, ami apamata sou ata Anahatana

iaisosima asima runa Sou Iake rerihoni Yesus osi sio nau rei.

Lidia iparisaa tau Yesus ria nia Pilipi

¹¹ Ami aeu arihoni nia Troas asaa kapane rotutu ahokama nau nusa Samotrake. Hoka nau oyo, hanu san rei ahokama nau nia Neapolis.

¹² Hoka nau oyo, aeuma ria Pilipi, niane isa ria otoa mataanoa pan Makedonia. Sio Romau sahoro onana kota rei. Ami ararane onona inasa rai.

¹³ Tau ranie hatae wan sio Yahudiu oamuiara Anahatana ahokama arihoni niane rei nene mitanunue. Ahokama pan mui, oyo aeuma pan waene nusue. Tau sae, ami ata pan rei mka asupu sio Yahudiu naniao na oainisi tanui. Asupui, oyo ami aru-ruema anamana runa sio pinau wason oamanouso pan rei.

¹⁴ Ia isa rerihoni sio rei nanai Lidia. Iahen nipa msinaya. Nipaya rai hunonia mainaya. Ne niane wani Tiatira. Ia Yunani ne iainisi iainaa runa Anahatana sani sio Yahudiu. Reiso Anahatana irue anoi na ianei Paulus ne maunauna runa iparisaa.

¹⁵ Sio osohu Lidia runa sio pusiso wason orue tau ne numa na mansiau oanei ata oarihoni no rosau nea. Oyo iainisi tau ami san rei, "Wea amau, wea hotau. Munata omi oahata titue uparisaa tau Yesus nea, mai, oararanemo mai we numa." Oyo iapamanuma, reiso ararane tau ne numa rei.

Sio onusu Paulus runa Silas pan pui ria nia Pilipi

¹⁶ Taue isa ami wani aeuma pan naniama wani amanouma na ainisi, oyo asupu ia pina maniane

isa. Ia pina rei, sakahatene rerui kawasa osiki na iuna nau, oyo iasau pan muie mka sapan. Iuna nau, oyo sio wason oaisosiki osupu kepen panesi.

¹⁷ Ia pina rei ieu ipusu-pusu Paulus runa pusima iaka-akapona, “Sio reino mo, sio wason Anahatana wain ia mainae nai osa ne manorina. Sio wason osima osimo runa sapani na Anahatana iapuheumo na oamahaimo rotu-tu ria supan.”

¹⁸ Iuna san rei rotu-tu onona ate te nima san rei, oyo Paulus iakapuku. Ikuai iapamese ruai tewa nea. Reiso iuniki, oyo iasau osi sakahatene rei, “Tau Yesus Kristus ne kawasa, au uaisosia na ahokaya arihoni ia pina reini.”

Oyo sira tau rehokai rerihoni ia pina rei.

¹⁹ Sio wason oaisosiki oanei ata mka sio osupu kepen tewa nea rerihoni ia pina rei. Reiso osota Paulus runa Silas onesa uaso pan niane tihue wani huie na sio onata tau niane rei oasei tanso.

²⁰ Orori uaso na oamanane Ia Aia Mainae Roma ne mansia mainaya, oyo oasau, “Mania amau, sio reini mo, sio Yahudiu. Reiso sio wason ouna sio panesi otuntana runa umau mai ita re niane reini.

²¹ Ita wani Ia Aia Mainae Roma ne mansiau. Sio onina na ipusu no monna waron re nату rei isopo na pene iunare.”

²² Oyo sio hutue pusiso nanie ohitaso nea. Reiso sio onata oaisosiso okiha uaso no papita, oyo onosure. Onosure oyo, osapu-sapuso tau ai anaya.

²³ Osapu-sapuso mainae, oyo onususo pan pui. Sio oaisosi ia mamsaka pui na isakaso ia-ia.

24 Reiso ia mamsaka pui inususo pan kamar hainau pan pui anoe, oyo ikanihoo aio atua rapanaha hini na pene nisuo.

25 Tau saa monon tihu san rei oyo, Paulus runa Silas wason oainisi, wason ohete kapatau oainaa runa Anahatana. Sio tamena wason sio osakaso pan pui oatinu.

26 Sira tau isu mainae rotu-tu tuamane wani sio onana pui tanui rekoka. Pui mitanunua pusire rahekaso runa ranteru waron sio okanihooso runare, ranosu pusire.

27 Ia mamsaka pui rei imaranae. Imaranae oyo, inoo pui mitanunua raheka pusire. Reiso isaru ne tunue nanie ihunu ruai. Iahata sio pusiso wason isakaso pan pui orumaso nea. Ikaitau mka sio oasau isakaso ia-ia tewa, oyo ohunui.

28 Ne Paulus iakapona nioi mainae, “Pene ahunu ruam! Ami pusima ami wani sirinia!”

29 Iainisi kamana, oyo irumai pan pui anoe. Ikana-kananunui, oyo iamnohoi mai Paulus runa Silas uaso ua anoa, nanie iainisi sae isa.

30 Oyo iautunu uaso ohokaso, oyo iasei, “Wea upu, kahurae au una sae na Anahatana ia-puheuku na uamahaiku rotu-tu ria supan?”

31 Sio on poe oasau san rei, “Parisaa tau Upuri Yesus Kristus, oyo Anahatana iapuheua. Ano runa sio pusiso wason orueso tau me numa.”

32 Oyo sio oatuhete ia mamsaka pui runa sio wason noi ne numa pusiso tau maunauna rerihoni Upuri Yesus.

33 Oyo nene pumono pan san rei oyo, ia mamsakae rei iautunu uaso, oyo isohu no apata.

Isohu no apata, oyo sio osohuso na mansiau oanei ata oarihoni no rosau nea, ia mamsakae rei runa sio wason noi ne numa pusiso.

³⁴ Oyo iautunu uaso roe ne numa nanie ipanaso. Ipanaso oyo, ia runa sio wason noi ne numa pusiso anoo miri-mirika tau sio oparisaa tau Anahatana nea.

³⁵ Hanroe tau omnanoë oyo, Ia Aia Mainae Roma ne mansia mainaya oaisosi sio polisiu oeuso pan ia mamsaka pui oaisosiso oasau, “Ahoka sio ua rei.”

³⁶ Reiso ia mamsakae isima osi Paulus san rei, “Ia Aia Mainae Roma ne mansia mainaya oaisosima nea na ahokamo. Reiso onunimo. Oeu ia-ia.”

³⁷ Ne Paulus iasau osi sio polisiu rei, “Masike sio osupu mani isanae isa tewa iae, Ia Aia Mainae Roma ne mansia mainaya oaisosiso ohitama runa sio pusiso onooi. Masike ami mani kawasa sani Ia Aia Mainae Roma ne mansiau iae, sio ohitama, oyo onusuma pan pui anoe. Ne muie reini mo, sio nanie oaisosima anunima auhunima? Ami apenema. Aisosi sio mainaya rei ruao ohokaso na oautunuma ahokama.”

³⁸ Sio polisiu oeu osima runa anamanaya rai osi sio mainaya. Sio mainaya oatinu ata Paulus runa Silas sani Ia Aia Mainae Roma ne mansiau, oyo okaitau hun ruao.

³⁹ Reiso oeuso pan pui rei oripa koku tau uaso. Oyo oautunso ohokaso rerihoni pui anoe rei oai-ainisi na sio oeu oarihoni kota rei.

⁴⁰ Uaso ohoka rerihoni pui anoe rei, oyo oeuso pan Lidia ne numa. Hoka pan oyo, oamanouso

runa sio wason oparisaa pusiso. Oakahaiso tau no maunauna, oyo oeu oarihoni niane rei.

17

Sio ouna Paulus runa ne netau kahi-kahiso poe kota Tesalonika

¹ Paulus runa Silas oeuso honu oniku nia Amfipolis runa nia Apolonia rotu-tu ohokaso poe kota Tesalonika. Poe kota rei, sio Yahudiu no numa mananouna isa wapo.

² Hoka poe oyo, Paulus inusu numa mananouna rei sirinia. Inusui tau onone wan iamuiira Anahatana, rotu-tu onona itu honu ita inusu honu rotu-tu nai tonu. Inusui, oyo ihunu anamanae runa sio pan numa mananouna rei pusu Anahatana ne anamanaya.

³ Iatuheteso san rei, "Anahatana ne anamanaya raasau ata mka Ia Aia wain Anahatana Ihitiki na Iapuheu ne Mansiau sinsarai, oyo iamahaiki honu iarihoni sio matana. Yesus rei, au wani usima osimo, ia wain Ia Aia wain Anahatana Ihitiki na Iapuheu ne Mansiau rei."

⁴ Sio Yahudiu umau oparisaa tau maunaune rei, oyo okata Paulus runa Silas runa sio Yunaniu panesi wason oamuiira Anahatana panesi runa sio pina onata panesi oi.

⁵ Sio Yahudiu umau opusu Paulus sio, reiso sio Yahudiu tamena oanana. Opusu sio rei tewa nea. Reiso oamanou sio kahatena umau wason orurueso ria pasar. Oamanou sio rei, oyo pusiso ouna purie ohori sui kota rei. Sio oruru umau otentene na onusu pan Yason ne numa onina

Paulus runa Silas, nanie oautunso oamanane sio hutue.

⁶ Ne osupu uaso tewa. Reiso onesa Yason runa sio wason oparisaa umau honu, oyo ororiso oamanane sio mainaya tau kota rei. Hoka pan oyo, oakapona san rei, "Sio rei ouna sio pusiso ouna purie sui supan-supan man mai tuniai reini. Muie reini mo, sio ohokaso mai kota reini oi.

⁷ Yason iapusaaso pan ne numa nea. Sio pusiso openeso opusu Ia Aia Mainae Roma ne maunauna. Sio oasau ata wain ia natu tamene wain nanai Yesus."

⁸ Sio oasau san rei, oyo sio hutue runa sio mainaya tau kota rei anoo rauponu.

⁹ Reiso sio mainaya oaisosi Yason runa sio wason oparisaa osenu kepen umau. Osenure na pene ouna sio hutue ouna purie nea. Osenure, samatoro oalapisiso.

Paulus iaunauso poe nia Berea

¹⁰ Pumono pan san rei oyo, sio wason oparisaa oaisosi Paulus runa Silas oeuso poe nia Berea. Hoka poe oyo, onusu pan sio Yahudiu no numa mananoune.

¹¹ Sio Berea oatinu tau maunau honue iake renesi sio Tesalonika. Reiso sio no suka oatinu maunaune rerihoni Yesus. Ranie hatae isa, ereeu mai poua tonu rei sio oari-arinii Anahatana ne anamanaya sui osa na onoo taa kani Paulus ne maunaune rei, pannuhu runa Anahatana ne maunauna te tewa.

¹² Reiso sio panesi oparisaa runa sio pina ona Yunaniu panesi runa sio hanaiya oi.

13 Sio Yahudiu pan Tesalonika oatinu ata Paulus wain isima na Anahatana ne anamanaya osi sio poe Berea oi, oyo sio umau ohoka poe. Ohoka poe, nanie ouna sio poe rei ouna purie runa openeso tau Paulus.

14 Reiso sio wason oparisaa oaisosi Paulus sio oeuso sansana nau nuae. Ne Silas runa Timotius orueso ria Berea asi.

15 Sio umau oautunu Paulus rotu-tu ohokaso poe kota Atena, oyo onunso pan Berea. Paulus iaisosiso oasau osi Silas runa Timotius san rei, "Oeu sansana mai."

Paulus iaunauso poe kota Atena

16 Paulus wain inapa Silas runa Timotius poe kota Atena, oyo anoi mtinte. Tau sae, inoo anahatanau waron titue tewa tika onata sui kota rei.

17 Reiso ihunu anamanae runa sio Yahudiu na sio tamenae wason oamuiara Anahatana pan numa mananoue osi sio Yahudiu. Ranie hatae isa, ereeu mai poua tonu rei ihunu anamanae sui osa runa sio wason isupuso poe pasar oi.

18 Sio matuhetena wason oanei panesi rerihoni tikane Epikuros runa tikane Stoa ohunu anamanae runai oi. Sio umau oasau san rei, "Ia reini mo, ianei sae? Iasau ata ianei sae isa. Aikee iasau sae isa tewa wani iake." Sio umau honu oahata, "Kani wain isima na sio rakana no anahatanau?" Sio oasau san rei tau isima na Sou lake rerihoni Yesus imatai oyo iamahaiki honu.

19 Reiso sio ororiki roe mananoue runa sio onata roe pupue wani nanai Areopagus. Hoka roe oyo, oasau osiki, "Ami nanie atinu rerihoni ano me maunau honue rei wani ano atuhete.

²⁰ Ano atuhetema tau maunau honue rei, ami asira atinui. Reiso ami nanie atinu. Areimo sapan?”

²¹ (Sio Atenau pusiso runa sio rakana wason orue poe Atena pusiso oru-rueso oanamana runa oatinu rerihoni maunau honua man. Onana tanei tewa. Ohunu anamanae rerihoni maunau honue man.)

²² Reiso Paulus ihitio roe, iamanane sio wason oamanouso roe Areopagus rei, oyo iasau, “Omi Atenau! Unoo ata omi oamuiira anahatanau panesi.

²³ Tau sae, au ueu uhoru omi mo kota rei, oyo unoo naniamo oainaa tanre. Unoo naniamo isa, sio okanu san rei tau naniamo rei, ‘Osi anahatana wani iationai tewa.’ Reiso Anahatana rei, wain omi oainisi oainaa runai ne oationai tewa, ia reimo, wain au usima osimo rei.

²⁴ Anahatana rei sahoro ihaye tuniai reini runa pusire waron. Ia wain ia natu tau sio pusiso roe noiyaha runa sio pusiso mai tuniai reini. Iruei pan numau waron tumatau onanare tewa.

²⁵ Erehanaki inina sae isa rerihoni tumatau tewa. Kahurae tumatau oakahaiki tewa. Ia sahoro iapuhai tumatau. Iapuhaiso runa irui pusire osiso.

²⁶ Ihaye sio niana pusiso rerihoni ia osa man na sio orueso sui supan-supan man mai tuniai reini. Naone iasau inasa oamahaiso runa orueso supa samatoro oamahaiso.

²⁷ Ihaye tumatau na sio oninai. Kani oninai, oyo kani osupui? Aikee Anahatana wain hainau rerihoni ita sana osa-osa tewa.

²⁸ Anahatana sahoro iapuhaita, iuna ita nisuri, runa wani mai tuniai reini. Areimo sani omi

mo mamsimaya umau oasau ata, 'Ita pusita ne hehuka.'

²⁹ Reiso ita mo, ita Anahatana ne hehuka. Reiso iake tewa kani ita iahata Anahatana mo, sani siaie rerihoni hunahane te? Sanaa te? Hatu te? Siaie, sio ounai pusu tumata ianei man.

³⁰ Naone sio oanei Anahatana ne maue tewa, reiso Anahatana iapasanaso sansana tewa. Ne muie reini mo, iaisosi sio pusiso mai tuniai reini oarihoni no rosau.

³¹ Tau sae, ihete umetene nea na mka iarinii sio tuniai reini pusiso manisate. Iarinii ia sia wain titue na ia sia wain titue tewa. Ia wain mka iariniiso, Anahatana ihitiki nea. Anahatana iapuhaiki honu rerihoni sio matana nea na ita ianei mka iariniita."

³² Sio oatinu Paulus iasau ata Anahatana iapuhaiki honu rerihoni sio matana, oyo sio umau oaumaniki. Ne sio uamu honu oasau, "Ami nanie atinu ano anamana rerihoni rei honu."

³³ Oyo Paulus ieu iarihoni sio rei.

³⁴ Ne sio umau okata Paulus, oyo oparisaa tau Yesus. Tau sio rei wason Dionisius, ia onate isa runa sio Areopagus, runa ia pina isa wain nanai Damaris runa sio umau honu.

18

Paulus iaunauso poe kota Korintus

¹ Oyo Paulus ieu iarihoni kota Atena. Ieu rotutu ihokai poe kota Korintus.

² Hoka poe oyo, isupu ia Yahudi isa nanai Akwila. Ia ne niane wanau otoa Pontus. Akwila mato ihokai on nau otoa Italia ikata sahai Priskila. Tau sae, ia natu Roma wain nanai Klaudius iaisosi sio Yahudiu pusiso oeu oarihoni

kota Roma nea. Roma wani kota inae pan Italia. Reiso Paulus ieu inoo uaso,

³ oyo iruei ikataso. Tau sae, pusiso no tanei osa. Tonuso onana numau rerihoni makapana unte na oahenre, reiso onana tanei okata umau.

⁴ Tau ranie hatae wan sio Yahudiu oamuirā Anahatana iaunauso pan numa mananounē osi sio Yahudiu sui osa, nanie iapamanuso na sio Yahudiu runa sio wason sio Yahudiu tewa pusiso oparisaa ata Yesus wain Ia Aia wain Anahatana Ihitiki na Iapuheu ne Mansiau.

⁵ Silas runa Timotius ohokaso poe Korintus on pan otoa Makedonia, oyo Paulus isima na Yesus man. Inana numau rerihoni makapana unte tewa nea. Isima osi sio Yahudiu ata Yesus wain Ia Aia wain Anahatana Ihitiki na Iapuheu ne Mansiau rei.

⁶ Ne sio Yahudiu onesiki, oyo omakaniai. Reiso isihotata tapuna rarihoni ne papite na sio oanei ata ipenei tau sio nea. Oyo iasau, “Mka Anahatana iapasanamo, omi ruamo osana. Au mo usana tewa. On ranie hatae reini mo, au ueu uaunau sio wason sio Yahudiu tewa.”

⁷ Oyo ieu iarihoni sio rei, oyo ieu pan numa isa wapan numa mananounē nusue. Numa rei wani Titius Yustus ne numa. Ia Yahudi tewa ne iainaa runa Anahatana sani sio Yahudiu.

⁸ Ne Krispus, ia mainae tau numa mananounē rei, runa ne numa matae pusiso oparisaa tau Upuri Yesus. Sio Korintus panesi honu oatinu tau Paulus ne maunauna, oyo oparisaa tau Yesus, oyo sio osohuso na mansiau oanei ata oarihoni no rosau nea.

⁹ Taue isa, tau pumono, Paulus ineke masasua.

Tau ne masasua rei, Upuri iasau osiki, “Pene kaitau! Aunauso sirinia. Pene amaturua.

¹⁰ Tau sae, au wani ukata runaya. Reiso ia isa iae, mka iuna kahatene tau ano tewa. Tau sae, mai kota reini wason sio panesi mka ouna we mansiau.”

¹¹ Reiso Paulus iruei poe Korintus rotu-tu musum, hunana nome iatuheteso tau Anahatana ne maunauna.

¹² Galio wain ia ne kawasa tau otoa Akhaya, oyo sio Yahudiu osota Paulus, nanie ororiki pan ia ne kawasa iapasanai.

¹³ Hoka pan oyo, oasau, “Ia reini mo, wain iapumanuso na oainisi oainaa runa Anahatana pusu sae waron Musa ne maunauna rasopo.”

¹⁴ Paulus nanie ianamana, ne Galio iasau osi sio Yahudiu san rei, “Oatinu omi Yahudiu! Sinana omi oamanarui tau ipusu maunau kupania tewa te iuna kahatene, mka au uatinu tanumo.

¹⁵ Ne omi otuntana rerihoni anamanaya, nanao, runa ruamo mo maunauna. Reiso kahurae omi ruamo ohunu anamanae. Upeneku uarinii parakana wan san reini.”

¹⁶ Oyo ineiso ohokaso rerihoni naniai iapasanaso rei.

¹⁷ Oyo sio osota Sostenes, ia mainae tau numa mananouna rei, oyo ohitai pan naniai iapasanaso roe uae. Ne Galio iuna sae isa tewa.

Paulus ieu ihori rotu-tu inuniki pan kota Antiokhia

¹⁸ Oyo Paulus iruei potuina poe kota Korintus, oyo iauhaa sio wason oparisaa poe rei. Iauhaaso, oyo isaa kapane ikata Priskila runa Akwila, nanie

ieui nau otoa Siria. Ne nau nia Kengkrea iatori unui ipusu monne naone. Isopa osi Anahatana, reiso iatori unui na sio oanei ata ipamanisa sae wani isopa rei nea.

¹⁹ Oyo osaa kapane rotu-tu ohokaso nau kota Epesus. Hoka nau oyo, Paulus ieu iarihoni Priskila runa Akwila, oyo inusui pan numa man-anoune osi sio Yahudiu, nanie ihunu anamanae runa sio Yahudiu.

²⁰ Sio oainisi nanie iruei potuina runa sio. Ne ipenei.

²¹ Ne iauhaaso san rei, “Mka uhokaku honu, hete sae Anahatana ne maue san rei.” Iauhaaso san rei, oyo isaa kapane ieu iarihoni Epesus.

²² Hoka nau nia Kaisarea oyo, Paulus isipui, samatoro ieu roe kota Yerusalem, nanie iatapea sio wason oparisaa roe rei. Iatapeaso, oyo ieu honu rotu-tu ihokai poe kota Antiokhia.

²³ Hoka poe oyo, iruei hunane san rei, samatoro ieu honu. Ieu ihori niana sui otoa Galatia runa otoa Prigia na iakahai sio wason oparisaa na oparisaa ia-ia.

Apolos iaunauso poe kota Epesus runa nau kota Korintus

²⁴ Ia Yahudi isa wain nanai Apolos ihokai mai kota Epesus. Ne niane wani Aleksandria. Ianei ianamana iake. Ianei Anahatana ne anamanaya ia-ia.

²⁵ Sio oatuhetei nea rerihoni Upuri ne arena. Anoi mirike runa iatuhetesu pannuhu rerihoni Yesus. Ne hasae ianei ata Yohanis isohuso na mansiau oanei ata oarihoni no rosau nea.

²⁶ Hoka mai oyo, mataanoe inusui pan numa mananoune osi sio Yahudiu, oyo iaunauso. Ikaitau tewa. Priskila runa Akwila oatinui iatuheteso, oyo ororiki poe sio no numa. Hoka poe oyo, oatuhetei pannuhu rerihoni Anahatana ne arena na iapuheuso na oamahaiso rotu-tu ria supan pusu Yesus.

²⁷ Oyo Apolos nanie ieui nau otoa Akhaya. Reiso sio wason oparisaa poe Epesus oakahaiki tau no maunauna, oyo okanu surate osi sio wason oparisaa nau Akhaya na sio oatarimai iake.

Reiso ieui nau Akhaya. Hoka nau oyo, iakahai panesi sio wason oparisaa. Anahatana irui iake osiso nea, reiso oparisaa tau Yesus nea.

²⁸ Apolos iakahaiso tau ituntana mainae runa sio Yahudiu rotu-tu ikuaso. Sio panesi oatinui. Ikuaso tau iatuheteso rerihoni Anahatana ne anamanaya ata titue, Yesus wain Ia Aia wain Anahatana Ihitiki na Iapuheu ne Mansiau.

19

Paulus iaunauso poe kota Epesus

¹ Apolos waipo kota Korintus asi, oyo Paulus ieu ipusu arena suru ria rotu-tu ihokai nau kota Epesus. Hoka nau oyo, isupu sio mampusua umau.

² Isupuso, oyo iasei tanso, “Omi osupu Anahatana Ne Inaha nea pannuhu omi oparisaa?”

Sio on poe oasau san rei, “Tewasi. Ami atinu tewasi ata Anahatana Ne Inaha wain.”

³ Oyo Paulus iasei honu, “Reiso omi oparisaa tau sae, oyo sio osohumo na mansiau oanei ata oarihoni mo rosau nea?”

Oahata, “Ami aparisaa tau Yohanis ne mau-nauna waron iatuheteso tanure oyo isohuma.”

⁴ Iahata, “Yohanis isohu sio wason oarihoni no rosau. Iaunauso ata kahurae sio oparisaa tau ia mka ihokai tau muie. Ia reimo, Yesus.”

⁵ Sio mampusua rei oatinu tau rei, oyo oparisaa tau Upuri Yesus. Reiso Paulus sio osohuso.

⁶ Paulus iahusieso, oyo Anahatana Ne Inaha ihokai tanso. Ihokai tanso irui kawasa osiso na sio oanamana tau sou waron oaneire tewa runa osima runa maunauna on roe Anahatana.

⁷ Sio rei wason sio hutusa rahana uasa san rei.

⁸ Paulus iaunauso ikaitau tewa pan numa mananounne osi sio Yahudiu sui osa rotu-tu hunana tonu rai. Iapamanuso na otapi Anahatana irimeso.

⁹ Ne sio umau unuo onata reiso openeso oparisaa. Sio omakania Paulus ne maunauna rerihoni sapani na Anahatana nanie ita tumatau iamahaita. Sio omakania ne maunauna, sio panesi oatinu. Reiso Paulus ieu iarihoniso, oyo ieu ikata sio mampusua pan Tiranus ne kakaranae mainae. Hoka pan oyo, iatuheteso sui osa. Ranie hatae isa, ereeu mai poua tonu rei iatuheteso.

¹⁰ Iuna san rei rotu-tu musum ua. Reiso sio pusiso wason orueso poe otoa Asia, sio Yahudiu runa sio tamena pusiso, oatinu maunauna rai rerihoni Upuri.

¹¹ Anahatana iuna sima-simana waron sio onoare panesi tewasi. Iuna sima-simana rai pusu Paulus.

¹² Paulus ne nipae sinte wani iasamau uai anoe tanui te ne nipae wani inene ahai tanui, sio onanare osi sio kupua, oyo sio kupua iaka runa sakahatena waron rasuniso raeu rarihoniso.

¹³ Wasoni sio Yahudiu umau oeu ohori onei sakahatena raeu rarihoni sio wason sakahatena rai rasuniso. Sio rei ohete rea Yesus nanai na onei sakahatena oasau san rei, "Au uaisosia ahokaya tau Yesus wain Paulus isima nnai nanai."

¹⁴ Ia imam onate wain nanai Skewa ne hehuka hanaia, sio itu. Sio ouna san rei oi.

¹⁵ Ne ia sakahatene wani sio nanie oneiki rei, reasau san rei, "Yesus, au uationai. Paulus oi, au uationai. Ne ano mo, ano seia rei?"

¹⁶ Oyo ia wain sakahatene remasuniki rei isoman, oyo inesi ituso. Ihitaso rotu-tu no papita wakihare runa no apata panesi. Oyo oruma sanakuso oarihoni numa rei.

¹⁷ Sio Yahudiu runa sio tamena pusiso wason orueso poe Epesus oatinu tau rei, oyo okaitau hun ruao. Reiso Upuri Yesus nanai, sio oamuirai.

¹⁸ Sio panesi wason oparisaa tau Yesus nea ohokaso, oyo oamanaku no kahatena na sio panesi oatinu.

¹⁹ Sio wason naone ouna pakakasi oamanou no surata pakakasi rai, oyo oakanupure. Oakanupure na sio panesi oasumata. Surata rai nene hunonia mainaya. Pusire sani sanaa inata nihi hutu nima.

²⁰ Reiso sio oaunau sio panesi honu runa maunaune rerihoni Upuri Yesus runa sio panesi opusui ia-ia.

²¹ Areimo san rei, oyo Paulus iapamata sou pusu Anahatana Ne Inaha nanie ieui sui otoa Makedonia runa otoa Akhaya rotu-tu ihokai roe kota Yerusalem. Iasau, “Mka au uhokaku roe Yerusalem, oyo kahurae ueuku roe kota Roma oi.”

²² Reiso iaisosi ne makahaia ua. Sio reimo wason Timotius runa Erastus. Iaisosiso poe Makedonia, oyo ia ruai iruei mkane honu poe otoa Asia.

Sio ouna purie poe kota Epesus

²³ Tau muie rei sio umau ouna purie mainae poe kota Epesus. Tau sae, sio openeso tau Paulus ne maunauna rerihoni sapani na Anahatana iapuheuta na iamahaita rotu-tu ria supan pusu Yesus.

²⁴ Poe kota rei, ia tukane sanaa (sanaa, nooi sani hunahane ne putie) isa nanai Demetrius waipo. Inana numa ikina osi sio no anahatana wani titue tewa nanae Artemis. Noore sani Artemis ne numa mainae. Sio mamnana numa ikina rei oahenre, oyo osupu kepen panesi.

²⁵ Ianaha runa sio mamnana numa ikina rei pusiso runa sio tukana sanaa tamena, oyo iasau osiso, “Wea kakau, wea waniu. Omi oanei ata ita isupu kepen panesi rerihoni re tanei rei.

²⁶ Ne omi ruamo onoo runa oatinu nea ata Paulus reini mo, iuna sio oparisaa ata anahatanau waron sio onanare tau hanao waron titue tewa. Iapamanu sio panesi mai Epesus ruae runa sio panesi sui otoa Asia pusiki oi.

²⁷ Reiso mka sio omakania ita re tanei. Ne renesi rei, mka sio oahata Artemis ia mainae ne numa wani mainae tewa nea. Mka sio ouna Artemis, wani sio pusiso mai Asia runa tuniai reini pusiki oainisi oainaa runai, mka sio ounai remnahui.”

²⁸ Sio oatinu tau rei, oyo anoo rasaa, oyo oaka-kapona, “Arue nai-naia Artemis, ita Epesus re anahatana!”

²⁹ Oyo sio rei runa sio panesi honu oeu ouna purie sui kota rei. Sio osota Gayus runa Aristarkhus, sio Makedoniau wason oeu okata Paulus, oyo onesa uaso. Oyo pusiso oamanouso tau osa orumaso roe tihue wani sio hutua pan kota rei oamanouso tanui.

³⁰ Paulus nanie inusu ipusu sio hutue rei na ianamana inete ruai tau sio. Ne sio mampusua osopoi.

³¹ Sio onata umau tau otoa Asia oi oaisosi sio umau na oasau osiki na pene ieui roe sio hutue rei. Sio onata rei wason Paulus ne netau.

³² Areimo san rei, oyo sio hutue ouna purie. Ia isa iakapona san rei, oyo ia isa iakapona tamene. Tau sae, sio oanei tewa sio hutue wason oamanouso tau sarei. Hasae opusu sio wason ouna purie man. Oarinii tewa.

³³ Sio Yahudiu oruru Aleksander roe uae iamanane sio hutue na ianamana tau sio pusiso. Sio oaunau rerihi mka iasau sapan. Reiso Aleksander isopa hanai na sio hutue oamaturuso, nanie ianamana inete ruai runa sio Yahudiu pusiso tau sio hutue rei. Nanie iasau osiso ata ia runa sio Yahudiu okata Paulus tewa.

³⁴ Ne sio hutue onoo ata ia Yahudi, oyo oaka-

kaponā nioo oſa rotu-tu yam ua ſan rei, “Arue nai-naia Artemis, ita Epesus re anahatana!”

³⁵ Oyo ia sekretaris tau kota rei iuna ſio hutue rei oamaturuso. Oyo iasau oſiso, “Omi Epesus! Sio puſiso oanei ata ita mai Epesus oſaka Artemis ia mainae ne numa runa hatu monne wani remnahui on roe nante, tea?

³⁶ Reiso ia ſeia mka iauhaa ata titue? Reiso oamaturumo. Pene ouna ſae iſa oarinii tewasi.

³⁷ Sio ua rei, omi ororiſo mai rei. Aikee okimanaka api monne rerihoni ne numa tewa. Orati ſohi re anahatana rei tewa.

³⁸ Munata Demetrius runa ſio tukana ſanaa tamena nanie oamanaru ia iſa, kahurae ſio oapusa parakana noi ſio no kawasa oapasana. Sio oheſe umetena nea na ſio oatinu tau parakanau. Sio no kawasa oapasana waſon.

³⁹ Ne munata omi nanie oakarupu honu, kahurae ſio oapamata ſou tau loue pannuhu ſio onata waſon no kawasa oamanouſo.

⁴⁰ Tau ſae, omi ouna purie ſani ſinaſi rei, mka ita mtinte. Sio onata waſon no kawasa tau ita mka oasau ata ami atapimo na ouna purie. Ne ami mka aſau ſapan?” Iasau ſan rei, oyo iaiſoſi ſio hutue rei onunſo.

20

Paulus ieu ihoſi otoe Makedonia runa otoe Yunani

¹ Sio ouna purie tewa nea, oyo Paulus ianaha runa ſio mampusu Yeſus, oyo iakahaiſo tau ne maunauna na opariſaa ia-ia. Iaunaſo, oyo iauhaaſo ſamatoro ieu iarihoni kota Epesus, nanie ieu i poe otoe Makedonia.

² Ieu ihori otoa rei iakahaiso tau ne maunauna. Irui maunauna panesi osiso. Oyo ieui poe Yunani.

³ Hoka poe oyo, iruei hunana tonu. Nanie isaa kapane nau otoa Siria nea, oyo iatinu ata sio Yahudiu oheu nanie ohunui. Reiso iapamata sou na inuniki pan Makedonia honu.

⁴ Sio umau oeu okata Paulus. Sio reimo wason: Sopater, (amai tau Pirus, ia Berea), Aristarkhus, Sekundus, (ia Tesalonika), Gayus, (ia Derbe), Timotius, Tikhikus, (on pan otoa Asia) Trofimus, (on pan otoa Asia oi).

⁵ Ituso oeu oanaone, oyo onapa au, Lukas, runa Paulus pan nia Troas.

⁶ Karisaa sio Yahudiu oai poroti resaa tewa pusiki nea, oyo ami asaa kapane aeu arihoni nia Pilipi. Oyo nima rei amanouma honu runa sio rei pan Troas. Oyo aruema pan rei onona itu.

Paulus iapuhai Eutikhus pan Troas

⁷ Tau onone mataanoererihoni minggu unue rei ami amanouma runa sio wason oparisaa na ai porotiu tau osa anoma rapeka runa Yesus imatai. Hanroe Paulus nanie ieui nea reiso iau-aunauso rotu-tu saa monon tihu.

⁸ Iaunauso roe kakaranae roe naue. Roe kakaranae rei, wani ami amanouma tanui, kamana panesi raai.

⁹ Ia honue isa nanai Eutikhus iruei roe yanela. Paulus iau-aunauso rotu-tu potuina reiso Eutikhus isue-suei mainae rotu-tu inekai munui roe yanela rei. Inekai munui oyo, iamnahui poe

tuamane on roe napisi tonu. Sio okaisunu, oyo ohetui. Ohetui, imatai nea.

¹⁰ Ne Paulus ikaisunu oyo ikahahiota roe tinain iatipuniki. Iasau osiso, “Pene anomo rauponu. Iamahaiki honu.”

¹¹ Iasau pusi san rei oyo, Paulus isaa roe honu samatoro ikuparehi porotiu, oyo isama pusiso na oaiso tau osa. Ita iau-aunauso potuina honu rotu-tu manahane, oyo ieu iarihoniso.

¹² Paulus ieui, oyo sio oeu oautunu ia honue rei wain iamahaiki na inuniki pan numa. Sio oahana anoo iaka nea.

Paulus ieui on pani Troas Rotu-tu ihokai pan Miletus

¹³ Ami aeuma nau kapane, oyo asaa nanie aeuma pan Asosi naone na asupu Paulus pan rei. Asupui na isaa ikatama. Paulus iautue san rei nea nanie ieui suru pan, ieu tau ain.

¹⁴ Isupuma pan Asos, oyo isaa roe kapane samatoro pusima asaa nau kota Metilene.

¹⁵ Ita hanroe asaa honu rotu-tu ahokama haineke nusa Khios. Pouarei ahokama nau nusa Samos. Ita tonurei ahokama nau kota Miletus.

¹⁶ Paulus iapamata sou nea nanie isaa iniku Epesus na pene iapuari pan otoi Asia. Nanie ieu rapu na ihokai roe Yerusalem tau ranie hatae mainae rei sio oaoiki tau Pentakosta.

Paulus iaunau sio onata on pan Epesus

¹⁷ Hoka nau Miletus oyo, Paulus iaisosi ia isa ieu ria Epesus nanie ianaha runa sio onata tau sio wason oparisaa.

¹⁸ Sio ohokaso mai tanui oyo iasau osiso, “Wea amau, wea kakau, wea waniu. Omi oanei nea

sapani na uamahaiku kua omi tihue on ranie hatae mataanoë uhokaku mai Asia rotu-tu reini.

¹⁹ Masike sio Yahudiu ouna sinsaraku tau no kaheu kahatena rai, au unana tanei uanori runa Upuri. Uanori runai uhati ruaku tewa. Anoku runamo rotu-tu matakua waena.

²⁰ Omi oanei ata usima pusire osimo nea. Uauhuni maunaune isa rerihonimo tewa wani mka rekahaimo. Au uatuhetemo tau sio pusiso oamanouso. Au uatuhetemo sui mo numau oi.

²¹ Au uaunau sio Yahudiu runa sio wason sio Yahudiu tewa pusiso na sio oarihoni no rosau. Oarihoni no rosau oyo, opusu Anahatana runa oparisaa tau Upuri Yesus.

²² Muie reino mo Anahatana Ne Inaha iaisosiku ueuku roe Yerusalem. Reiso nanie ueuku roe rei nea. Au uanei tewa mka roe rei au sapan.

²³ Hasae uanei ata noi niana pusire, Anahatana Ne Inaha isima osiku nea ata mka sio onusuku pan pui anoe runa ouna sinsaraku.

²⁴ Ne ukaitau tewa rerihoni mka umataku. Hete nanie unana we tanei pusiki wani usupui on roe Upuri Yesus. We tanei rei, areimo usima runa Sou Iake rerihoni sapani na Anahatana irui iake mainae osiso.

²⁵ Reiso oatinu. Au ueu uhuri sui omi pusimo usima ata Anahatana irime ne mansiau nea. Ne uanei nea ata on ranie hatae reini omi onooku tewa nea.

²⁶ Reiso ranie hatae reini uasau osimo. Kani mka ia isa rerihoni omi reini imatai oyo inusu usa mainae, au usana tewa.

²⁷ Tau sae, au uauhuni Anahatana ne mau-naune isa iae tewa. Usima ne maunauna pusire

osimo nea.

²⁸ Reiso osaka ruamo runa sio wason oparisaa pusiso. Anahatana Ne Inaha ihitimo na osakaso nea. Osaka sio wason oparisaa sani ia mamsakae isaka ne rompau. Sio ouna Anahatana ne mansiau pusu anai imatai.

²⁹ Au uanei nea ata mka ueu uarihonimo, oyo sio kahatena umau ohokaso tanumo anoo runamo tewa. Sio sani asu manene anoe runa rompau tewa.

³⁰ Rerihoni omi ruamo oi, mka sio umau osima runa anamanaya waron titue tewa na ouna sio wason oparisaa tau Yesus opusu sio ruao.

³¹ Reiso ainati. Anomo rapeka nna sapani na uarihoni uaunaumo tewa. Uaunaumo tau onone tau ranie rotu-tu musum tonu rai. Uaunaumo anoku runamo rotu-tu matakua waena sui osa.

³² Muie reini mo, uainisi tau Anahatana na isakamo. Uruimo osi Anahatana. Uruimo osi Anahatana ne maunauna rerihoni sapani na irui iake osita na maunauna rai rakahaimo. Pusu omi opusu ne maunauna rai mka irui iake osimo sani iruiki osi sio pusiso wason iuna anoo manisata.

³³ Au rotu-tu reini nanie unana ia isa ne kepen te, papita te, unanare osi ruaku tewa.

³⁴ Omi oanei nea ata au ruaku unana tanei na uhane muaine na pusire osi au ruaku. Uhane osi we netau wason okataku oi.

³⁵ Tau pusire waron au una, uatuhetemo nea ata tau inana taneiu panesi san rei, kahurae ita iakahai sio wason okua tewa. Kahurae ita anori rapeka runa Upuri Yesus ne maunaune rei wani iasau, 'Anom iake mainae pusu arui osi sio umau renesi asupu sae isa osi ruam.' "

³⁶ Iasau pusi san rei oyo, irike tune. Irike tune oyo, iainisi osiso.

³⁷ Sio pusiso orani. Orani oyo, oatipuniki runa omukiki nanie oauhaai.

³⁸ Sio anoo karaka mainae tau Paulus iasau on ranie hatae reimo sio onooi tewa nea. Oauhaai oyo, oautunuma nau kapane.

21

Paulus sio osaa kapane nanie oeuso roe Yerusalem

¹ Ami auhaa sio onata rei pan Epesus, oyo aeuma arihoniso asaa kapane. Kapane rei reruma katopu rotu-tu ahokama nau nusa Kos. Hoka nau oyo, hanroe reruma honu rotu-tu ahokama nau namane Rodos. Hoka nau Rodos oyo, kapane reruma honu rotu-tu remamanui nau nia Patara.

² Hoka nau oyo, asupu kapane isa nanie reruma nau otoi Penisia. Reiso ami asaa kapane rei.

³ Asaa rotu-tu anoo nusa Siprus hae pante. Aeu anikui rotu-tu ahokama nau otoi Siria. Kapane reruma rotu-tu remamanui nau kota Tirus na sio opaki apia rerihoni kapane rei.

⁴ Reiso ami asupu sio wason oparisaa tau Yesus umau nau rei, oyo aruema akataso rotu-tu onona itu. Sio oasau osi Paulus pusu Anahatana Ne Inaha na pene ieu roe Yerusalem nea.

⁵ Ne kahurae aeu arihoniso, oyo aeuma honu. Reiso sio pusiso, sio hanaia, sio pinau runa ne hehuka pusiso oautunuma rotu-tu ohokama rerihoni kota rei. Oyo arike tune nau nuae nusue samatoro ainisi tau Anahatana.

⁶ Anamana runa Anahatana pusi, oyo auhaa umau. Oyo asaa kapane honu samatoro sio panesi rei onunso.

⁷ Asaa kapane honu on poe Tirus rotu-tu ahokama pan nia Ptolemais. Hoka pan oyo, atapea sio wason oparisaa pan rei. Aruema akataso onone osa.

⁸ Nene hanu roe oyo, aeuma honu rotu-tu ahokama pan Kaisarea. Hoka pan oyo, aeuma ria Pilipus ne numa. Pilipus wain ia mamsima runa Sou lake osi sio wason oatinui tewasi. Ia osa wain rerihoni sio makahai sio mamparisaa itu rei wason ohitiso roe Yerusalem.

⁹ Ia ne sio pina hehuka ate. Osupu kawasa on roe Anahatana na osima-sima runa ne anamanaya.

¹⁰ Aruema onona inasa rai oyo, ia mamsima runa Anahatana ne anamanaya isa nanai Agabus ihokai on pan Yudea.

¹¹ Ihokai mai tanuma oyo inana Paulus ne koropou unte. Inanai oyo, ikanihoo ruai ain atua runa hanai atua tau koropou unte rei. Oyo iasau, "Anahatana Ne Inaha iasau san rei, 'Ia ne koropou unte rei, mka sio Yahudiu okanihooi san rei roe Yerusalem, oyo oruiki osi sio wason sio Yahudiu tewa.' "

¹² Ami atinu san rei oyo, ami runa sio mamparisaa pusiso wason orueso poe rei osopo Paulus, "Pene aeua roe Yerusalem nea."

¹³ Ne Paulus on poe iasau, "Omi wani orani ouna anoku karake na pene ueuku roe Yerusalem, nanie tahae? Masike sio onusuku pan pui anoe, oyo ohunuku tau upusu Upuri Yesus iae, au nanie ueuku roe rei sirinia."

¹⁴ Paulus ipenei iatinu tanuma. Reiso asopoi tewa nea. Asau, “Ami ainisi na reeu pusu Upuri ne maue.”

¹⁵ Aruema poe rei onona inasa rai, oyo autotu mani apia. Autotu mani apia pusi oyo, aeuma roe Yerusalem.

¹⁶ Sio mampusua umau on poe Kaisarea oeu okatama nanie oautunuma roe Manason ne numa. Nanie araranema roe ne numa rei. Manason, ia rerihoni nusa Siprus. Iparisaa tau Yesus potuina nea.

Paulus sio ohokaso roe Yerusalem

¹⁷ Hoka roe Yerusalem oyo, sio wason oparisaa oatapeama anoo iaka.

¹⁸ Hanroe oyo, Paulus ieu ikatama nanie inoo Yakobis, ia mainae tau sio wason oparisaa. Sio onata tau sio wason oparisaa nesia rei wason oi.

¹⁹ Paulus iatapeaso, oyo isima runa pusire waron Anahatana iuna pusu ia sui sio wason sio Yahudiu tewa.

²⁰ Sio oatinu Paulus isima san rei oyo, pusiso oainaa runa Anahatana. Oyo oasau osi Paulus san rei, “Kakaku Paulus. Kahurae ano anei ata wason sio Yahudiu nihi-nihun san rei oparisaa tau Yesus nea. Sio pusiso orime kuru Musa ne maunauna.

²¹ Sio rei oatinu ata ano atuhete sio Yahudiu wason orueso sui sio tamena na pene opusu Musa ne maunauna. Sio oasau ata ano aunauso na pene orehi sio ikina runa pene opusu no monna tamena.

²² Kani iuna sae? Mka sio oatinu ata ahokaya nea.

²³ Reiso ami mani maunaune san rei. Sio ate mai ami reini osopa osi Anahatana nea.

²⁴ Ae u akataso runa apusu monne atipusi runa ateso. Asenu makapanau waron kahurae ateso ohane na orehire osi Anahatana. Asenure na sio okoma unuo. Mka sio onoo, oyo oanei ata sio oatinu resana rerihoni ano. Ne sio onoo ata ano apusu Musa ne maunauna sirinia.

²⁵ Ne rerihoni sio Yahudiu tewa wason oparisaa tau Yesus nea, ami auwatu surate osiso nea na asima runa sapani na apamata sou na pene oai muaine wani sio oruiki osi anahatana wani titue tewa, pene oai makapana nene nasie, pene oai henate rerihoni makapana wani sio oakinenei, runa pene okaparua.”

²⁶ Reiso Paulus ieu ikata sio ate rei, oyo hanroe iatipusi pusu monne runa ateso. Oyo onusu pan Anahatana ne numa mainisie nanie ohete umetene pannuhu oatipusi pusu monne pusiki na orehi makapanau osa-osa osi Anahatana.

Ia Aia Mainae Roma ne soratatua oaresi Paulus

²⁷ Onona itu rai haineke pusire nea, oyo sio Yahudiu umau on poe otoi Asia onoo Paulus pan Anahatana ne numa mainisie nene nusue. Oyo ouna sio hutue ouna purie samatoro osotai.

²⁸ Osotai oyo oaka-kapona, “He omi Israel. Masi oeu mai na oakahaima. Ia reini sahoro ieu ihori sui supan-supan man iatuheteso na openeso tau ita Yahudiu. Iatuheteso na pene opusu Musa ne maunauna. Iatuheteso na pene oamaira Anahatana ne numa nusue reini. Muie reini irori sio wason sio Yahudiu tewa na onusu mai Anahatana ne numa mainisie reini na ia-paputi ne numa monne nea. Ne numa wani monne tau Anahatana wain tanui.”

²⁹ Sio oasau san rei tau naone sio onoo Trofimus, ia Epesus, ieu ikata Paulus sui kota rei. Anoo ranoa ata Paulus ieu ikatai mai Anahatana ne numa mainisie nene nusue oi.

³⁰ Sio pusiso sui kota rei anoo rasaa reiso ouna purie, oyo pusiso on nau, on ria orumaso tau osa mai Paulus nanie osotai. Osotai oyo, onesai ihokai rerihoni Anahatana ne numa mainisie rei. Mata hun tewa oyo, oraru Anahatana ne numa nene mitanunua pusire.

³¹ Sio hutue ohunu rea Paulus, oyo ia isa isima osi ia mainae tau Ia Aia Mainae Roma ne soratatua ata sio Yerusalem pusiso wason ouna purie.

³² Reiso ieu ikata sio soratatua runa sio onata umau, oyo orumaso poe sio hutue rei. Sio hutue rei onoo ia mainae runa sio soratatua, oyo ohita Paulus tewa nea.

³³ Ia mainae rei ihokai mai Paulus, oyo iaresiki nanie iasei tanui. Oyo iaisosiso okanihooi tau ranteu ua. Okanihooi oyo, iasei tau sio hutue, "Ia seia rei? Ne masana sae rotu-tu ouna san rei?"

³⁴ Sio umau oakapona san rei, sio umau oakapona tamene. Sio ouna purie reiso ia mainae iatinu sae isa tewa na ianei masana rei sapan. Reiso iaisosiso orori Paulus roe sio soratatua no numa hatu nanie iasei tanui roe rei.

³⁵ Ohokaso poe hantetane aikune, oyo sio hutue oruru umau nanie ohitai rotu-tu sio soratatua osiui ororiki.

³⁶ Sio hutue opusu, oakapona, "Ohunui!"

Paulus ianamana inete ruai

³⁷ Sio soratatua nanie onusu Paulus pan no numa hatu nea, oyo iasei tau ia mainae tau Ia Aia

Mainae Roma ne soratatua rei, “Au bisa uasau sae isa osia?”

Ia mainae on poe iasei, “Ano anei sou Yunani oi?”

³⁸ Reiso ano sahorō ia Mesir wani naone auna sio openeso opusu kupania, oyo autunu sio mamhunua nihi ate pan otoi hui, tea?”

³⁹ Paulus on poe iasau, “Au Yahudi, uamrai poe kota Tarsus, kota mainae poe otoi Kilikia. Au uainisi na atapiku uanamana osi sio hutue rei.”

⁴⁰ Oyo itapiki ianamana. Paulus ioo roe hantetane, oyo isopo tau hanai na sio oamaturuso. Reiso oamaturuso nea, oyo ianamana osiso tau sou Ibrani. Iasau san rei,

22

¹ “Wea amau, wea kakau, wea waniu. Oatinu na uanamana unete ruaku.”

² Sio oatinui ianamana tau sou Ibrani, oyo oamanutuso renesi wani sinasi rei. Reiso iasau osiso,

³ “Au mo, au Yahudi. Uamrai poe nia Tarsus poe otoi Kilikia. Ne au mo, au mainae mai kota Yerusalem reini. Gamaliel iatuheteku tau Musa ne maunauna waron isupure pusu rea upu. Upusu maunauna rai ia-ia. Urui ruaku na unana tanei osi Anahatana sani omi mai rei ranie hatae reini.

⁴ Una sinsara sio wason oparisaa tau Yesu rotu-tu sio umau omataso. Unota sio hanaia runa sio pinau pusiso, oyo unususo pan pui anoe.

⁵ Sio imam no ia mainae runa sio ona Yahudi nesia rei pusiso bisa osima ata areimo titue. Uakarota tewa. Usupu surata rerihoni sio onata rei osi rea kakau, rea waniu poe kota Damsyik na

ueuku poe kota rei, na unota sio wason oparisaa tau Yesus poe rei. Unotaso oyo, ukanihooso samatoro uroriso mai Yerusalem na sio oapasanaso.

⁶ Ueuku rotu-tu uhoka poe, haineke Damsyik nea, oyo tau ranie katopu mata sira tau itane mainae on roe nante resita rehoriku.

⁷ Itane resita oyo, uamnahuku poe tuamane, oyo uatinu ia isa nioi iasau osiku, 'Saulus, Saulus. Auna sinsaraku, tau sae?'

⁸ Oyo uasei, 'Upu, ano seia rei?'

Iahata, 'Au reini mo, Au Yesus on poe nia Nasaret. Au sahoru ano wani auna au sinsaraku. Auna we mampusua sinsaraso, areimo sani auna au ruaku sinsaraku.'

⁹ Sio wason okataku onoo itane rei ne oatinu ia wain ianamana osiku tewa.

¹⁰ Oyo au on poe uasei honu, 'Upu, ano mo anina na au una sae?'

Upuku isana san rei, 'Hanu roe, oyo aeua poe Damsyik. Hoka poe oyo, mka atinu rerihoni sae waron Anahatana ihitia na aunare.'

¹¹ Mataku usena raputiso tau unoo itane mainae rei. Reiso sio wason okataku orime hanaku. Orimeku oyo, oautunuku rotu-tu ahokama poe nia Damsyik.

¹² Waini ia isa poe rei nanai Ananias. Iainaa runa Anahatana manisate. Ipusu Musa ne mau-nauna ia-ia. Sio Yahudiu pusiso wason orueso poe Damsyik oamuirai.

¹³ Ihokai mai tanuku, oyo ioi mai nusuku. Ioo mai nusuku oyo, iasau, 'Waniku Saulus, masi anoo honu!'

Mata huni tewa oyo, unooi.

¹⁴ Oyo iasau osiku, 'Anahatana wain rea upu oainaa runai iroma ano nea na anei ne maue. Iromaya na anoo Ia wain Anahatana Iratiki Iapuheuso wain anoi manisate, runa atinu nioi pannuhu ianamana osia.

¹⁵ Ininia na asima osi sio pusiso rerihoni anoo runa atinu sae nea.

¹⁶ Reiso anapa sae rei? Hanu roe na ainisi na Anahatana iuna heu me rosau oyo osohumo na mansiau oanei ata oarihoni mo rosau nea.'

¹⁷ Reiso ununiku mai Yerusalem. Hoka mai oyo, uainisi roe Anahatana ne numa mainisie, oyo unoo masasua.

¹⁸ Unoo Upuri. Upuri iasau osiku, 'Masi aeua rapu rerihoni Yerusalem. Tau sae, mka sio umau mai rei openeso oatinu tau ano asima rerihoni au.'

¹⁹ Ne uasau, 'Upu, sio oanei sapani na ueuku sui numa mananouna osi ita Yahudiu nanie usota sio wason oparisaa tau ano. Usotaso, oyo uhitaso.

²⁰ Sio ohunu Stefanus wain isima runa ano, au oi uooku haineke uahata sio ohunui iake. Au sahoro usaka sio wason ohunui no papita.'

²¹ Iahata, 'Masi aeua. Tau sae, au mo, mka uaisosia aeu hainau noi sio wason sio Yahudiu tewa.' "

Paulus ne kawasa sani Ia Aia Mainae Roma ne mansiau

²² Sio Yahudiu oatinui rotu-tu ianamana rerihoni sio wason sio Yahudiu tewa, oyo oakapona, "Ohunui na imatai iarihoni tuniai reini. Iake tewa iamahaiki asi."

²³ Sio anoo rasaa mainae reiso oakapona runa osihotata no papita runa opesi tapuna suru roe.

²⁴ Reiso ia mainae tau Ia Aia Mainae Roma ne soratatua rei iaisosiso orori Paulus pan no numa hatu rei. Oyo iaisosi sio soratatua oasei tanui runa osapui tau awane unie. Osapui na ianei sio hutue wason oakapona tanui tau ne isanae sae.

²⁵ Sio wason okanihooi tau makapana unte nea, oyo Paulus iasei tau ia kapitane tau sio soratatua utun wain iooi pan rei, “Sio otapia asapu ia wain ne kawasa sani Ia Aia Mainae Roma ne mansiau no kawasa on ia wain ne kawasa iapasanai iasei tanui tewasi? Iasau ata isana tewasi?”

²⁶ Ia kapitane iatinu tau rei, oyo ieu roe ia mainae isima osiki san rei, “Ita isapui san rei iake tewa. Ia rei wain sani Ia Aia Mainae Roma ne mansiau.”

²⁷ Reiso ia mainae ieu poe Paulus, oyo iasei, “Masi asau, titue ano sani Ia Aia Mainae Roma ne mansiau?” Paulus iasau ata, “E-e. Areimo titue. Au sani Ia Aia Mainae Roma ne mansiau.”

²⁸ Ia mainae iahata, “Au usenu kepen panesi na una sani Ia Aia Mainae Roma ne mansiau.”

Paulus on poe iasau, “Ne au uamrai, au sani Ia Aia Mainae Roma ne mansiau nea.”

²⁹ Reiso mata hun tewa oyo, sio soratatua wason naone nanie oasei tanui osuka hae muie. Ia mainae oi ikaitau. Tau sae, ianei nea ata iaisosiso okanihoo ia wain sani Ia Aia Mainae Roma ne mansiau tau rante.

Paulus ianamana inete ruai tau sio ona Yahudiu

³⁰ Hanroe oyo, ia mainae tau Ia Aia Mainae Roma ne soratatua nanie ianei sio Yahudiu oamanaru Paulus, nanie tahae? Reiso iala-pasiki, oyo ianaha runa sio imam onata runa sio

siniriu na oamanouso. Sio oautunu Paulus na iamananeso.

23

¹ Paulus iamrou sio siniriu rei, oyo iasau, “Wea kakau, wea waniu. Rotu-tu reini uarinii rerihoni uamahaiku sapan. Uamahaiku manisate. Upusu Anahatana ne maunauna pusire.”

² Iasau ata ia manisate oyo, sio imam no ia mainae, Ananias, iaisosi sio wason ooso mai Paulus nusui oasapana hohai.

³ Oyo Paulus iasau osiki san rei, “Mka Anahatana iapasana ano. Ano makarotane wani asau ata ruam manisate. Aikee ano manisate tewa. Ano sani pakelo watikohui wani sio oanutu sati putie tanui na sio oahata kuati. Ano aruea pan rei nanie apasanaku pusu Musa ne maunauna. Aikee ano ruam apusu maunauna rai tewa nanie aisosiso oasapanaku!”

⁴ Sio mai Paulus nusui oasau, “Ano auna pumaasio imam no ia mainae wain ianori runa Anahatana tau sae rei?”

⁵ Paulus on poe iasau, “Wea kakau, wea waniu. Au uationai tewa. Sinana au uanei ata ia wain sio imam no ia mainae mka uasau san rei tewa. Tau sae, Musa ikanu tau Anahatana ne anamanaya san rei, ‘Pene ouna pumaa ia mainae wain iaisosi mo mansiau.’ ”

⁶ Paulus anoi repeka ata sio siniriu umau, sio rerihoni tikane Sadukiu runa sio tamena, sio rerihoni tikane sio onata rerihoni akama Yahudi. Reiso iasau osiso san rei, “Wea kakau, wea waniu. Au wani ia onate rerihoni akama Yahudi. Wea upu, sio onata rerihoni akama Yahudi oi.

Omi wani oasei tanuku tau au uparisaa ata Anahatana iapuhai sio matana.”

⁷ Iasau san rei oyo, sio onata rerihoni akama Yahudiu runa sio Sadukiu otuntana runa umau. Sio osamaso tau ua.

⁸ Otuntana tau sio Sadukiu oahata Anahatana iapuhai sio matana honu tewa. Oahata sio maisosia on roe noiyaha wason tewa, inahau waron tewa. Ne sio onata rerihoni akama Yahudi oparisaa tau rai pusire.

⁹ Paulus iasau sio matana oamahaiso honu, oyo sio onata oakapona umau ouna purie. Sio matuhete Musa ne maunauna umau wason sio onata rerihoni akama Yahudi ohitio roe. Ohitio roe oyo, otuntana runa sio Sadukiu. Oasau, “Ami apamata sou ata ia rei iuna sae isa wani resana tewa. Munata inaha isa te, Anahatana ne maisosie on roe noiyaha te, ianamana osiki, areimo iake.”

¹⁰ Sio otuntana mainae nai osa rotu-tu ia mainae tau Ia Aia Mainae Roma ne soratatua ikaitau mka sio oakinene Paulus. Reiso iaisosi ne soratatua oeuso poe, onanai rerihoni sio panesi rei, oyo ororiki roe no numa hatu honu.

¹¹ Pumono pan san rei oyo, Upuri Yesus ihokai ioi mai Paulus nusui. Iahata, “Paulus, apamese anom. Ano asima rerihoni au mai kota Yerusalem nea. Asaka asima runa au roe kota Roma oi.”

Sio Yahudiu oheu nanie ohunu Paulus

¹² Hanroe tau omnanoe oyo, sio Yahudiu umau oheu. Sio osopa ruao ata mka oai tewa, oninu tewa on ohunu Paulus tewasi.

¹³ Sio hutu ate nesi oheu san rei.

¹⁴ Oeuso roe sio imam no sio onata runa sio ona Yahudi nesia rei, oyo oasau, “Ami asopa ruama na ai sae isa tewa on ahunu Paulus tewasi.

¹⁵ Reiso omi runa omi siniriu pusimo oainisi na ia mainae tau Ia Aia Mainae Roma ne soratatua iaisosiso oautunu Paulus mai tanumo. Oasau oakarota ata omi nanie oasei tanui ia-ia rerihoni sae waron sio oamanarui tanure. Mka ami asaka ahunui on ihokai mai tewasi.”

¹⁶ Ne Paulus etei (hotai anai) iatinu ata sio oheu nanie ohunui. Reiso ieui roe sio soratatua no numa hatu, oyo isima osi Paulus.

¹⁷ Oyo Paulus ioi ia kapitane tau sio soratatua utun isa na ihokai. Ihokai oyo, Paulus iasau osiki, “Autunu ia ikine rei roe ia mainae tau Ia Aia Mainae Roma ne soratatua. Nanie isima runa sae isa osiki.”

¹⁸ Reiso ia kapitane iautunu Paulus etei rotu-tu ohokaso roe ia mainae rei.

Hoka roe oyo, ia kapitane iasau, “Paulus, ia waipan pui anoe rei, ioiku, oyo iainisi na uautunu ia ikine rei mai tanua. Nanie isima runa sae isa osia.”

¹⁹ Ia mainae rei iakahuu ia ikine rei hanai, oyo iautunui na uaso ruao. Sio ruao, oyo iasei, “Ano nanie asima runa sae osiku?”

²⁰ Ia ikine rei on poe iasau, “Upuku. Sio Yahudiu umau oapamata sou nanie oainisi na hanroe ano arori Paulus roe sio siniriu. Mka sio oasau oakarota ata nanie oasei tanui ia-ia rerihoni sae waron sio oamanarui tanure.

²¹ Ne pene apusu sio no mainisie. Tau sae, sio hutu ate nesi wason oauhuniso nanie onotai poe arena tihue. Sio pusiso osopa ruao na oai tewa, oninu tewa on ohunu Paulus tewasi. Muie reini

mo, sio wason osaka. Onapa ano amanaku arori Paulus pusu no maue.”

²² Oyo ia mainae rei iasau, “Pene asima osi ia seia man ata ano asima runa no kaheute rei osiku.” Iasau san rei oyo, iaisosiki inuniki.

Sio oaisosi Paulus ieui poe Peliks

²³ Ia mainae tau Ia Aia Mainae Roma ne soratatua ianaha runa sio kapitana tau sio soratatua utun. Ianaha runa sio kapitana ua. Iaisosiso san rei, “Amanou sio soratatua orori tunua utun ua, sio soratatua osaa naitanana hutu itu, runa sio soratatua orori atiena utun ua. Amanouso na sio oeuso poe nia Kaisarea mka-mka pumono tau yam sia.

²⁴ Amanou naitanana osi Paulus oi na isaa naitanane. Oyo oautunui rotu-tu ihokai poe ia gubernur wain nanai Peliks.”

²⁵ Oyo ia mainae rei ikanu surate kani reasau san rei,

²⁶ “Au, Klaudius Lisias uatapea ano upuku, gubernur Peliks.

²⁷ Ia reini, sio Yahudiu osotai, oyo sina ohunui. Ne uhokaku runa sio soratatua umau, oyo usu-puso, oyo unanai rerihoni sio Yahudiu rei. Tau sae, au uatinu ata ia ne kawasa sani Ia Aia Mainae Roma ne mansiau.

²⁸ Au nanie uanei sio wason oamanarui tau sae, reiso uroriki roe sio siniriu.

²⁹ Uatinu sio oamanarui, oyo uanei ata sio oamanarui pusu sio Yahudiu ruao no maunau akama. Ne sio oamanarui pusu sae isa tewa na ami ahunui te anusui pan pui anoe.

³⁰ Oyo sio osima osiku ata sio Yahudiu umau wason oheu nanie ohunui. Reiso mata hun tewa oyo, au uaisosiki poe tanua. Uaisosi sio wason oamanarui rei osima osia runa sio wason oamanarui runa sae.”

³¹ Reiso sio soratatua oeu oautunu Paulus sani ia mainae iaisosiso. Sio oeu okata Paulus tau pumono rei rotu-tu ohokaso poe Antipatris.

³² Hanroe oyo, sio wason osaa naitanana osaa okata Paulus. Ne sio soratatua wason onena onunso roe no numa hatu roe Yerusalem honu.

³³ Hoka poe Kaisarea oyo, orui surate rei osi ia gubernur. Oyo orui Paulus osiki oi.

³⁴ Ia gubernur ihatae tau surate rei, oyo iasei tau Paulus, “Ano me niane sae?” Paulus on poe isima san rei, “Kilikia.”

³⁵ Ia onate iasau, “Mka uatinu runa me parakana rei sirinia. Ne napa rotu-tu sio wason oamanarua ohokaso mai.” Oyo sio oaisosiso osakai pan numa aiau wani Herodes inanai.

24

Peliks iatinu tau sio ona Yahudiu no parakana runa Paulus

¹ Onona nima oyo, sio imam no ia mainae, Ananias, ihokai ikata sio ona Yahudiu umau runa ia wain iamanaru tumatau pusu maunauna isa nanai Tertulus. Ohokaso on roe Yerusalem rotu-tu ohokaso poe Kaisarea. Hoka poe oyo, oamanaru Paulus osi ia gubernur wain nanai Peliks.

² Reiso ia onate rei ianaha runa Paulus. Ihokai oyo, Tertulus iamanarui san rei, “Upuku. Ano aisosima iake. Reiso aruema amaturuma mai rei. Ano me iaka panesi osi ami Yahudiu mai mani

tuamane rei. Tau sae, ano aheu pusu me anei panesi.

³ Upuku Peliks. Ano iake! Sui supan-supan man ami anoma rapeka runa pusire waron ano auna osima.

⁴ Au nanie uakaremaya potuina tewa, ne uainisi na anom iake atinu tau we anamanaya mkana-mkana rai man.

⁵ Ami asupu ia reini mo iuna neka mansia panesi. Iakarema panesi sui supan-supan man sui tuniai reini pusiki iuna sio Yahudiu ouna purie. Ia sahoro iaisosi sio wason opusu ia wain on pan nia Nasaret.

⁶ Ia iapaputi Anahatana wain iainaa nnai ne numa mainisie. Ne ami asotai naone. Ami nanie apasanai pusu Musa ne maunauna man.

⁷ Ne ia mainae tau Ia Aia Mainae Roma ne soratatua iwahui rerihonima,

⁸ oyo iaisosi sio wason oamanarui oamananea. Munata ano ruam ase i tanui, mka atinu ata pusire ami wani amanarui tanure waron titue."

⁹ Sio Yahudiu oama-amanaru Paulus oi oasau ata Tertulus wain iasau titue.

¹⁰ Oyo ia gubernur iatieu osi Paulus na Paulus ianamana. Reiso Paulus iasau san rei, "Upuku. Au uanei ata ano arinii parakanau mai otoi reini rotu-tu musum inasa rai. Reiso uahata iake uanamana unete ruaku mai tanua.

¹¹ Ano ruam bisa ase na mka atinu ata mato ueu roe Yerusalem nanie uainisi uainaa runa Anahatana. Mato ueuku we onona hutusa rahana ua.

¹² Sio Yahudiu onooku wani utuntana runa ia isa tewa. Onooku uamanou sio hutue na ouna purie tewa. Roe Anahatana ne numa mainisie,

pan numa mananouna osi sio Yahudiu, sui kota rei pusiki, onooku una san rei tewa.

¹³ Reiso sio bisa osima runa sae isa osia tewa na ano anei ata sio wason oamanaruku titue.

¹⁴ Ne uasau ata sae wani titue wan san rei. Uainisi uainaa runa Anahatana wain mania upu, sio Yahudiu, oainaa runai oi. Au uainaa runai pusu Yesus ne maunauna waron sio Yahudiu oasau ata waron titue tewa. Runa uparisaa tau Musa ne maunauna runa sio mamsima runa Anahatana ne anamanaya no maunauna sirinia.

¹⁵ Uparisaa sani sio rei oi, ata mka Anahatana iapuhai sio matana pusiso. Sio wason oamanisa runa sio wason oamanisa tewa.

¹⁶ Reiso au uawaha tau we mkonae pusiki na uamahaiku manisate. Uarinii rerihoni uamahaiku sapan. Uamahaiku manisate. Upusu Anahatana ne maunauna pusire. Au we sanae isa osi tumata tewa.

¹⁷ Ueu uarihoni Yerusalem musum inasa rai, oyo ununiku roe rei honu nanie urori kepen osi sio mosokinia rerihoni we mansiau runa urehi makapanau osi Anahatana.

¹⁸ Sio Yahudiu onooku roe Anahatana ne numa mainisie urehire upusu monne uatipusi nea. Ukata sio hutue tewa. Au uunaso ouna purie tewa.

¹⁹ Ne sio Yahudiu umau on pan otoa Asia ounaso ouna purie. Sio sahora kahuræ ohokaso mai na oamanaruku kani nanie oahata au we isanae.

²⁰ Ne ohokaso tewa. Reiso kahuræ sio Yahudiu rei wason oamanaruku mai rei ruao osima osimo runa osupu we kihatene sae pannuhu uanamana unete ruaku osi sio siniriu.

²¹ Hasae sio bisa oasau ata au uoo uamanane sio onata rei, oyo usima na anamanae osa rei man. Uasau, 'Omi wani oasei tanuku ranie hatae reini tau au uparisaa ata mka Anahatana iapuhai sio matana.' "

²² Peliks, ia wain ia ne kawasa rei, ianei panesi rerihoni sio mampusu Yesus no maunauna. Iasau tewa ia seia titue, ia seia isana rerihoni Paulus runa sio Yahudiu rei. Ne iasau san rei, "Mka ia mainae tau Ia Aia Mainae Roma ne soratatua Lisias ihokai, oyo mato uapamata sou rerihoni parakana rei."

²³ Oyo iaisosi ia kapitane tau sio soratatua utun isaka Paulus ne pene iuna mtinte tanui runa itapi ne netau orori apia te, muaine te osiki.

Peliks runa sahai Drusila oatinu tau Paulus

²⁴ Onona inasa rai oyo, Peliks ihokai ikata sahai Drusila. Drusila ia Yahudi. Peliks ianaha runa Paulus, oyo iatinu tau Paulus ianamana rerihoni sapani na iparisaa tau Yesus, Ia Aia wain Anahatana Ihitiki na Iapuheu ne Mansiau.

²⁵ Paulus iaunau rerihoni sapani na ita ia-manisa, sapani na iamtou hanari, iamtou airi na pene ipalalosa, runa sapani na mka ranie hatae isa Anahatana iarinii pusita. Iarinii ia sia wain titue na ia sia wain titue tewa. Oyo Peliks ikaitau. Reiso iasau osi Paulus, "Ano bisa aeua nea. Ne munata mka patapariku tewa, au uanaha runaya."

²⁶ Tau muie rei Peliks inina na Paulus irui kepen osiki na ialapasiki. Reiso taua-taua ianaha runa Paulus na ianamana runai.

²⁷ Ianaha runa Paulus rotu-tu musum ua oyo, sio okati Peliks. Ohiti Perkius Pestus tau ia ne

kawasa tau otoa rei. Peliks nanie iuna iake osi sio Yahudiu, reiso ihoka Paulus rerihoni pui anoe tewa.

25

Paulus iainisi na Ia Aia Mainae Roma iasei tanui

¹ Pestus ihokai poe otoa rei, oyo onona tonu oyo, ieu iarihoni Kaisarea nanie ieu roe Yerusalem.

² Hoka roe oyo, sio imam no sio onata runa sio ona Yahudiu tamena oama-amanaru Paulus osiki. Sio oai-ainisi

³ na iuna iake osiso na iaisosi sio umau orori Paulus roe Yerusalem. Sio rei oheu nanie osakai poe arena tihue, oyo ohunui.

⁴ Ne Pestus on poe iasau, "Sio soratatua wason osakai poe Kaisarea. Au oi, potuina tewa nea, oyo ununiku poe rei honu.

⁵ Reiso oaisosi sio wason no kawasa umau rerihoni omi rei na sio oeuso poe, okataku. Munata Paulus isana mka sio oamanarui poe rei."

⁶ Iruei roe Yerusalem roe sio Yahudiu onona wanu te hutusa honu, oyo Pestus inuniki poe Kaisarea. Hoka poe, hanu san rei oyo, iruei tau ne katera wani iatinu parakanau tanui nanie iasau ata kani Paulus isana te tewa. Iruei poe oyo, iaisosiso orori Paulus poe tanui.

⁷ Paulus ihokai poe nea oyo, sio Yahudiu wason ohokaso on roe Yerusalem rei, oooso ohoriki. Oamanarui oasau ata ne isanaya mtinta panesi. Ne sio onoo tau matae tewa sae waron sio oamanarui tanure.

⁸ Oyo Paulus ianamana inete ruai. Iahata, “Upuku. Pusu Musa ne maunauna, au we isanae isa tewa. Pusu Anahatana ne numa mainisie, au we isanae isa tewa. Pusu Ia Aia Mainae Roma ne maunauna iae, au we isanae isa tewa oi.”

⁹ Ne Pestus nanie inana sio Yahudiu anoo. Reiso iasei tau Paulus san rei, “Ano nanie aeua roe Yerusalem na uarinii ata kani sio oamanaru titue te tewa?”

¹⁰ Ne Paulus on poe iasau, “Au wani uoo mai ano me kawasa. Ia natu Kaisar Roma irui kawasa osia na arinii ata kani usana te tewa. Kahurae omi oasei tanuku mai rei. Ano ruam anei ia-ia ata au we sanae isa osi sio Yahudiu tewa.

¹¹ Au we isanae mtinte isa tewa. Isanae mtinte wani kahurae oapasanaku ohunuku tanui. Sinana au we isanae mtinte na kahurae ohunuku, ohunuku, areimo iake. Au uainisi tewa na pene ohunuku. Ne sio oamanaru oakarota, reiso sio no kawasa oruiku osi sio Yahudiu rei tewa. Au uainisi na ia natu Kaisar Roma ruai iasei tanuku na iasau ata kani we isanae te tewa.”

¹² Oyo Pestus ianamana runa sio wason oau-aunau, oyo iasau osi Paulus, “Ano ainisi na uaisosia roe Ia Aia Mainae Roma reiso kahurae ano aeu roe tanui.”

Pestus isima rerihoni Paulus ne parakana osi aia Agripa

¹³ Potuina tewa oyo, Aia Agripa runa hotai Bernike ohokaso poe Kaisarea nanie oatapea Pestus.

¹⁴ Hoka poe oyo, orue onona inasa rai, oyo Pestus isima runa Paulus ne parakana osi Aia

Agripa. Iasau san rei, “Ia isa wain rei, Peliks iarihoniki pan pui anoe.

¹⁵ Ueuku roe Yerusalem, oyo sio imam no sio onata runa sio ona Yahudiu nesia rei osima osiku runa ia rei. Osima oyo, oainisi na uasau ata ia rei isana.

¹⁶ Ne uasau osiso ata ami, Ia Aia Mainae Roma ne mansiau, piasa atapi ia wain sio oamanarui iamanane sio wason oamanarui rei na ianamana inete ruai. Inete ruai samatoro ami asau ata kani isana te tewa.

¹⁷ Reiso sio ona Yahudiu rei ohokaso mai, oyo unapa potuina tewa. Nene hanu roe oyo, urueku tau we katera wani uatinu parakanau tanui. Oyo uaisosiso orori ia rei poe tanuma.

¹⁸ Sio wason oamanarui rei ohitio roe, oyo uahata kani sio nanie oamanarui tau kahatena mainaya. Aikee oamanarui rerihoni kahatena san rei tewa.

¹⁹ Hasae otuntana runai rerihoni sapani na kahurae sio oainaa runa Anahatana. Otuntana runai rerihoni ia wain nanai Yesus wain imatai. Ne Paulus iasau ata wain iamahaiki.

²⁰ Reiso au mo uanei tewa sapani na mka uariniiki rerihoni rei. Oyo uasei ata kani nanie ieui roe Yerusalem na sio oarinii ne parakana roe kota rei.

²¹ Ne Paulus iainisi na sio soratatua oapamesei na mka Ia Aia Mainae Roma iasei tanui na iasau ata kani isana te tewa. Oyo au uaisosiso oapa-pamesei rotu-tu mka au bisa uaisosiki roe Ia Aia Mainae Roma.”

²² Oyo Agripa iasau osi Pestus, “Potuina nea au ruaku nanie uatinu ia rei.”

Pestus on poe iasau, “Hanroe mka ano atinui.”

Paulus ianamana osi aia Agripa

²³ Reiso hanroe oyo, Agripa runa Bernike ohokaso. Ohokaso oyo, sio panesi oamuiro uaso tau maise onate. Onususo pan numa mainae wani sio hutua oamanouso tanui. Onusu okata sio mainaya rerihoni sio soratatua runa sio onata rerihoni kota rei oi. Oyo Pestus iaisosiso orori Paulus roe tanso.

²⁴ Hoka roe oyo, Pestus iasau, “Upuku Aia Agripa runa pusimo utumo wani okatama mai rei. Omi onoo ia reino. Sio Yahudiu pusiiso wason roe Yerusalem runa mai Kaisarea reini, oainisi runa oakapona oahata kahurae ami ahunui.

²⁵ Ne au usupu ne isanae isa tewa na ami ahunui. Ia ruai iainisi na uaisosiki roe Ia Aia Mainae Roma na iasei tanui na iasau ata kani isana te tewa. Reiso uapamata sou nanie uaisosiki roe Ia Aia Mainae Roma.

²⁶ Ne uanei tewa mka ukanu tau surate sapan osi upuku Aia Mainae Roma rerihoni ia reini runa ne parakana rei. Reiso au uaisosiki ihokai mai tanumo reini runa ano ruam, Aia Agripa, na ita iasei tanui honu na usupu sae isa na ukanu surate rei.

²⁷ Uahana iake tewa kani uaisosi ia isa wain sio oaresiki na ieui roe Ia Aia Mainae Roma kani usima tewa rerihoni sio oamanarui sapan. Kahurae usima rerihoni ne isanae sae.”

26

¹ Oyo Agripa iasau osi Paulus, “Au utapia anamana anete ruam.”

Reiso Paulus iatieu, oyo ianamana inete ruai.

² “Tapea, upuku, Aia Agripa. Au uahana au we untu tau au bisa uanamana unete ruaku osia ranie hatae reini. Unete ruaku rerihoni pusire waron sio Yahudiu oamanaruku tanure.

³ Au we untu tau ano anei panesi rerihoni ita Yahudiu re monna runa sae waron ami atuntana runare. Reiso uainisi na ano atinu rerihoni au sapare tanuku.

⁴ Sio Yahudiu panesi oanei sapani na uamahaiku on au honue asi. Sio oanei sapani na uamahaiku poe au ruaku we niane runa sapani na uamahaiku roe Yerusalem.

⁵ Potuina nea sio oanei rerihoni au. Kani sio nanie, sio bisa osima ata uamahaiku sani ia onate rerihoni akama Yahudi. Upusu monna mtinta pusire waron ami rerihoni tikane rei opusure.

⁶ Muie reini mo, au wani uooku mai rei na omi oasau ata kani usana te tewa tau uparisaa mka ami asupu sae wani Anahatana itotoe osi mania upu ata mka iruiki.

⁷ Sio Yahudiu rerihoni sio ipana hutusa rahana ua oainisi oainaa runa Anahatana tau onone tau ranie. Sio oparisaa ata mka Anahatana irui sae wani itotoe rei. Aikee, Aia Agripa, sio wason oamanaru au reini tau au oi uparisaa ata mka Anahatana irui sae wani itotoe rei.

⁸ Sapan na omi Yahudiu oparisaa tewa ata Anahatana ne kawasa iapuhai sio matana?

⁹ Naone au ruaku uahata kahurae au unesi sio wason oparisaa tau Yesus, ia wain on pan nia Nasaret rei.

¹⁰ Reiso unesiso roe kota Yerusalem. Sio imam onata orui kawasa osiku na unusu Anahatana

ne mansiau pan pui anoe. Sio ohunu sio wason oparisaa rei, au uasau ata iake.

¹¹ Una sinsaraso sui numa mananouna osi sio Yahudiu runa utentene tanso na orati sohi Yesus. Anoku titie mainae tau sio reiso ueu sui kotau sui sio rakana usuiso na una sinsaraso.

¹² Reiso nai osa wani ueuku poe Damsyik. Urori sura kawasae arihoni sio imam onata na una sinsara sio wason oparisaa tau Yesus.

¹³ Au wan ueu sui arena tau ranie katopu, Aia Agripa, oyo unoo itane resita on roe nante. Resita mainae renesi ranie. Wan resita rehoru au runa sio wason oeu okataku.

¹⁴ Pusima amnahuma poe tuamane. Oyo uatinu nioke reasau osiku tau sou Ibrani san rei, 'Saulus, Saulus. Ano anesi au, areimo auna sinsaraku, nanie tahae? Ano anesi au, areimo auna ruam resunia sani koropou reuna ruae resuniki kani resiku upue ne kahitate.'

¹⁵ Oyo uasau, 'Upuku, ano seia rei?'

Upuku on poe iasau osiku, 'Au reini mo, Au Yesus ano wani auna sinsaraku. Auna we mam-pusua sinsaraso, areimo sani auna au ruaku sinsaraku.

¹⁶ Ahanu na aoo roe. Uatuhete ruaku osia na uhitia na anori runaku runa asima runa anoo au ranie hatae reini. Asima runa sae waron mka uatuhetere tanua tau muie oi.

¹⁷ Mka ualapasia rerihoni sio Israel runa sio niana wason sio Yahudiu tewa. Au uaisosia aunau noi sio wason sio Yahudiu tewa

¹⁸ na ano auna sio oanei we maunauna sani aheka sio matao usena na onoo. Uaisosia atuheteso na sani ia isa ieu iarihoni naniai repumonoi, oyo ihokai pan manahane, ia aia sakahatene iaisosiso tewa nea. Ne Anahatana

sahoro iaisosiso na iuna heu no rosau, oyo ouna osa runa sio wason Anahatana iuna anoo manisata tau sio oparisaa tau Au.'

¹⁹ Reiso, Aia Agripa, au upusu Yesus ia-ia. Yesus wain iatuhete ruai osiku on roe noiyaha rei na unooi.

²⁰ Mataanoë uaunauso poë nia Damsyik. Ita uaunauso roe kota Yerusalem. Uaunau sio sui otoa Yudea pusiso. Ita uaunau sio wason sio Yahudiu tewa. Uaunauso ata kahuræ sio oarihoni no rosau, oyo opusu Anahatana ne maunauna runa oatuhete ata oarihoni no rosau pusu oamahaiso manisata.

²¹ Reiso tau rei, sio Yahudiu osotaku roe Anahatana ne numa mainisie. Osotaku oyo, ohunu reaku.

²² Ne rotu-tu reini Anahatana iakahaiku. Reiso wani uooku mai rei na usima rerihoni Yesus osi sio pusiso, sio mainaya runa sio wason sio mainaya tewa. Sæ waron uasau rei runa sæ waron sio mamsima runa Anahatana ne anamanaya runa Musa oaunututu anoo tanure, pusire osa.

²³ Pusima asau ata Ia Aia wain Anahatana Ihitiki na Iapuheu ne Mansiau mka sinsarai, oyo iuna tumata wain mataanoë imatai, oyo iamahaiki honu. Iamahaiki na isima osi sio Yahudiu runa sio wason sio Yahudiu tewa ata Anahatana mka iapuheuso na oamahaiso rotu-tu ria supan. Sani kamane resita na onoo pusire, Anahatana iapuheuso pusu iunaso oanei ne maunauna."

²⁴ Paulus wain ianamana inete ruai san rei, oyo Pestus iakapona san rei, "Paulus, ano amukea

nea. Anoo me surata panesi rotu-tu amukea nea.”

²⁵ Ne Paulus on poe iasau, “Upuku, Pestus. Umukeku tewa. Au wani uasau anamanaya waron titue runa iaka.

²⁶ Aia Agripa ruai ianei ata au wani uasau rerihoni Yesus titue. Reiso tau ia aia Agripa ianei nea rerihoni sae waron uasau rei, uanamana umoni tewa. Au uanei ia-ia ata ianei pusire rerihoni Yesus. Ianei oi ata sio ouna sani uasau rei osi Yesus, oauhuniso tewa. Ounai mai manahane.

²⁷ Aia Agripa. Ano aparisaa tau sae waron sio mamsima runa Anahatana ne anamanaya oaunutu anoo tanure, tea? Uanei ano aparisaa.”

²⁸ Oyo Agripa iasau osi Paulus, “Ano ahata aunauku rapu-rapu man san rei, oyo nanie auna au unusu Sarane?”

²⁹ Oyo Paulus on poe iasau honu, “Au uainisi tau Anahatana na rapu-rapu man te, potuina te, ano, Aia Agripa, runa omi pusimo utumo wani oatinu tau au ranie hatae reini ouna Saraneu sani au reini. Ne uainisi tewa na omi, sio okanihoomo tau ranteu san rei.”

³⁰ Oyo ia aia, ia gubernur, Bernike, runa sio pusiso wason oru-rue okataso, pusiso ohitioso.

³¹ Ohokaso pan manahane, oyo pusiso oasau osi umau, “Ia rei iuna sae isa tewa na kahurae sio ohunui te osakai pan pui anoe.”

³² Oyo Agripa iasau osi Pestus, “Sinana pene iainisi na Ia Aia Mainae Roma iasei tanui, ami ahokai arihoni pui anoe.”

27

Paulus sio osaa kapane nanie oeuso roe kota Roma

¹ Sio mainaya oapamata sou nanie oaisosi Paulus isaa kapane ieu i pan otoa Italia. Kota Roma wapan Italia. Reiso sio orui Paulus runa sio umau honu wason osakaso pan pui anoe. Oruiso osi ia kapitane tau sio soratatua utun wain nanai Yulius. Sio oaoi ne tikane soratatua tau, "Ia Aia Mainae Roma Ne Tikane."

² Au, Lukas, uhokaku poe Paulus, oyo ami asaa kapane wani rehokai on nau Adramitium. Kapane rei nanie reeu rehoi namana sui otoa Asia. Ami asaa roe, oyo kapane rei reruma. Aristarkhus, ia Makedonia on pan nia Tesalonika, isaa ikatama oi.

³ Hanroe oyo, ahokama poe namane Sidon. Yulius iake runa Paulus. Reiso itapiki ieu ria ne netau na sio oakahaiki.

⁴ Asaa on poe Sidon honu. Kapane reruma rehoha ihute reiso ami asaa asawari nusa Siprus sui kola atua na nusa rei renete ihute.

⁵ Oyo kapane reruma pusu nuae haineke otoa Kilikia runa otoa Pampilia, oyo ahokama poe nia Mira poe otoa Likia. Hoka poe oyo, kapane remamanui.

⁶ Kapane remamanui oyo, ia kapitane isupu kapane isa honu. Kapane rei mato rehokai on nau kota Aleksandria nanie reeu pan Italia. Reiso ia kapitane rei ineama asaa kapane rei.

⁷ Kapane rei reruma manu-manu rotu-tu onona inasa rai, oyo ahokama poe nia Kanidus. Ne ahokama poe susa. Oyo kapane reruma

rehoha ihute reiso kapane reruma suru poe iake tewa nea. Reiso reruma suru nau pusu nusa Kreta haineke Tetue Salmone na nusa rei renete ihute.

⁸ Kapane reruma haineke kola atua ne reruma susa. Ereruma-ruma rotu-tu ahokama poe niane isa nanae Namane Iake, haineke nia Lasea.

⁹ Ami asaa potuina reiso kapane reruma iake tewa nea. Haineke musum mahatane nea reiso nuae mainae nea. Reiso Paulus iaunauso san rei,

¹⁰ “Wea kakau, wea waniu. Au uahata mu-nata ieuta isaa kapane muie reini mo, iake tewa. Mka isupu siraka. Mka apia pan kapane anoe ramokoso, kapane remokoi, runa sio umau omataso oi.”

¹¹ Ne ia kapitane tau sio soratatua utun iatinu tau ia wain iaisosi sio mamrori kapane runa ia kapane upue no maunaune. Iatinu tau Paulus ne maunaune tewa.

¹² Namane rei iake tewa na kapane reruei tanui tau musum mahatane. Reiso sio panesi rerihoni sio wason osaa kapane rei oapamata sou nanie osaa kapane rei honu oyo, oeu rea rotu-tu ohokaso poe namane Peniks na onapa poe rei rotu-tu musum mahatane pusiki. Peniks areimo namane nau nusa Kreta wani remanane hae ranie sinohue napi wanane.

Ihu mainae nau nuae

¹³ Tau muie rei hananunne reuhona on nau haha. Reiso sio wason orori kapane rei oahata kapane bisa reruma iake nea. Reiso nanie osaa poe Peniks nea. Reiso oapusaa kapane nene hatu aie, oyo kapane reruma suru poe haineke kola atua sui nusa Kreta.

¹⁴ Ne potuina tewa oyo, ihu mainae reuhona makae nai osa on ria muni. Sio oaoi ihute san rei tau “Ihute On Pani Ranie Eresaa Napi Pante”.

¹⁵ Ihu mainae rei rehita ami mani kapane rei reiso bisa reruma suru pan tewa nea tau kapane reruma rehoha ihute. Reiso ami atapi ihute rei rehana mani kapane man. Kapane remanu repusu ihute man.

¹⁶ Ami aniku nusa ikine isa nanae Kauda. Nusa rei renete ihute mkane reiso ami akua apamese kapane rei nene haka. Ne susa nai osa apamesei.

¹⁷ Sio oapusaa haka rei roe kapane, oyo okani-hoo awaneu rahori kapane rei na kapane makae. Sio okaitau mka no kapane rei kokiee tau sisia nau Sirtis tau nuae nekete. Reiso oaputunu nane onate, oyo otapi no kapane rei remanu repusu ihute man.

¹⁸ Ihute karihurue rei runa kolau mainaya rai rasa-rasasiru mani kapane rei, rotu-tu hanroe oyo, apesi apia umau waron kapane rerorire. Apesire poe nuae na kapane karahirine mkane.

¹⁹ Oyo hanroe honu oyo, sio ruao opesi kapane nene naneu umau, toka-toka naneu umau, runa awaneu umau. Opesire poe nuae.

²⁰ Onona inasa rai anoo ranie tewa, anoo oneu tewa. Ihu mainae rei runa kolau mainaya rai rasa-rasasiru mani kapane sirinia. Reiso ami ahata kani mka amahaima tewa nea. Mka amokoma.

²¹ Potuina nea oaiso tewa. Reiso Paulus iooi kua tihue, oyo iasau osiso, “Wea amau, wea kakau, wea waniu. Sinana omi oatinu tau au we maunaune na pene osaa kapane oeu oarihoni Kreta, ita isupu siraka san rei tewa. Ne omi

oatinu tau au tewa reiso ita ruari resunita runa re apia umau, ipesire nea.

²² Ne au uainisi na oapamese anomo. Mka ia isa iae rerihoni ita reini imatai tewa. Mka pusita iamahaita. Hasae kapane ruae mka remokoi.

²³ Au uanei nea tau monosi Anahatana wain iaisosiku runa uainisi uainaa runai iaisosi ne maisosie on roe noiyaha isa ihokai mai tanuku. Ia maisosie rei iooi mai nusuku,

²⁴ oyo iasau, 'Paulus. Pene anom reuponu. Kahurae ano amanane ia Natu Kaisar. Atinu. Anahatana anoi iake tau ano reiso sio wason osaa kapane rei okataya mka oamahaiso oi.'

²⁵ Reiso wea amau, wea kakau, wea waniu. Oapamese anomo. Uparisaa tau Anahatana ata mka reeu sani ia maisosie iausau osiku rei.

²⁶ Ne mka kapane rei kokiee ria nusa isa."

Kapane kokiee ria nusa isa

²⁷ Ihute rerori mani kapane rei onona hutusa rahana ate nea, oyo pumono pan san rei oyo, mani kapane rei wani remanu sui Nuae Adria. Saa monon tihu pan san rei oyo, sio wason orori kapane rei oahana ata ami wani haineke muni nea.

²⁸ Reiso sio okanihoo hatu tau awane na orenu nuae. Oyo orati hatu rei reruma rotu-tu poe nuae nosite. Oyo oapusaa hatu rei honu, oyo orenu ata noa hutu ua. Kapane reatia mkane honu, ita orenu honu. Noa hutusa rahana nima.

²⁹ Sio okaitau mka kapane rekoa hatu. Reiso oausipu hatu aia ate hae kapane muie. Oausipure oyo, oainisi na manahane on sini.

³⁰ Sio wason orori kapane rei nanie mene-mene oruma oahuniso oarihoni kapane rei.

Reiso orati kapane nene haka poe nuae oakarota ata nanie oausipu hatu aia honu hae kapane uae.

³¹ Ne Paulus iasau osi ia kapitane tau sio soratatua utun runa sio soratatua, “Munata sio rei okata kapane rei tewa, omi pusimo mka oamahaimo tewa.”

³² Reiso sio soratatua oroto roha awaneu waron rakanihoo haka rei, oyo otapiki remnahui poe nuae, oyo remanui.

³³ Haineke kinoke nea oyo, Paulus iaisosi sio pusiso oaiso. Iasau san rei, “Onona hutusa rahana ate nea omi oai tewa. Ne onapa-napa anomo ramaturuso tewa man. Oai sae isa tewa.

³⁴ Reiso uaisosimo oai mkane na mka oamkona honu. Oai mkane. Tau sae, mka pusimo oamahaimo. Sinsaramo tewa nea.”

³⁵ Iasau pusi san rei oyo, inana poroti, oyo iasau osi Anahatana san rei, “Ama, Anahatana. Ano iake. Ano arui muaine rei osima.” Sio pusiso onooi. Oyo ikuparehi poroti rei, oyo iaiki.

³⁶ Reiso pusiso anoo kaia reiso oaiso.

³⁷ Ami pusima noi kapane anoe, ami utun ua hutu itu rahana nome.

³⁸ Ami aima rotu-tu tiama pokona, oyo sio opesi gandum wani kapane repuniai na kapane rei karahirine mkane.

³⁹ Ranie resaa nea oyo, sio onoo muni ne oanei tewa ata sio wason sui supa. Ne onoo nua pina runa sisia ria nuae nusue. Reiso sio oheu nanie ouna kapane resosu ria muni rei kani olaiki.

⁴⁰ Reiso oroto roha awaneu waron sio okanihoo hatu aia tanure na hatu aia ramokoso poe nuae nosite. Oyo osuha awaneu. Awaneu rai, sio okanihoo kapane nesita tanure. Osuhare na

ouni asawari kapane uae. Oyo oapusaa nane roe kapane uae na kapane reruma pusu ihute. Oapusaa nane oyo, onina ria muni.

⁴¹ Ne kapane rei retaehe tau pupue poe nuae nosite wani reuna nuae nekete. Kapane uae remainutiki tau sisia reiso nisue tewa nea. Oyo kolau mainaya rapapa kapane muie rotu-tu wapoho pusiki.

⁴² Reiso sio soratatua oheu nanie ohunu sio wason sio osakaso na pene oakinanuso rotu-tu ohokaso ria muni, oyo orumaso.

⁴³ Ne ia kapitane tau sio soratatua utun ipenei tau Paulus imatai. Reiso isopo na pene sio soratatua ohunu sio wason sio osakaso. Oyo iaisosi sio pusiso wason oanei oakinanu osoman poe nuae na oakinanuso rotu-tu ohokaso ria muni.

⁴⁴ Sio wason oanei oakinanu tewa orime ai inata rerihoni kapane rotu-tu ohokaso ria muni. Reiso ahokama ria muni pusima amahaima.

28

Paulus sio pan Malta

¹ Hoka ria muni pusima amahaima oyo, ami atinu rerihoni sio nusa niane ata ahokama ria nusa nanae Malta.

² Sio nusa niane rei oatapeama iake runa oakahaima. Uane. Mahatane. Reiso oakanupu usa osima na asama haineke usa rei.

³ Paulus ieu iamanou menia, oyo iaunutu menia poe usa. Iaunutu menia poe usa oyo, teke minne isa rehokai rerihoni usa rei nanie

rerumai rerihoni titie. Oyo reoto Paulus hanai. Realapasiki tewa.

⁴ Sio nusa niane onoo ata tekene rei realapasiki tewa, oyo oasau osi umau, "Ira oe. Titue. Ia rei ihunu tumata. Masike imatai nau nuae tewa iae, ia anahatana isa, anahatana wain iapasana pusita osa nanie ihunui pusu tekene rei."

⁵ Ne Paulus ikunariri hanai, oyo tekene rei realapasi rerihoni hanai. Realapasiki oyo, rem-nahui poe usa. Paulus iake.

⁶ Sio oahata mka-mka Paulus hanai reposu te mata hun tewa oyo, iamnohoi imatai. Ne sio onapa potuina, oyo onoo ata ia iake sirinia. Reiso anoo rarinii tamene, oasau ata Paulus wain ia anahatana isa.

⁷ Tau otoi rei wani ia mainae tau nusa rei ne tuamane. Ia mainae rei nanai Publius. Iatapeama iake, oyo iainisi ami na ararane ria ne numa. Ararane ria ne numa rei onona tonu.

⁸ Tau muie rei, Publius amai ikupui. Ipusai runa tia reoto reiso inekei. Paulus ieu inooi, oyo iainisi runa iahusiei. Iainisi oyo, ia kupue rei iake. Ikupui tewa nea.

⁹ Areimo san rei oyo, sio kupua pusiso sui nusa rei ohokaso mai Paulus. Paulus isuisene sio pusiso, oyo iake.

¹⁰ Sio oamuirama orui panesi osima. Ami nanie aeu arihoniso nea, oyo oautue muaina runa apia roe kapane osima na ami mani apia apakere runa mani muaina tau mani weka roe kapane anoe.

Paulus sio oeu arihoni Malta rotu-tu ohokaso roe Roma

¹¹ Ami aruema pan nusa Malta hunana tonu oyo, aeuma asaa kapane wani rehokai on nau Aleksandria. Ereruei pan nusa Malta rotu-tu musum mahatane pusiki. Roe kapane uae wani siaie rerihoni sio no anahatanau waron titue tewa. Oaoiso tau “Anahatanau Sio Alalekau.”

¹² Kapane rei reruma rotu-tu remamanui pan namane Sirakusa, oyo amamanuma pan kota rei onona tonu.

¹³ Ita asaa kapane rei honu rotu-tu ahokama poe namane Regium. Hanroe oyo, ihute on nau haha. Reiso kapane reruma rotu-tu nene hanroe san rei, oyo remamanui poe namane Putioli. Hoka poe oyo, asipuma on roe kapane rei.

¹⁴ Poe rei asupu sio umau wason oparisaa tau Yesus. Sio rei oainisi na ararane akataso rotu-tu onona itu. Reiso ahokama roe Roma san rei.

¹⁵ Sio wason oparisaa roe Roma oatinu ata ami wani ahokama. Reiso sio umau oeu rotu-tu sio umau ohokaso pan Pasar Apius runa sio umau honu ohokaso pan nia Numau Tonu. Ohoka oatapeama. Paulus isupuso, oyo ianamana osi Anahatana san rei, “Amaku, Anahatana. Ano iake. Ano aisosi me mansiau rei ohokaso oau-tunuma rotu-tu ahokama roe Roma.” Iasau san rei, oyo iahana anoi kaie.

¹⁶ Ahokama roe Roma oyo, otapi Paulus ruai iruei tau ne numa isa ikata ia soratatue isa wain isaka-sakai.

Paulus iaunauso roe kota Roma

¹⁷ Paulus wairo kota Roma onona tonu nea oyo, ianaha runa sio ona Yahudiu ohokaso noi tanui. Hoka poe oamanouso samatoro Paulus iasau san rei, “Wea kakau, wea waniu. Masike au una sae

isa tewa na unesi ita Yahudiu. Masike au una sae isa tewa wani rei monna ita isupure rerihoni rea upu rasopota iae, sio Yahudiu roe Yerusalem oaisosiso osotaku, oyo oruiku osi sio wason Ia Aia Mainae mai Roma iaisosiso.

¹⁸ Ia Aia Mainae Roma ne mansiau oasei tanuku, oyo nanie oalapasiku. Tau sae, osupu sae isa tewa wani au una kahatene na mka ohunuku.

¹⁹ Sio Yahudiu rei openeso tau Ia Aia Mainae Roma ne mansiau oalapasiku. Reiso otentene tanuku na uainisi na Ia Aia Mainae Roma iatinu we parakana rei na iasau sae wani titue, sae wani resana. Masike au nanie uamanaru wea kakau, wea waniu wason sio Yahudiu tewa, sio otentene tanuku uainisi san rei.

²⁰ Areimo san rei, reiso uanaha runamo na unoomo, oyo uanamana osimo. Tau sae, sio okanihooku tau rante rei tau uparisaa tau ia wain ita Israel iparisaa ata mka ihokai.”

²¹ Oyo sio ona Yahudiu oasau osiki san rei, “Ami asupu surate isa on pan Yudea tewa, mai resima runa ano. Ia Yahudi isa tewa ihokai isima runaya. Ia isa iamanarua osi ami reini tewa.

²² Ne ami nanie atinu rerihoni ano aparisaa sapan. Tau sae, ami anei ata sui supan-supan man sio oanamana kahatene rerihoni sio Sara-neu wason opusu ano me maunauna.”

²³ Reiso ohete umetene na oamanouso honu. Tau ranie hatae rei sio ohetei nea, sio panesi ohokaso noi Paulus ne numa renesi sio wason ohokaso mataano. Ohokaso tau omnanoe oyo, Paulus iatuheteso rotu-tu ranie manne. Iatuheteso runa isima osiso runa sapani na Anahatana irime ne mansiau. Paulus iaunauso

pusu Musa ne maunauna runa sio mamsima runa Anahatana ne anamanaya no surata na iunisui reaso na oparisaa ata Yesus wain Ia Anahatana Iratiki Iapuheuso.

²⁴ Sio umau oparisaa tau Paulus ne anamanaya. Ne sio umau honu openeso oparisaa.

²⁵ Sio Yahudiu otuntana runa umau nanie onunso nea. Reiso Paulus iasau osiso san rei, “Masuae Anahatana Ne Inaha iuna Yesaya, ia mamsima runa Anahatana ne anamanaya isa, iasau titue. Iasau osi moa upu sani Anahatana iasau san rei,

²⁶ ‘Aeua sui me mansiau rei, oyo asau,

“Mka tinamo ukuna raatinu we maunauna,
ne omi oaneire tewa.

Mka matamo usena ranoo sae waron au uunare,
ne omi oaneire tewa.”

²⁷ Mka sio oanei tewa tau openeso oarinii manisate.

Openeso oatinu tau tinao ukuna.

Openeso onoo tau matao usena.

Munata openeso tewa, mka matao usena ranoo
oyo oanei.

Munata openeso tewa, mka tinao ukuna
raatinu oyo oanei.

Munata openeso tewa, mka oarinii manisate
oyo oanei.

Oanei, oyo anoo rauni rapusu au
na au una heu no rosau.’

²⁸ Reiso kahurae omi oanei ata maunaune rei rerihoni sapani na Anahatana iapuheuso na oamahaiso rotu-tu ria supan haineke Anahatana, iruiki osi sio wason sio Yahudiu tewa. Mka sio oatinu.”

²⁹ Paulus iasau san rei, oyo sio Yahudiu rei onunso. Oeu otuntana runa umau.

³⁰ Paulus iruei roe Roma musum ua. Iruei tau numa wani isehai. Iatapea sio pusiso wason ohokaso onooi runa oanamana osiki.

³¹ Isima osiso ata Anahatana irime ne mansiau nea. Iatuheteso rerihoni Upuri Yesus Kristus. Iatuheteso mai manahane, iauhuniki tewa. Ikaitau tewa. Sio osopoi tewa.

**Anahatana ne Anamanaya tau Sou Naunue
Nuauulu, South: Anahatana ne Anamanaya tau Sou
Naunue (New Testament+)**

copyright © 2019 Wycliffe Bible Translators, Inc.

Language: (Nuauulu, South)

Contributor: Gereja Protestan Maluku

All rights reserved.

2025-05-20

PDF generated using Haiola and XeLaTeX on 19 May 2025 from source
files dated 20 May 2025

b0e8a98f-e16d-5ef2-aee1-d71416901aa6